

(2)  
SCAEVOLAE  
SAMMARTHANI

• LVCVBRATIONVM

PARS ALTERA,

*Qua continentur*

• ALLO RVM doctrina illustrium, qui  
nostra patrūque memoria flo-  
ruerunt, ELOGIA.



Augustoriti Pictonum,  
Apud viduam Ioannis Blanceti  
Typographi Regij.

---

M. DC. VI.





A D V. C.

IACOBVM AVGVSTVM

THVANVM SACRI CONSI-  
storij Consiliarium & Sena-  
tûs Parisiensis Præsidem.



AUTOR & antistes doctorum Au-  
guste Virorum,  
Quo sine iam studiis nec foret ullus  
bonos;  
Dum tu longinquo Francisci à funere  
Primi,

Qui tenuit valida Gallica sceptrâ manû;  
Persequeris gesta immensum quacunque per orbem  
Seu terra & pelago, seu foris atque domi.  
Magnum opus & nullis vnquam delebile seclis;  
Quale nec Ausoniae Liuius ante dedit.  
Ipse ego non aquis tua per vestigia repens  
Passibus, ad laudem qua datur ire via;

A ij

Quod potui, doctorum hominum fœlicibus Vmbria  
Elogia hæc gratus qualiacunque tuli.  
Pierias certè poteram meliora per arteis  
Moliri, studiis & magis apta meis.  
Nam mihi si testes fas appellare Camœnas,  
Nec vetat ingenuus dicere Vera pudor,  
Ausus ego Italiæ facunda laceffere cantu  
Ingenia, & Latio scribere digna sale.  
Sed fuit hoc olim potioris flore sub æui,  
Dum nouus in vegeto pectore sanguis erat.  
Nunc senij graue pondus obest, nunc debilis ætas,  
Nec pote iunctorum vincula ferre pedum.  
Hinc mihi sola placent numerorum lege soluta,  
Quæq; magis facili tramite verba fluunt.  
Sic nempe & viridi fidens qui sæpe iuuenta  
Vicit in Eleo puluere fortis equus,  
Languidior postquam mēbris illapsa senectæ est;  
Nec calor in cursu qui fuit ante viget,  
Mollia iam tentat vacuo vestigia campo,  
Et refugit metis, carceribûsque premi.  
Quis scit an & doctas teneant hæc aptius aures  
Quàm leuia & teneris carmina blāda sonis?  
Quidquid erit, flos lectæ virûm, te pēdet ab vno,  
Præsidiiq; aura nititur omne tui.  
Tu bonus exiguum veteris cape munus amici,  
Quem tibi Musarum iunxit honestus amor.  
At vos, illustres animæ dignissima calo.



Nomina, quæ memori Gallia mente colit.  
Dum struimus vestra monumenta hæc debita fame,  
Quæq; licet iusto fungimur officio,  
Sit quanquam hoc temerè nitido lucem addere Soli,  
Nostrâq; ad laudem non egeatis ope,  
Ne tamen Elysia pigeat spectare sub Umbra  
Hanc curam & tenuis dona pusilla manus.  
Si non ingenio, si non satis arte placebunt,  
Certè animus dantis respiciendus erit.  
Forsan & è vobis aliquis cum legerit, Iste  
(Dicet) erit nostri pars aliquando chori.  
Quamq; aliis operam præstat pius, ipsa merenti,  
Posteritas grata reddet amica vice.

Augustoriti Pictonum,  
Cal. Augusti. 1598.



**S**ammarthane, tuo pro munere digna rependo:  
*Quæ præstas doctis omnibus vnus habe.*

C. HVALDVVS Mommagnius  
Lib. suppl. Magister.

---

**C**Ælo Tyndaridæ in Vices recepti  
*Alternis moriuntur atque viuunt.*  
*Sed Phæbo Elogiis tuis fauente*  
*Non alterna tibi Virisque doctis,*  
*Ast æterna paratur & viget laus.*

LVD. SAMMARTHANVS  
Profeneschallus Pict.

---

**E**logiis doctos dum claras, Scauola, Gallos,  
*Clarescis claris clarus ab Elogiis:*  
*Non aliter quàm Sol, qui lumina fœnerat astris,*  
*Reflexus in sese lucidiore cluit.*

B. IRLANDI Antecess. &  
Consil. Reg.

**A** Eternūm viuunt celestibus indita libris,  
Sacra Deo, gentis nomina Pieria.  
Hoc meruit Virtus, meruit doctrina virorum,  
Mancipio soluit quos Libitina suo.  
Non satis hoc, vite libris inscripta manere  
Nomina, si terras nocte sepulta latent.  
Hoc SAMMARTHANI genius, Parnassidīs orā  
Cultor, & Ascræis excita musa iugis  
Ferre nequit, cælo sœlices viuere terris  
Ignotas animas, & sine teste deas.  
Elogiis hominum facit vt versentur in ore,  
Et terras celebri nomine, laude colant.  
Æternūm viuunt cæli terræq; relata,  
In libros gentis nomina Pieria.  
Et Sammarthanum sibi quod præfabitur ipse  
Elogio dignum tot monumenta ferent.

ADAM. BLACVODÆVS  
Consil. Regius.





SCÆVOLÆ  
SAMMARTHANI  
ELOGIORVM  
Liber primus.

---

*Jacobus Faber Stapulensis.*

**T**ORPEBANT ingenia Gallorum  
diuturnis ignorantiae tenebris  
inuoluta, Lutetiæque scholas  
omnes fœdissima iampridem  
Barbaries occupabat, cùm è  
Belgico litore tâquam Sol nouus emerfit Ia-  
cobus ille Faber, qui dissipata caligine Gal-  
licam iuuentutem ex altissimo veterno tan-  
dem excitaret, liberalésque disciplinas turpif-  
simè iacentes effuso purioris doctrinæ lumi-  
ne primus illustraret & erigeret. Erat is ad  
Stapulas maritimū Picardiæ pagum ex igno-

bili familia natus, cultumque ingenij, quem illa tempora ferebant, inter aniles Sophistarum nugas & ineptias apud Parisios acceperat. Sed hanc fortunæ tenuitatem generosa planè indole superabat. Cùmque pro solerti, quo pollebat, iudicio, aliquid in literis maius omnino & præclarius esse sètiret, quàm quod antè à barbaris illis & imperitis præstitum esset; partim suo impulsu, partim eruditorum hominum, qui tum in Italia florebant, exemplo & æmulatione incensus, totum se in illius boni cognitione & scientia collocavit; Eo euentu, vt & ipse perfectissimè doctus euaderet, & alios aptissima deinde methodo facilitatè doceret: non voce tantum & prælectionibus, verùm & scriptis, quibus ad vniuersam Aristotelis doctrinam, Matheosque partes omnes planum & facilem posteris adiutum patefecit. Sed qui Socratis in sapientia propaganda studium æmulabatur, Socratis quoque vicem non effugit. Nec enim defuere qui senescētem & libros sacros (vt hominē Theologici ordinis insignibus cohonestatum decebat) liberiore censura castigatē deprauatę Religionis reum identidem postularent; Non dubia demum spe victorię, cùm ad Ticinum Francisco Rege capto & in Hispaniam

abducto (cuius auctoritas & perpetuus in literatos amor non semel eum antè protexerat) opportunam opprimèdi hominis occasionem sibi offerri iudicarent: nisi denuò pius princeps intercedente Margareta sorore Nauarræ Regina cæcas istorum artes & consilia elusisset, datis ad Senatum literis, quibus causæ totius cognitionem ad se transferebat. Ille autem sponte vrbe discedens inuidiæ se subduxit, Neracúmque Nauarræ ditionis vrbem Albretiorum olim Regiam in illius Heroinæ clientelam se recepit. vbi cùm ad longissimam ætatem tràquillissimè vixisset, senio magis, quàm ægritudine oppressus interiit. Statura fuit supra modum humili, vultu modesto & moribus planè aureis, animo præsertim ab omni auaritiæ labe prorsus alieno; vt nec vlla rei faciendæ cura duceretur, & auitum patrimonium (quantulum id cùmque erat) fratribus, fratrumque filiis vtendum fruendû relinqueret. Mortuum luxerunt eruditi omnes veluti carissimo parente orbat, solemnèque funeris pompam Margareta ipsa mæres præsentia sua honorauit.

*Gulielmus Budæus.*

**E**XPLICATA Fabri Stapulensis vita, primus mihi non ætatis modò sed meriti etiam ordine appellandus occurrit Gulielmus Budæus Parisiensis omnium, qui hoc patrùmque seculo vixere, sine controuersia doctissimus. Quamquam, nisi hoc instituti ratio postulet, quid opus eum celebrare, cuius fama in excelsò & illustri loco posita omnes omnium nationum homines in admirationem sui quotidie conuertit? Eoque magis, quòd in vrbe ab his studiis id temporis abhorrente inter luxum & opes ortus & educatus, nullo præceptore, nullo riuale, ad supremum illud eruditionis fastigium sua ipsius industria constantiaque pene incredibili prouectus est. Defuit quidem tanto viro perspicuus ille venustioris eloquentiæ nitor, quem recentiores vni Ciceroni addicti maiore studio & religione coluerunt. Sed quid si existimabat (id quod res erat) eius auctoritatis homini grauitatem styli magis quàm verborum lenocinia conuenire? Certè voluntatem ei non facultatem defuisse



argumento esse potest penitissima illa totius Latinitatis cognitio, cuius in Pandectis recensendis & Romanorum iure illustrando luculentum & nobile specimen dedit. In Græcis autem quis nō miretur eo usque progressum, ut (quod nullidum extra Græciam nato contrigerat) ipsius Iani Lascaris Græcorum doctissimi iudicio veterē Atticorum facundiam adæquasse diceretur? His præsidiiis ornatus multa nobis reliquit vigiliarum monumenta, quæ cum omnia singularem ingenij doctrineque laudem præ se ferrent, nullū tamen splendidius fuit aut magnificētius, quàm laboriosa de Assē lucubratio: qua res à tot iam seculis intactas penitusque abstrusas & latētes ex intimis obscuræ antiquitatis penetralibus eruit ac in lucem protulit. Neque defuerunt ex Italia Germaniæque plures æmuli, qui pulcerriam illam operam sibi præreptam esse contenderent, falsòque vendicarent. admovente calumniæ faces Erasmo, qui cū occultè Budeo principem in literis locum inuideret, hominis existimationem, quam non audebat aperte inuadere, cuniculis oppugnare non dedinebat. Peruicit tamen veritas, nec mēdacio passa est se opprimi, aut quem ille fructū ex suis laboribus colligere meruerat ad alios

indignè transferri. Cæterùm vir tanta animi contentione Musis operatus à ciuilibus interim negotiis & Reipubl.cura non abfuit. Nā & à Francisco primo in aulam ſepe accerſitus, & Romam de belli ſocietate cum Leone ſummo Pontifice aduerſus Cæſarem & Heluetios contrahenda vnà cum aliquot regni proceribus ab eodem principe legatus eſt. Cúmque per aliquot annos Regij Scribæ partes impleuiſſet, ſupplicibus quoque libellis (qui honos in Prætorio maximus) non minori probitatis quàm eruditionis gloria diu multúmque præfuit. Cuius muneris obeundi cauſa dum Gul: Poieto militiæ togatæ principi gratiſſimus comes adhæret, nec vllis itinerum difficultatibus ab eius latere diuelli poteſt, accidit vt annum agens ſeptuageſimum tertium, canicula æſtuate, in ſæuiſſimam febrem incurreret: qua demum ingraueſcente ſub finem Auguſti menſis anno huius ſæculi quadrageſimo vir eximius animam cœlo dignam exhalauit: relicta numerofa ſobole, factóque teſtamento, ex cuius præſcripto Lutetiæ in D. Nicolai campeſtris, nullo funeris apparatu ſepultus eſt, ac paulò mox à Iacobo Sammarthano patruo meo doctiſſimo fanè viro funebri oratione in vulgus edita commendatus.

*Christophorus Longolius.*

**L**ONGOLIUS quidem ipse suis in scriptis Maclinie noto Gallie Belgicæ oppido natalia se debere profiteretur. Sed politiores Bataui, in quibus est Ianus ille Douza vir nobilis & cū primis eruditus, hunc sibi hominem sic assenserunt, vt Schonouij ad Lechum in Batauiam esse contendant. Patrem certè habuit Parisiensem Leonesium Episcopum Regis apud Belgas id temporis legatum: cuius cura & studio puer admodum Lutetiam perductus est, vt apud suos in antiqua splendidâque Longoliorum familia liberaliter educaretur. Adolescens laudis cupidus veram illam, quæ ex optimis literis quæritur, gloriæ segetem avidissimè amplexus est. Ac primum quidem relicto foro, ad quod initio se comparauerat, incredibili Græcæ linguæ studio totus exarsit, rivalem in eius amore Budæum sibi statuens. Verùm vbi Græcas aliquot illius viri epistolas legisset cum ipsa vetustate planè conferendas abiecta spe victoriæ ad Latinam eloquentiam se transtulit, in qua breui tempore ne ipsis quidem Bembis & Sadoletis inferior factus

est. Eum tamen vt in sententiis exilem & in verbis minimè luculentum aspernantur Itali homines, qui parem in hoc laudis genere nulum ferre possunt. At profecto viuum tanti fecere, vt eloquentiæ nomine neque id postulantem Romanæ ciuitati adscriberent: reumque maiestatis ob sparsum in vulgus libellum, quo nominis Romani dignitatem grauiter violasse ferebatur, non absoluerent modò, verum etiam è Gallia, quo se receperat, propositis à Leone decimo ingentibus præmiis cupidissimè reuocarent. Ille autem hac procella quodammodo reiectus ac repulsus Alpibus quidem denuò traiectis remeauit in Italiam, sed omni repetendæ vrbis voluntate deposita Patauij se continuit. vbi post aliquot annos in cõtubernio Reginaldi Poli Regiæ stirpis Angli, quicum per illud tempus familiarissimè vixerat, ex rapidæ febris æstu, eodem quo ipse Pontifex anno, quatuor & triginta annorum iuuenis ereptus est. ea tranquillitate animi & constantia, qua hominem in literarum & sapientiæ studiis educatum decuit: cum in vltimis doloribus atque in ipso penè mortis articulo literas ad amicos daret propinqui obitûs sui tanquam alicuius profectiõis à se institutæ nuntias.

*Phillippus*

*Phillippus Cominius.*

**P**HILIPPVS COMINVS Belga splendo-  
 dido genere ortus cū attigisset  
 eam ætatem quæ labori militi-  
 tiæ sufferendo par esse videretur,  
 in aulam Philippi Burgundiæ Ducis ad Caro-  
 lum eius filium se contulit, eo ferè tempore,  
 quo Galliæ coniurati proceres, Boni publici  
 obtentu, Ludouico XI. Regi graue pericu-  
 losūque bellum intulere: Cui bello & ipse  
 sub signis Burgundicis armatus interfuit, &  
 Carolo dehinc à Philippi morte rerū potito  
 peregre in multis magni momēti nego-  
 tiis domi forisq̃ operā præstitit. Quam ho-  
 minis industriam, subodoratus Ludouicus (vt  
 erat virorum hac facultate præstantium dili-  
 gētissimus & sagacissimus indagator) nō prius  
 conquieuit, quā eum quibūvis conditioni-  
 bus pellectum ad suas partes attraheret, sibi-  
 que totum assereret. Factus itaque Cominius  
 Galliæ nouus ciuis, ductaque vxore Monso-  
 rellā nobili apud Andes loco nata, Ludouico  
 deinceps & Carolo eius filio perpetuus &  
 fidelis adhæsit comes, eorūque res bello ge-

stas, quarum & particeps fuerat, Angeli Cathi Pontificis Viennensis hortatu & impulsu describere aggressus, luculentam quatuor & triginta annorū historiam, magna quidem styli simplicitate, sed nec minori puritate, & quod in rerum scriptore summū est, singulari apud omnes fidei ac veritatis opinione insignem posteritati transmisit: adēd quidem faustis initiis, vt vix vllum haftenus Gallia tulerit in eo genere nobiliorem. Quo mihi verendum minusest, ne quis miretur aut improbet, quōd Belgam de re Francica tam bene meritum his Elogiis interserere, nostrorūque hominum numero adscribere in animum induxerim. Celsiore fuit staturā, vegetis mēbris, magnāque totius oris & vultūs dignitate cōspiciuus: nec eloquentia, prudentia, ceterisque virtutibus ad summas res tractandas idoneis vlli hominum ætate sua concessit. Eō maiore omniū admiratione, quōd vix vllō literarum præsidio fretus pænē sola naturæ bonitate niteretur. Non tamen interea tutum se aut immunem vir tantus à sæuo instabilis Fortunæ ioco vindicare potuit, cū ab occulta maleuolorū cōspiratione apud Regem in leuitatis & perfidiæ crimen adductus duram & iniquā tēterrimi carceris calamitatem, aliāque suis

meritis indigna diutissimè patèretur, nec ullus sui purgandi relinqueretur locus, patronis aduersariorum potentia deterritis, donec suam ipse causam in Senatu ageret, omnibusque Patrum sententiis honorificè tandem absolueretur. Oblit Argentoni Pictonum oppido, quod vxoriæ dotis nomine possidebat, anno Christianæ salutis ciro. 15. 1x. ætatis autem suæ quarto & sexagesimo, Lutetiàmque delatus & Augustiniana in æde ad Sequanam tumulto matmoreo à se condito sepultus est. vnica filia superstite Ioannà Renato Britanico Pentebriæ Comiti collocata, quo ex matrimonio multæ illustres in Gallia familiæ maternam originem hodièque ad Cominiùm ipsum referunt.

---

*Germanus Brixius.*

**G**ERMANVS BRIXIVS Altissiodori honesto loco natus & optimè institutus inter eos censerì meruit, qui primi ex Italia elegatiores Musas in Galliam traduxerunt. Nam & in Græcis præceptore vsus Marco Musuro Crèteuse, quem aliquot annos Patauij docentem audiit,

multa è Chryſoſtomo Latina puritate cōuer-  
tit, & à Thoma Moro Britannorum doctissi-  
mo in describenda vnus nauis Gallicę cum  
duabus Anglicis pugna versibus virulentis a-  
trocitei & improbè laceſſitus, ex illo certa-  
mine doctorum omnium iudicio facilè victor  
euasit. Non illustri quidem triumpho, cū  
ad poëtarū gloriā, qui tēpestare illa passim in  
Italia florebant, neuter adhuc satis accederet.  
At certè rem inchoasse, atque aliis perficien-  
dam tradiſſe non inglorium eſſe ducō. Legun-  
tur & Græci aliquot versus in amicorum fu-  
neribus ab illo decantati, cū præeunte Iano  
Lascare, quem hospitio frequēns excipiebat,  
Græcos poëtas omnes diligentissimè perlegis-  
set. Erat enim Brixius in omni vitæ cultu ci-  
uilis & splendidus, cuius ad liberales epulas  
docti omnes & elegātes illius ætatis viri non  
illibenter conuenirent. Sed inclinante iam  
ætate, postquam reprimi vitæ feruor cōceptus  
est, in atre bilis incommodum incidit. Qua in  
ægritudine suspicionum, terrorūque ple-  
nus miserabile senium exegit: eaque tandem  
infestius urgente, dū ab aula, quæ tum apud  
Blæsios agebat, Lutetiam reuertitur, in agro  
Carnutenſi extinctus est, eodem fere tempo-  
re quo Budæum, quicum illi ex studiorum



coniunctione non vulgaris amicitiae usus intercedebat, creptum quoque luxit Gallia.

---

*Ioannes Ruellius.*

**S** V E S S I O N V M vrbs Belgice quōdam florentissima Francorūque principum Regia non minimā his tēporibus nobilitatis accessionem sibi fecit edito in lucem Ioanne Ruellio tanto viro. Qui cū puer à natura felicissimè comparatus ad exactam vtriūsq; linguæ notitiam admirabili celeritate & (quod magis mireris) nullo docente peruenisset, Philosophiam ac Medicinam ex Græcorum fontibus abundè haustas Latinæ linguæ munditiis primus apud Gallos exornauit & illustrauit. Opus enim egregium in tres diuisum partes de natura stirpium accuratissimè cōscripsit, Dioscoridēque, Actuarium, & Constantini de agricultura libros tanta sermonis elegantia trāstulit, vt peculiari elogio Aquila interpretum à doctissimo Budæo subinde nuncuparetur. Sed & singulari eius ope ac industria factū est, vt Hippocrates, Galenus, Euclides, Celsus,

Plinius longè quàm antèa castigatiores & emendatiores à typographis excuderentur, cum in manuscriptis exemplaribus vndique conquirendis nulli sumptui parceret, vt eorum collatione diuinæ tot insignium virorum lucubrationes à fœdis imperitorum mendis purgari possent ac restitui. Flagrabat enim indefesso rei literariæ studio: cui quò liberius & commodius inseruiret, cum in aulæ comitatum à Francisco Rege & Lodoica eius matre identidem euocaretur, hanc rei augendæ occasionem facilè neglexit. elatâque demum vxore cælebs & solutus inter D. Virginis flamines, quorum in collegium à Poncherio Antiste allectus fuerat, quod reliquum vitæ fuit in suis deliciis & amoribus, hoc est in bonis literis auidissimè cōsumpsit. Nec generis propagandi spes eum interea deseruit, suscepta ex matrimonio filia, quæ & felici partu natū edidit auitæ gloriæ futurum hæredem Albertum Fabrum hodiéque superstitē & inter Medicos Parisienses ab eruditionis industriæque laude percelebrem. Sed Ruellius cum esset eo quadrati corporis & viuidi coloris habitu, qui longioris vitæ spem ostendere videretur, scalarem tamen ætatis annū LXIII excedere non potuit. Su-

blatus est apoplexia sub exitum Septembris  
anno crio. io. xxxvii. & in eiusdem sanctissi-  
mæ Virginis æde à mœrentibus collegis hu-  
mo conditus.

*Bellaij tres.*

**I**AM inde à Capeti Regis tempo-  
ribus, qui ante sexcentos annos  
rerum in Gallia potitus est, Bella-  
iorum gens & genere illustris &  
rerum gestarum magnitudine nobilis enituit;  
perpetuæque serie ad hanc ætatem deducta  
tres illos tandem protulit fratres omni virtu-  
te cumulatissimos, qui pari animorum con-  
tentione rem maximè omnium laudabilem  
perfecere, quam ne velle quidem ulli Gallo-  
rum antea in mentē venerat, ut armorum glo-  
riam cum literarum dignitate copularent. Et  
quidem Gulielmus natu maximus summum  
in utroque virum se gessit. Nam & aduersus  
infestissima Caroli Cæsaris arma Taurinensis  
prouinciæ præfecturam à Rege Frâncisco pri-  
mo sibi traditam gnauissimè sustinuit, multis  
præliis fortissimè cōfectis, multis oppidis fe-  
licissimè receptis: & præter varias legationes,

in quibus incomparabilis eius facundia emicuit, historiam de rebus Gallicis ab ipsa imperij origine ad sua usque tempora tum Latine tum Gallicè grauissimo stilo persecutus est. Cuius diuini operis exigua fragmenta Martinus frater iunior excellenti vir animo & solertia, Normaniæ regendæ præfectus, commentariis illis interseruit, quibus & ipse, dum aut à rebus bellicis aut à legationum laboribus vacaret, Francisci res gestas non minus ornatè quàm syncerè ac prudenter populari sermone perscripsit. At Ioanni, cuius elegans eruditio cum sæpe alias, tum maximè in frequentissimis Tridenti conuentibus, vel superata Patrum expectatione admirabilem sibi apud omnes peperit existimationem, animi etiam vis atque magnitudo non defuit. Vt qui asperrimis temporibus aduentante Cæsaris exercitu Parisiorum urbem, cuius Pontificatū gerebat, intrepidè tuendam suscepit, eiusque muros ingenti vallo, firmisque propugnaculis incredibili diligentia munierit: quæ & hodie non postremæ urbis præsidia censentur. Sublato dehinc è viuis Francisco, cui & pace & bello ab intimis consiliis fuerat, cum inuidorum artibus dispari apud successorem loco esset, Romam se recepit, vbi Cardinalium de-

eanatu insignis affecta iam ætate sub Francisci secundi aduentum vita functus est. Editis carminum tribus libris, in quibus non ingenij solum & doctrinæ, sed generosi etiam animi signa non obscura elucet.

---

*Baïsij pater & filius.*

**I**AZARVS BAÏSIVS ex antiqua stirpe apud Andes patre magni nominis Equite genitus maiorum gloriam bellica virtute partam pacis togæq; artibus feliciter adæquauit. Nam eius bono fato contigit, vt in tempora Francisci Regis incideret, principis Musarū amantissimi: qui vt erat ingeniorum æquus æstimator, hanc generosi hominis indolem in vmbra & otio delitescere non sustinuit. Immò & eū ad summas dignitates euexit, & in crebis ad Christianos principes legationibus eius fideli opera lubentissimè vsus est. Quo in honorum cursu florentem & ab editis de re vestiaria naualique commentariis apud literatos illustrem intempestiua mors oppressit. Relicto imberbi filio Iano Antonio in legatione Veneta ex liberali quadam puella nato: qui pa-

ternis vestigiis insistens bonas quoque artes ac præcipuè poëticen gnauiſſimè ſectatus eſt. Ita tamen vt cum verſus Latinos belliffimè pangeret, & in Græcis antiquitatem ipſam laceſſere videretur, ſemper tamen hæſerit in Gallicis, quos paulò frigidius & nullo penè ſpiritu canebat. Hoc autem imputari debet ingenti, quo ardebat, ornandæ patriæ deſiderio. cuius etiam vernaculum ſermonem tanti fecit, vt non cõtentus illis ſimiliter deſinentibus ſonis, quos hætenus noſtri homines coluerũt, experiri præterea voluerit, num ad veterum Græcorum & Latinorum numeros carmina Gallicè ſingi poſſent. rem profe-  
ctò pulcerrimam & omniũ applauſu digniſſimam, ſi ex ſe nõ ex inueterata hominum opinione penderetur. Cæterum fuit Ianus ob gratiſſimam conuictũs & morum facilitatem ſummè iucundus & amabilis, ſed in hoc patre inferior, quòd fortuna vſus eſt parum felici, neque ferè quicquam in bonis habuit, præter domũ & ſitu & cultu peramœnam, quam incoluit in Lutetiæ ſuburbiiis ab omnibus politiſ hominibus aſſiduè frequentatam: præſertim à Muſicis, cum eos ad nouum iſtud numerorum genus cmodulandum & fidibus aptandum cupidiffimè inuitaret, inſtituta in hũc

usum apud se Academia, cuius ad inuitatos concentus summi etiam principes animi gratia sæpenumero confluebant: donec Regius miles impetu in rebellem ciuitatem facto in ipsa suburbia irrupit, omniâque diripuit, cum ipse paucis ante diebus è vita sexagenarius excessisset.

---

*Petrus Danesius.*



**N**emo ex his, qui aureo Francisci primi sæculo bonis artibus in lucem reuocadis operam dedere, maiores utriusque linguæ facultates cumu-  
lauit, quàm Petrus Danesius claro inter suos loco Lutetiæ natus, & à summis præceptoribus Iano Lascare Gulielmoque Budæo non vulgariter instructus. Neque enim in illa doctorum penuria illustres adedò viri iuuenibus egregiis & magna de se pollicentibus pium docendi officium interim præstare grauabantur. Huic autem ut eruditio maxima, sic vita longissima fuit. Iam tum enim vige-  
bat, cum publici linguarum & scientiarum interpretes Lutetiæ primùm à Rege creati sunt: Quorum in numero & ipse aliquantisper fuit, perue-



nítque ad Henrici tertij tépora, nec ita multò post eius è Polonia reditù ereptus est. Cúmque totum illud tempus in optimis literis intentissimè colloçarit, neque præter aliquot legationes tum liberas tum Regum iussu de Reipubl. Christianæ rebus in Italia susceptas vlla vnquam oçcupatio institutù studiorum cursum retardarit, mirum est profectò nulla iam superesse tanti ingenij, tamque diuturni laboris monumenta. Quanquam & multa è Græco transtulisse, & præter epistolas, orationesque planè Latinas eruditissima in Aristotlem scholia conscripsisse dicitur: sed, vt verisimile est, ex eorum editione decus & existimationem querere non admodum laborauit vir doctrinæ fama satis nobilis, atque ab ipsa Italia meliorum ingeniorum altrice ob spectatam in celeberrimo Tridenti concilio facundiam ingenti cum admiratione prædicatus. Certè eius commendatio tanta fuit, vt ab Henrico secundo potissimùm eligeretur, qui Francisci filij Galliarum Delphini pueritiam regeret, literarumque præceptis informaret. Quo nomine honorificè in Regiam accitus & Vaurenfi Episcopatu insuper honestatus est, eique dignitati ad supremâ senectutem magno cum totius sacraei ordinis ornamento



presuit. Luretiæ raro tunc tum & in æde suburbana D. Germani, qui Pratenfis appellatur, tumulatum Gilbertus Genebrardus Hebraicę linguę professor more maiorum in concione laudauit.

*Tufanus & Vatablus.*

**D**EBENT hoc Iacobo Tufano Græcæ literæ, quodd cum à Francisci Regis temporibus magna semper celebritate in Gallia vigerint, qui eas coluere plerique omnes ex frequentissima illius schola prodire. Idemque contulit & sacræ linguę Franciscus Vatablus: cum hic ex Gamachio agri Picardi oppido, ille ex Cāpania Belgica Picardiæ proxima ortus esset. Neque porro ad cætera dissimilis eorum conditio fuit. Nam & eodem ferè tempore professores à Rege ambo nominati sunt, & cum omne vitæ tempus in erudienda iuuentute collocassent, vno eodemque die optimi & doctissimi ætate sua viri paucis ante Franciscum mensibus de vita decesserunt. Quorum alter collecto ex doctrinæ suę opibus locupletissimo Græcę linguę thesauro, alter sacris Bibliis

ex Hebraica fide longè castius quàm antea  
Latinè conuersis, nomen æternitatì consecra-  
uit suum.

---

*Petrus Gillius.*

**E** VIT hic ortu Heluius vtriùsq̃  
linguæ pariter & philosophiæ cõ-  
gnitione præstans, quem illè cuius  
hic toties incidit mentio literarum  
parens Franciscus primus, cùm Bibliothe-  
cam instruere cogitaret, in Græciam & Asiam  
legauit, vt Græcorum auctorum, qui nondum  
typis excusi essent, codicēs manuscriptos vn-  
dique cõquireret, in Galliàmque asporta-  
ret. Quæ tamen peregrinatio parum illi pro-  
sperè cessit : à Barbaris enim interceptus &  
in Africo litore durissimam carceris molestiã  
perpeßus, vix tandem Armeniaci Cardinalis  
munificentissimi cura & liberalitate redem-  
ptus euasit. Cuius benignitatis nō immemor  
Mæcenatem de se benemeritum Romæ tunc  
agētem adiit, eiùsq̃ demum iussu quicquid  
apud exteras nationes memoratu dignum  
obseruauerat, eo stylo perscribere aggressus  
est, qui non obscuram eruditionis & facun-

diæ laudem sibi polliceretur. Sed eius generis vnicum habemus de Bosphoro Thracio commentarium, præter Græcos aliquot scriptores Latinitate donatos. Cætera P. Belovnus è domesticis mortuo domino surripuisse, ac pro suis edidisse constantissimo rumore dictus est. Cùm docti omnes viri ab homine vix mediocriter literato præstari talia nequaquam posse facillima coniectura iudicarent. Perstitit in amore Cardinalis, & quem viuum benignè fouerat, mortuum Romæq; in D. Marcelli sepultum decorauit honore tumuli.

---

*Salmonius Macrinus.*



**I**N tanto eruditorum hominum prouectu, qui hoc ineunte seculo apud Gallos in omni genere literarum excelluerunt, mirum illud fuit, quòd nemo tum sit repertus, qui poëticen seriò attingeret, si Salmonium vnum excipias. Hic enim tam auspicaudè rem aggressus est, vt secundum Horatium princeps in lyricis meritò censeatur. Præsertim si ea spectes, quæ cecinit in primo facilioris ætatis

curſu: nam cætera, quæ prouectior ſubinde publicauit, neque adeò caſtigata ſunt, & in tantam multitudinem exereuere, vt iuuenili ſplêdori mole ſua non parum officiant. Natus eſt Iulioduni, quod oppidum nobis quoque natale in Piætonum Turonúmque & Andium finibus aëre ſalubri fœcundoq; ſolo poſitum à Iulio Cæſare conditore ſuo ſic appellatum maiores nobis tradiderunt. Cumq; ad futuram frugem præclariffima eius indoles à puero iam effloreſceret, ne ſpes illa præcideretur, à parentibus (quorum alioqui tenues erant fortune) in Pariſienſem academiã eo tempore miſſus eſt, cùm Iacobus Faber meliores omnes diſciplinã magna nominis celebritate profiteretur. A cuius educatione factus doctior Claudio Tendæ Comiti & Honorato eius fratri Renati Sabaudi filiis erudiendis continuò præfectus eſt: vnde primus illi patuit ad principis aulam aditus. Adhæſit inde Bellaiis fratribus liberaliſſimis Muſarum patronis: quos & reliquos item aulæ procereſ ipſumque Regem dum lyricorum ſuorum blanditiis demulcet ac demeretur, diu multumque celebris & gratioſus in aulæ comitatu floruit. Donec vitæ cœlibis pariter & aulicæ pertæſus vxorem duxit ciuē ſuam

suam splendido loco puellam : cuius pios & cōcessos amores insigni pudoris exemplo decantauit, mortuamque suis & amicorum verbis æternæ posteritatis memoriæ commendauit. susceptis ex ea vtriúsque sexus liberis, quorum natus maximus Charilaus, patre non inferior, illustrissimę principi Catharinę Bononiæ Regis sorori præceptor datus Lutetiæ in ipso ætatis flore vnâ cum Admiratio cæsus est: cum Salmonius pater anno cio. io. lvii. domi suę senio planè confectus occidisset.

*Franciscus Rabelæsus.*

**F**RANCISCVS RABELÆSVS è Chinone (Turonum id est oppidum propè Ligeris & Vigennæ cōfluentem) inter D. Francisci cucullatos in Pictonibus primùm educatus est. Sed impulsu quorundam procerum, qui vrbanius dicacitate plurimum oblectabantur, monasterij claustra iuuenis transiliit, demùmque in ridēdis hominum actionibus totus fuit. Cùm enim pro ea qua pollebat linguarum & medicinæ scientia multa grauitè & eruditè posset scribere, quod & Hippocra-

tis aphorismi ab illo casta fide traducti, & aliquot epistolæ nitido stylo conscriptæ satis indicant, Lucianum tamen amulari maluit ad cuius exemplū ea sermone patrio finxit, quæ meræ quidē nugæ sunt, sed eiusmodi tamen sunt ut lectorem quamlibet eruditum capiāt & incredibili quadam voluptate perfundant. Neque solum erat in scribendo salis & facetiarum plenus, verum & eandem iocandi libertatem apud quemlibet & in omni sermone retinebat; adeo ut Romam cum Io. Belαιο Cardinale profectus & in Pauli III. conspectum venire iussus ne ipsi quidem Pontifici maximo pepercerit. Atque hanc intemperantiæ suæ causam ingeniosè prætexebat, quod cum sanitati, conseruandæ nihil magis officiat quàm mœror & egrimonia, prudētis Medici partes sint non minus in mentibus hominū exhilarādis, quàm in corporibus curandis laborare. Mortuus est apud Medoniū vicum agri Parisiensis ad quartum ab vrbe lapidem, vbi tenue sacerdotium Cardinalis beneficio possidebat.

*Clemens Marotus.*

**N**E c te tacebō, Clemens Marotē;  
 quem Cadurcum genuit & Francis  
 Regis aula tātis per in delitiis  
 habuit, donec non admodum gra-  
 ui de causa in exiliū expulsus es. Quanquam  
 equidem vereor vt absurdum videatur inter  
 literatos illum collocare, cui defuerūt literæ.  
 Quę si adfuissent, vix vllus erat futurus poëta  
 melior. fuisti enim à natura felicissimus. Hoc  
 certè Galliæ præstitisti, quòd cum illius tem-  
 poris scriptores sermone vterentur tam im-  
 puro, vt nec intelligi possent, primus in me-  
 liorem aptè & dilucidè loquendi viā ingressus  
 es. Fortasse in hoc etiam nimis poëta, quod  
 Fortunæ huic hominū generi peculiari qua-  
 dam inuidia semper infestæ sæuitiam tu quo-  
 que tuo damno expertus es; Cū extorris &  
 rerum egenus Taurini apud Insubres procul  
 à tuorum aspectu decesseris, eo ipso anno,  
 quo ad Ceresolam illius agri oppidum Regius  
 exercitus Anguiano duce insignem de Cæsar-  
 tianis victoriam reportauit.

*Joannes Dampetrus.*

**H**ic secundus à Macrino cœpit hominibus Italis Latini carminis gloriam non inuidere. Nam in hendecasyllabis, quorum aliquot per manus politiorum circumferuntur, Macrino ipso mollior ad Catullum proximè accedit. Ortus erat è Blæsiis ad Ligerim amœno cœlo, cuius benigna temperie singularem ingenij vbertatem sortitus non quidem in sola carminis pãgendi facultate consistebat, sed per omnia doctrinarum spatia liberiore cursu ferebatur: ita tamen vt Iuris & legum disciplinæ præcipuè incumberet; Ac huius quidem facultatibus abundè comparatis inter celebriores magni Consilij patronos eminere iam cœperat, cum mutato repentè consilio tanquam ingenuæ libertatis pertæsus Franciscanæ sectæ se ad-dixit vir cæteróqui elegãs & ab omni morum austeritate alienus: piúmque illud studium, quod in fortunis hominum tuendis impendere solebat, non minori facundiæ dignitate ad Christianas mentes in Religionis officio retinendas adhibuit. Cæterùm & hoc in eius-



modi fortuna minimè contemnendum illi obtigit, vt à sui ordinis hominibus cœnobio Vestaliũ Aureliæ proximo præficeretur. Ibi enim animo soluto & vacuo inter candidos virginum greges, blandaque Musarum otia iucundam vitam & sanæ mentis hominibus inuidendam placidissimè transegit. vsus interea doctorum hominum, qui urbem illam incolebant, familiaritate & alloquiis, ac præsertim Germani Audeberti, viri cum primis docti & pij, qui vt est omnis elegantia amantissimus, vnus maximè fecit ne ab eius morte relictæ carmina omnino sepulta in tenebris laterent.

---

*MARGARETA VALESIA*  
*Navarraeorum Regina.*



VIT hoc faustum & felix omen Gallia, quod inter fecunda tot ingenia, quæ ad patriæ linguæ decus illustrandum, cæterasque politiores artes apud nos primùm erigendas & commouendas operam industriamque suam contulere, princeps fœmina, potentissimi Re-

gis foror, Regina & ipsa Margareta locum tenuit. Illa enim tam insigni natalium & fortunæ splendori aliquid etiam addi posse iudicauit, si æternis literarum monumentis, quæ plurima & præclarissima conscripsit, nominis sui memoriam posteritati consecratam relinqueret: vel eò præcipuè quòd ab aulicis vanitatibus & solita vatium lasciuiâ multùm abhorrens in sacris Musarum tractandis, vt in omni actione, dignam tali Principe verecundiam castè religioseque seruauerit eaque demum tractauerit argumenta, quæ ad pietatem & mores hominum formandos cōducere maximè censerentur. Quod & ipso vitæ exemplo sic præstabat, sic admirabili concentu virtutes in se omnes temperabat, difficile vt fuerit statuere quid primum summum ve debeat in tam excellenti ac diuina prorsus Heroïna prædicari. Hoc certè habebat eximium quod omnes aut rerum inopes aut aliqua fortis acerbitate oppressos pia verèq; Christiana benignitate sustentaret, viròsque literarum & virtutis opinione celebres tum per se ipsa, tum ex Francisci fratris liberalitate curaret exornandos, omnique opum & honorum accessione adaugendos. Nupsit pene adhuc impubes Carolo Alenconiorum Duci, Valefiæ

stirpis Heroi. Quo sine liberis vita functo  
 cum iterum esset Hérico Albretio Regi Na-  
 uarræ collocata, filiam ei peperit Ioannam  
 Antonio Borbonio Vindocinorum Principi  
 nupturam. ut scilicet ex eorum auspiciissi-  
 mo coniugio nasceretur felicissimus ille re-  
 bellium domitor HENRICVS quartus, quo  
 tam glorioso & inclito nepote habent æter-  
 numque habebunt augustæ Reginae beati  
 manes vnde supra humanæ laudis fastigium  
 iure ac merito superbiant. Vixit annos quin-  
 quaginta nouem fatóque functa est Odosij  
 Tarbellorum anno supra sesquimillesimum  
 quadragesimo nono.

IN EIVSDEM REGINÆ OBITVM, EX  
 Epigrammatis Caroli Sammarthani.

**M**argaridi vocem morbus præcluserat: vllum  
 Nec verbum emisit tres moribunda dies.  
 Proxima sed morti, ter conclamauit IESVS:  
 Deinde animam summo reddidit ipsa Ioui.  
 Tres Charites flerunt: ter tres fleuere Sorores:  
 Ingemuit mundi pars, doluitque triplex.  
 Nempe ostendebat (quo non perfectior vllus  
 Est numerus) perfectam occubuisse, Trias.

*Gulielmus Pellicerius.*

LORENTE bonis literis Italia, Frāciscus primus, qui & huius pulcherrimæ laudis emulatione flagrans ingenia suæ gentis ostētare cupiebat, Oratorē ad Venetos legauit hunc meritò Pellicerium, quo doctiorē illa ætas, aut qui non Italorum modò, sed omnium cuiusvis nationis hominum luminibus officere melius posset, habebat profectò neminem. Quisque hac celebri legatione tantò præclarius & maiore cum Galliæ splendore perfunctus est, quòd præter infinitam illam exquisitæ doctrinæ copiam, qua doctissimos Italiæ homines in sui admirationem adducebat, tanta insuper exciperet eos tum humanitate, tum etiam benignitate vt munifici cuiusdam patroni loco à compluribus haberetur. Nec defuere tam egregiæ virtuti sua præmia. Pellicerius enim perbenigno vsus Principe & in sacro eius consistorio sedere meruit, & Monspeliensi Pontificatu, cuius in diœcesi natus erat, aliisque præterea sacerdotiis liberaliter honestatus est.

Non tamen eo rerum prouentu planè felix, bacchante nimirum & incitata more suo in rarum & præstantem virum inuidia, vt à syco-phantis obiecta criminatione, quasi seueram cœlibatûs legem non satis pro sacriati ordinis dignitate obseruaret, in summo fortunarum & famæ periculo diu multûmque versaretur, donec cæcos calumniæ dolos opportuna vitæ innocentia superaret. Qua ex contumelia concepto ingenti nec inani totius aulæ fastidio abdidit se in Monspeliensem illum secessum, vbi liber solutûsque in dulci & optato Musarum sinu placidè ac lubenter acquieuit. cùm in hunc vsum bibliothecam haberet locupletissimam, innumerisq; veterum manuscriptis & alijs omnium generum codicibus vndique cõquisitis adornatam. At huius quidem otij testes æterni erant futuri cum alij complures vtriûsque linguæ auctores fideliter emendati, multoque passim lumine illustrati, tum ipse ante omnes Plinius, quo in castigando & explicâdo Naturam omnem euoluera, aditûmque ad perfectam eius cognitionem studiosis hominibus incredibili cum sudore & industria munierat. Sed quod plerûmque his accidit qui sua dum viuunt ipsi edere negligunt, hæc ferè omnia simul cum

auctore suo periêre. Vixit ad exactam ætatem, contabuitq; miserabilis demum senex inter frequentes & acerbissimos cruciatus, erosus lentò & insanabili vulnere præcordiis, incertum errore an culpa pharmacopole certè pessimi, qui catapotia quædam ex malè trita colochyntide sumenda ægrotanti obtulit. Multùm indignantibus Medicis, quod quæ salubriter & cautè præscripserant, ea tam infelici casu in amici Præsulis perniciem verterêtur.

*Iacobus Lodoicus Strebaeus.*



**H**ic supra philosophiæ studium Latina maximè facundia pollens primus ferè inter eos, qui Lutetiæ docebât, inusitatam atque ad illa tēpora turpissimè neglectam purè ornatēque loquendi rationem non induxit modò, sed edito etiam de electione & oratoria collocazione verborum opere eximio cæteris, quo facilius & commodius eò peruenirent, iter ipse aperuit atque indicauit. Exindēque suscepto Aristotelis transferendi labore, cùm Politica, Oeconomica, Ethica eo Latinitatis & fidei candore conuertisset, qu;

emulos omnes, atque adeo Perionium ipsum in eadem opera celeberrimè versantem facile posset à scribendo deterrere, vltèrius progredi, quòdque habebat in animo, totum illum Philosophiæ parentem in Latium importare ac traducere vetitus est. Vrgente scilicet rei familiaris angustia, quæ à dulci literarum otio subinde auocabat, aliòque nec volentem abducebat. Ortus enim ex humili familia Remensis agri, sed excelsò animo & ab omni rei faciendæ cura impensius abhorrente, agnouit serò ad Virtutis decus tuèdum necessaria esse Fortunæ subsidia, dum ad pèdagogicum munus identidè redire, vel apud nobiliores Lutetiæ typographos mendis operarũ corrigendis inops ac debile seniũ subleuare cogeretur, magnòq; huius seculi probro vir tantus in ea fortis malignitate vitam finiret.

---


*Franciscus Connanus.*

**F**RANCISCVS CONNANVS relictis Barbarorum vestigiis, Alciato duce, nouam & salubriorem ingressus ornandæ Iurisprudentiæ viam statuerat opus efficere sanè egregium & ex-

cellens, quod nec ipsi præstiteret veteres Iurif-  
consulti nec Cæsares, vt variam, infinitam-  
que & confusam æqui bonique scientiam ap-  
ta quadam differendi ratione ordinaret ac di-  
gereret, certamque Iuris artem constitueret.  
Nec ei necessaria deerant ad negotium istud  
probè conficiendum ingenij fortunæque præ-  
sidia & instrumenta. sed gracilis corpusculi  
vires nequaquam pares generosa gloriæ cu-  
piditate ardentem, sibi que minus prospicien-  
tem in medio studiorum cursu defecere. Vix  
enim tertium & quadragesimum ætatis an-  
num implevit. Conscriptis intererea Com-  
mentariorum de Iure ciuili quatuor libris  
eruditione simul & facundia refertis, qui post  
acerbum eius interitum à familiaribus collecti  
& in vulgus emissi vt maximam auctori suo  
conciliauere laudis & claritatis occasionem,  
sic immortale omnibus eruditis pulcherrimi  
operis ab eo instituti nec perfecti desiderium  
reliquere. Obijt libellorum præfectura insi-  
gnis, Lutetiæque genitali vrbe in D. Oppor-  
tunæ fano tumultatus est, paulò ante quàm  
Henricus II. armata manu in Germania fi-  
nes irrumpeus Germanicos proceres Cæsaris  
potentia oppressos in libertatem vindicaret.



*Mellinus Sangelasius.*

 ANGELASIORVM gens apud Pi-  
ctones vt. antiqua nobilitate, sic  
militari laude celebris ne penitus  
à Musarum sacris aliena fuisse vi-  
deretur, duos earum mystas edidit minimè  
contemnendos, Octauium patrem, qui Rege  
Ludouico duodecimo inulta bellè satis ac ele-  
ganter, vt illis temporibus, ex Homero, Ma-  
rone & Ouidio Gallica fecit, & Mellinum  
docto parente filium longè doctiorem longè-  
que facundiorum. Quippe qui plures annos  
Patauij Bononiæque educatus simul cum Ita-  
lico cœlo eam scribendi facultatē hausit, quæ  
à vulgi consuetudine paulò remotior antiquū  
illum Græci Romaniq̃ue styli nitorem subo-  
lere quodammodo & sermone patrio referre  
videretur: eoque magis, quòd & Matheseos  
& omnis Philosophiæ præceptis informatus,  
earum quoque opibus scripta interim honè-  
staret ac locupletaret sua. Sed quantò fuerat  
Maroto superior, tantò postea Ronfardo in-  
ferior fuit. Cuius ad exorientis fulgorem per-  
cussus ac deterritus mutauit repètè institutū,

relictâque Gallica poësi, qua tot annos in Regum aula floruerat, Latinam longo tempore intermissam eo studio & ardore animi repetiit, vt ab ea ne moriens quidem abstineret. Extant enim lepidissimi versus ab illo pronunciati dum animam ipsam ageret, quos & suis versibus pari lepore ad eius tumulum decantatis cæteri Galliæ vates exceperunt: ipseque ante alios Ronfardus veteris iniuriæ immemor, quam à Sangelasio nec meritis acceperat, dum ille apud proceres & illustriores aulæ feminas præiudicata eruditionis opinione potens iuueniles Ronfardi ausus non satis amicè notaret, expungeretque. Mellini autem morientis versus hi sunt,

**B** *Arbite, qui varios lenisti pectoris æstus;  
Dum iuuenem nunc Sors, nunc agitabat Amor;  
Perfice àd extremum, rapidaq; incendia febris,  
Quà potes, infirmo fac leuiora seni.  
Certè ego te faciam superas euectus ad oras  
Insignem ad cytharæ sidus habere locum.*

Fato functus est imperante Gallis Henrico secundo, circiter annum vitæ sexagesimum septimum, & Lutetiæ in D. Thomæ ad Luparam sepultus.

*Iacobus Siluius.*

**I**acobus Siluius Ambianus Medicinam deſis Arabum tenebris circumfuſam & obſitam ſplendori & nitore ſuo primus reſtituit, eiufq; ſtudio ad Hippocratis, Galeni, cæterorumque Græcorum normam atque diſciplinam æterna ingenij & indiſtriæ commendatione direxit. Neque diſſimili claritate Anatomiam ex ipſius Galeni doctrina profeſſus, quod à nemine adhuc præſtitum fuerat, ſingulis humani corporis partibus etiam minimis ſua nomina & appellationes apte admodum & ingenioſe repertas indidit atq; impoſuit. Sed in hoc illi ſua diligentia quodammodo fuit fraudi, quòd cùm magiſtro ſuo Galeno proſum addiſtus nuſquam ab eius ſententia vel minimùm diſcederet, æmulum in hoc negotio naſtus eſt Veſalium, qui liberioſe ingenio exactam rei veritatem ſecutus aliquantò ſplendidiuſ hanc medicinæ partem explicare viſus eſt. Vixit autem Siluius liber & cælebs, ætatîſque annum tertium & ſexageſimum impleuit: cùm tamen

à promissa capillorum canitie venerabilis multò grandioris æui speciem præ se ferret. Neque à tanti Medici præstantia videbatur alienum longiorem sibi vitæ vsuram polliceri. Sed quantum ad eam spem conferebat diuinæ artis industria, tantum immodicæ demebant vigiliæ, dum sibi non temperat assiduo docendi labore perfunctus; non solum publicè in suggestu Regio, sed etiam priuatim in suis ædibus, collatitia mercede paulò fordidiùs exacta. Quæ res ei non leuem inusfit auaritiæ notam. Neque inter funeris exequias defuerunt ex auditorum numero qui hosce Buchanani iocosos in eum versiculos ipsis templi valuis affigerent

*Siluius hic situs est, gratis qui nil dedit vnquam,  
Mortuus & gratis quòd legis ista dolet.*

Frementibus reliquis & multum indignantibus præceptoris benemeriti quietos manes ab ingratis discipulis tam impiè turbari. Elatus est anno reparatæ salutis c15. 15. LV. & Lutetiæ in cœmeterio Scholasticorum, vt testamento iusserat, sepultus.

*Orontius*

## *Orontius Finaus.*



V M renascentes in Gallia Musas pro se quisque proueheret, Orontius Finaus in Briāsonio Delphinatum oppido patre Medico genitus à Francisco Rege lectus est, qui Mathematicas artes Lutetiæ profiteretur, quarum usu & peritia nemini etate sua cedebat: cum operosum docendi munus pari scribendi labore indefessè alternaret: atque inter cætera volumina peculiari quodam libro quadraturam illam circuli à multis frustra quæsitam se tandem aliquando reperisse gloriaretur. Hoc enim de se facile credebatur homo summæ doctrinæ sibi conscius: cum tamen veram huius admirabilis inuenti gloriam vni Iosepho Scaligero faciliora numina reseruarent. Sed & omnes totius orbis tabulas atque infinita tum illius disciplinæ tum aliarum artium organa sua ipse manu quotidie conficiebat. Quorum nouitate impulsæ Procures, Senatores & exterarum gentium Legati ad illius edes vltro ventitabant, nec ullus erat qui non peritior inde recederet. Quibus in studiis cum triginta ferè annos se-

licissimè transegisset, tandem anno supra sex-  
 quimillesimum quinquagesimo quinto prid.  
 Non. Octobr. hora à meridie quarta, qua in  
 lucem venerat, sexagenario paulò maior de  
 vita decessit.

### *Joachimus Perionius.*



Atus est Perionius ad Corme-  
 riacum agri Turonensis op-  
 pidulum opulento Benedicti-  
 norum monasterio nobile, cui  
 à prima statim pueritia pro lo-  
 ci opportunitate dicatus est.

Vt mirum videri possit ex illa educatione à  
 politioribus Musis vt plurimum aliena homi-  
 nem adeò disertum emergere potuisse. Mul-  
 ta enim ex Platone & Aristotele transtulit  
 Ciceroniano planè stylo. Quod cum majori  
 eloquentiæ quàm fidei laude præstitisset, in-  
 currit in censorem Gruchium, qui versiones  
 illas pluribus in locis à se correctas & emen-  
 datas magna philosophantium approbatione  
 reposuit. Hic est ille Gruchius, quem inita  
 cum Sigonio & libris agitata de Romano-  
 rum comitiis disputatio non parum apud

eruditos nobilitauit. Strebæus autem generosior æmulus non quidem in locis aliquot animaduertendis, sed in ijs ipsis libris aliquantò seueriori castitate, nec minori elegantia conuertendis egregiam nauauit operam; Integra tamen Perionij existimatione ex tot politissimis lucubrationibus collecta, & per orbem lōgè latèque disseminata. Quam etiam Franciscus ex fratre nepos aliquantum postea propagauit, edito patruī de Romanorum Græcorumq; magistratibus opusculo posthumo: ex quo patuit in illo homine super eximium facundiæ nitorem non minimam quoque rerum antiquarum fuisse notitiam. Scripsit, & veterum Patrum vitas, susceptaque ex Academiæ decreto aduersus P. Ramum Aristotelis & Ciceronis defensione præclarissimè stylum exercuit. Nec patriæ interim oblitus Gallici sermonis originem & cum Græco affinitatem dialogis aliquot Latinè scriptis non incommodè complexus est. His vigiliis notissimus senex paulò ante Henrici secundi necem in illo suo cœnobio de vita migravit, atque à monachis cōuictoribus in eiusdem sacra cella, cui tot annos assueuerat, supremo sodalitatis officio tumultus.

*Petrus Castellanus.*

**E**ST verò quòd Petri Castellani Lingonensis eloquentissimi viri beatos manes honorifica recordatione prosequamur. Qui cū apud maximum Regem gratia & auctoritate plurimum valeret, hac sortis benignitate non ad sua ipsius commoda sed ad communem Reipublicæ vtilitatem vsus est. Hoc enim potissimum suatore Franciscus primus, qui quotidie illum de literis differentem libentissime audiebat, celebre illud professorū collegium Lutetiæ fouit atque auxit, quod optimarum artium in Gallia seminarium extitisse nemo est qui nesciat. Quid igitur magis æquum est, quàm eius, qui Musas instaurauit, nomen grata Musarum cōmemoratione vigete sempiternum: vel eò magis, quòd pium istud mortales iuuandi studium ne in ipsa quidem morte omisit. cū Aureliæ (cuius Pontificatum Matisconense abdicato susceperat) inter concionandum repentino sanguinis ictu perculsus animam de grege suo benemeritam Deo reddiderit.



*Joannes Fernelius.*

**A**Mbianus ager, vnde Siluius & eius præceptor Tagautius prodire, tertium quoque Medicinæ lumen & quidem ceteris limpidius nobis extulit Ioannem Fernelium virum singularem ac planè diuinum. Cuius admirabili Genio id cōtigit, quod à multis seculis nulli quamlibet erudito contigisse memini, vt ipso viuō atque vidente opera quæ de vniuersa Medicina scripsit in scholis publicè legerentur: eiúsque auctoritas veterum scriptorum instar apud optimum quemque rei medicæ magistrum grauissimi esset ponderis & momenti. Neque sanè iniuria: fuit enim in illo viro præter summum eloquentiæ candorem non solùm Medicinæ, sed & Mathematicarum artium vniuersæque Naturæ tanta vis tantaque cognitio, vt prodigij cuiusdam id fuerit simile. Neque verò fuit hoc minus mirādum quòd & eius virtuti Fortuna ipsa bonis vt plurimum iniqua non defuit. nam & Luteitiæ sanandis ægris operam præbēs rem egregiè fecit, & ab Henrico secūdo in Regiam accersitus principem inter eius Archiatros lo-

cum tenuit. Eo felicitis operæ prouentu, ut quod à Natura negatum esse videbatur artis beneficio consecutus inuisam sterilitatem à domo Regia repelleret, Valesiumque nomen optata generosæ prolis accessione propagandum curaret. Perit ex mœrore, quem carissimæ vxoris importuna mors, ægro inualidóq; seni attulit, vi. Kal. Maias illius anni, quem poëta Medicinæ studiosus non insulsè notauit his numeris.

*ConlVge FerneLV's rapta perCVLſvs Vt aVLæ  
Vt LVCLs ſatVr Vt noMlnls Interllt.*

### *Iulius Cæſar Scaliger.*

**H**Vnc etiam inter noſtrates locum ſibi iure vendicat Iulius ille Cæſar antiquiſſimæ Scaligerorum familiæ rediuium & immortale decus, ad cuius hominis immēſam gloriam cū vna regio non ſufficeret, ideo ſuperis placuit in varias eam nationes ita partiri ac diuidere, ut eius ortum Itali, educationem Germani, fortunarum ſedem ac poſtrēmò tumulum Galli ſibi arrogarent. Fuit enim eo ſanguinis illu-

strissimi splēdore, qui regias omnes Christiani orbis familias nō obscura propinquitate con-tingeret: ea Martij spiritus vi & magnitudine, vt in Italia dum adolescens Maximiliano Cæsari educatori & propinquo suo militat, mox-que vir factus in Gallici nominis hostes arma cōuertit, omnes illius ætatis nobiliores duces non modò admirabili artuum agilitate & robore, sed & militari prudentia vel equaret, vel etiam anteiret: ea denique præcellentis ingenij velocitate, captuque penè incredibili, vt omnes omnium generum disciplinas, quan-quā serius ad hæc studia se applicuisset, complecteretur tamen & perfectè calleret, ac profectò principatum in literis etate sua teneret. His accedebat eximia quædam oris & staturæ dignitas, quæ generosam illam planeq; heroicam Scaligeræ stirpis indolem in eo quoq; vigere, nec penitus cum auito Veronæ imperio concidisse præclarissimè testaretur. Vt mirum esse nō debeat, si tantus vir à Francisco Rege exceptus, & Gallica ciuitate libenter donatus est. Non minore tamen ipsius Galliæ ornamento, quàm suo. Quis enim eius adoptione & consortio non gloriatur, quem in vnum Dij superi sua bona omnia tam cumulatè ac largiter contulerint atq; congesserint? Sed fuit hoc

magnanimi Regis amplitudine minimè dignum, quèd benignus alioqui princeps hunc tam rari exèpli, tantæque præstantiæ nouum ciuem, quem & fortunis & honoribus augere ac amplificare debuerat, ne leuiter quidem adiuuandum vlla in re susceperit. Ille autem adiuncta sibi vxore claro loco femina, cuius dotalis hæreditas vel splendide & liberaliter viuenti satis esset, hunc insanientis Fortunæ ludum facile despexit, Agennique ad Garumnam, vbi fortè cōfederat, omne deinceps vite tempus in optimis literis & perpetua sapientiæ peruestigatione consumpsit; Medicinam interea faciens, & multa quotidie meditans, multa scribens rare & incomparabilis doctrinæ volumina: quæ tamen, si pauca tantum excipias, bellorum ciuiliū iniuria periire. Vixit ad annum salutis millesimum quingentesimum quinquagesimum octauum, ætatis autem suæ quintum & septuagesimum, genuitque hoc in otio multos liberos laudandis omnes artibus & insita virtute nobiles. Tèq; imprimis ô Iosephe numeris omnibus lōgè doctissime patrique simillime, cuius ego in gratiā hoc quicquid est elogij meditabar, breue illud quidē & exiguum, sed futurū fortasse ali quod apud posteros mutuæ nostræ charitatis ac ben euolentiæ monumentum.

*Petrus Bunellus.*

ETRVN BVNELLVM Tholosæ  
 Normano patre natum com-  
 mendabant Christiani mores  
 cum summa eruditione con-  
 iuncti, eximiumq; imprimis,  
 neque cum vlllo communica-  
 tum Ciceronianæ facundiæ decus, quo dum  
 Venetiis apud Legatos regios ageret, Italica  
 ingenia sic cepit, vt Manutius eorum diser-  
 tissimus fateretur, se rectam Latine scribendi  
 rationem à Bunello didicisse. Quod mirari  
 desinēt, qui epistolas ab illo scriptas legerint:  
 nihil enim cultius aut politius fingi potest.  
 Has autem veluti naufragij reliquias collegit  
 & in lucem emisit Carolus Stephanus de li-  
 teris benemeritus, cū Bunellus ipse in Ita-  
 liam iterum proficiscens & Fabros adoles-  
 centes ingenuos totique Galliæ maximo post  
 ornamēto futuros ad capeſſenda legum stu-  
 dia secum deducens Taurini lethali febre de-  
 prehensus anno ætatis quadragesimo septi-  
 mo expiraſſet,

*Andreas Tiraquellus.*

**F**ONTE Naiadum (sic enim Fontenaium agri Pictauiensis urbem sibi natalem eruditissimus noster Rapinus ingeniosè, vt omnia, Latinam fecit.) claris parentibus ortus est Andreas Tiraquellus, quem hominem vndecunque ad immortalitatem fuisse natum diceret; cum & numerosam sobolem ex honesta vxore suscepit, quæ genus propagaret, & ingentem librorum numerum ediderit, qui nomen æternitati consecrarent. In quo mirum adeò illud fuit, quod vir grauissimus & in studiis forensibus assiduè occupatus tantum otij nancisci potuerit, vt tot lucubrationes non Iuris modò scientia, sed omni disciplinarum genere refertissimas meditari non desineret. Primùm enim apud suos Præturam exercuit, indèque præstantis eruditionis famâ in Senatum Burdigalensem, continuò in Parisiensem à Rege allectus hoc munere sanè laborioso ad extremam vsque senectutem perfunctus est, scribendi labore nunquam in-

terea remisso. Vnde operosa illa tum de Re-  
tractu tum de Nobilitate volumina, item-  
que de legibus connubialibus & alia quam-  
plurima in lucem exierunt immortalitate  
dignissima: quæ vir amplissimus Michaël  
Hospitalius eius id temporis collega perele-  
ganti poemate commendauit. Hæc autem  
indefessa corporis ingenique fecunditas ex  
eo maximè oriebatur, quòd siue ita esset à  
natura comparatus, siue à literarum studiis  
institutus, animo semper placido & sereno  
tranquillitatem quandam ac benignam velu-  
ti temperiem in omni vita constantissimè re-  
tineret, neque temerè aut ira aut quauis alia  
grauiori perturbatione videretur commo-  
ueri. Vnde & illi vitæ lóginquitas ac beatitas  
ea contigit, cuius beneficio natos quoque  
vestigia sua ingressos, publicisque muneribus  
honoratè fungentes ante obitum ipse con-  
spiceret. Obiit enim planè senex haud mul-  
tò ante quàm inter Henricum secundum &  
Philippum Hispaniæ Regem pòst varias bel-  
lorum offensiones de pace tandem per vtrius-  
que legatos ageretur.

*Æmarius Ranconetus.*

**A**Emarium Ranconetum præstantis ingenij virum & Iurisconsulti Criticique laudem pari studiorum felicitate consecutum Aquitaniæ inuidit Lutetia, sibi que totū asseruit. Is enim Burdegalæ Senatu posthabito in Parisiensem venit, vbi Consiliarij primū, deinde Præfidis æquissimi scientissimique partes impleuit. Eò maiori nominis claritudine, quòd in eo certatim elucerent hinc senatoria purpura illinc politiorum literarum splendor. Sed hæc omnia fati malignitas obscurauit. Nam & inter reos delatus & maleuolorum coniuratione in extremum capitis fortunarūque discrimen vocatus est: neque illi festina mors purgandi sui locum reliquit. Qua calamitate domus tanti viri perculsa non opum modò iacturam fecit, sed earum etiam rerum quæ nullo precio parari possunt ac restitui. Nam quæcunque aut collegerat, aut in veterum auctorum difficiliores locos adnotauerat



magno rei literariæ detrimento perierunt Adnotauerat autem plurima, primusque nouam & insolentem scrutandæ antiquitatis viam studiosis aperuerat. Quod & suis passim lucubrationibus eruditi omnes illius temporis viri honesta grati animi significatione testatum voluerunt. In quibus fuere Iacobus Lodoicus Strebæus, Adrianus Turnebus, Iacobus Cuiacius, Franciscus Hotomanus, &, qui legis Falcidiæ restitutionem illi acceptam tulit, Frâciscus Duarenus. Cùm mirarentur omnes hominem à studiorum laboribus, vt quidem videbatur, abhorrentem neque vnquam in literarum otio deprehensum inaudita quadam & stupenda naturæ bonitate id assequi, quod nec aliis vigiliæ in somnes multorumque annorum industria compararet. Perijt senex meliore fortuna dignus ex impotenti dolore animi vincula & carcerem indignantis. Cui vita functo Renatus Faber auunculus meus ex Senatorum ordine in Præsidis dignitatem successit, cùm annus esset eius seculi quinquagesimus nonus.

*Franciscus Duarenus, &  
Eguinarius Baro.*



Rimus Gallorum Franciscus Duarenus è Brioci fanò ad Armoricum Oceanum genere nobili ortus explosis Barbarorum glossæmatis puros & limpidos veterum Iurisconsultorũ fontes iuuentuti aperuit : tum viua voce, dũ apud Biturigas magno nationũ omnium cõcursu profiteretur, tũ scriptis quibus etiamnum sibi ipsi superstes immortalis eruditionis & eloquentiæ laude commendatur. Hauserat enim à Budęi familiaritate paucis adhuc vñtatam Romanæ antiquitatis & Græcæ linguę notitiam, cùm eius liberis ipse vicissim ciuile ius adolescens interpretaretur. Totũq; triennium in suprema Lutetiæ curia versatus quæsitam in vñbra & otio Iurisprudentiam vsu & exercitatione forensi abundè confirmauerat. Quibus præfidiis ornatus ad publicam eius professionem accedebat longè paratior & instructor. Fuit acerrimo quidem iudicio,

sed memoria minus felici, neque vnquam nisi ex scripto prælegebat: eoque factum est, vt in Germanico itinere, cum à celebribus passim Academiis honoris causa, vt ferè fit, ad prælegendum inuitaretur, nec earum continuò votis & precibus obsequeretur, à nonnullis rerum imperitis & iniquè iudicantibus habitus sit indoctior. Sed hoc inane vulgi de tanto viro iudicium parta iam pridem apud eruditos fama & existimatio facilè superauit. Florebat in eadem Biturigum schola Eguinarius Baro in iis quoque numerandus qui primi bonarum artium lumine suas prælectiones illustrare, veteremque Iurisprudentiam instaurare sunt aggressi. Non obscura Duareni ipsius æmulatione: qui cum omnem huius præclari instituti gloriam ardentissimè affectaret, hominum opinioni de Baronis doctrina conceptæ non nihil detrahere conatus est, edita in eum de Iurisdictione & Imperio apologia, maleuoli sanè animi teste in posterum futura, nisi humanarum rerum memor extincti post aliquot annos collegæ, & quidem popularis sui pios manes posito in eius honorem ad Hippolyti fanum insigni monumento placauisset, ibidemque postea iuxta illum sepeliri supremis tabulis mandauisset. Eguinarius enim vt

erat aliquatò prouectior ita prior à fatis ereptus est. nec defuerūt vxor & liberi qui mortuo darent lacrymas & iusta persoluerent. Vixit autem cælebs Duarenus, annumque vix ætatis quinquagesimum attigerat, cū ex diuturna quartanæ rabe cōsumptus vita excessit eo ferè tempore, quo & Henricus secundus inter equestres ludos accepto lanceæ fatalis ictu Lutetiæ moritur. Quod à me adolescente in gratiam hominis amicissimi, & in iure præceptoris mei hoc epigrammate signatum est.

**M**agnanimum Henricum Gallis qui sustulit  
annus,

*Idem etiam letho te, Duarene, dedit:*

*Ille decus fuerat summorum nobile Regum,*

*Doctorum fueras nobile & ipse decus,*

*Quot gessit bella ut contunderet ille furorem*

*Siue Hispanæ, tuum siue, Britannæ, tuum?*

*Tu quoque dum vindex Themidis fortissimus instas,*

*Quot cum Barbarie, quantæque bella geris?*

*Post varios casus iam victor vterque manebat,*

*Partæque iam fuerat pacis vtriq; quies,*

*Sed dum aliquam ad tempus petitis post bella quietem,*

*Æterna est vobis ecce reperta quies.*

FINIS LIBRI PRIMI.

SCÆ.



SCÆVOLÆ  
SAMMARTHANI  
ELOGIORVM  
Liber secundus.

---

*Franciscus Oliuarius.*

**F**RANCISCVM Oliuarium Iacobi Præsidis in Senatu primarij filium benigna fors præterque morem stabilis & sibi constans non illustri modò parenti adæquauit, sed etiam in altiore dignitatis gradu cōstituit. Is enim post Senatorios honores & varia legationū officia, postremò vel suis ipse meritis, vel Margaretæ Nauarræ (cuius cōsiliis præerat) apud Regem fratrem commendatione ad supremum illud Cancellarij munus

E

quod est honorum in Gallia solstitium, secundissimo cursu peruenit. Certabāt in eo virtutes omnes hoc tanto fastigio dignæ, doctrina, iudicium, facundia, rerum vsus, integritas, & quæ in eiusmodi magistratu laudabiliter administrando primas agit, admirabilis animi constantia. Itaque dum sagacissimus ille Princeps rerum gubernacula tenuit, Oliuario cōstitit suus honos integraque semper dignitas fuit. Cum autem successisset filius non magis ætate quàm ingenio dispar, obsedere illico iuuenem aulicæ artes & femineæ blanditiæ, per quas effectum est, vt vir grauissimus, qui alienæ libidini turpiter inseruire nollet, quasi iam aduentante senio debilis & ad sui muneris functionem propter lippitudinis incommoda parum idoneus, aula tandem expelleretur. Vixit in illo secessu placidè constantérque nouem ipsos annos anteaactæ vitæ gloria contentus, ac profectò verè felix, nisi fallaci fortunæ ludibrio statim post Henrici secundi casum à Rege nouo reuocatus quatuor & sexaginta annorum senex incidisset in tristissima ciuiliū armorum præludia. Cuius insoliti motus futuras calamitates animo præfagiens, & Rege puero gliscentem indignatus potentiorum aliquot insolentiam & audaciam ex

animi dolore fatalem concepit morbum, nec ei resistere diu potuit. Fato functus est Ambrosij ad Ligerim anno salutis humanæ supra millesimum & quingentesimum sexagesimo, delatusque Lutetiam & in æde B. Germani, quem Altiissiodorenses appellant, celebri funeris pompa tumulatus. Eo quidem summæ præfecturæ successore, quem si fuisset liberum sibi ipse lubens adoptasset, Michaële scilicet Hospitalio studiorum & virtutum omnium societate iamdudum sibi cōiunctissimo. Fortunarum autem, quas amplissimas habebat, heredem reliquit filiū bonis in literis à pueritia diligenter educatum, qui tamen ex ipsius patris consensu & voluntate neglectis togæ honoribus arma sequi maluit, & in equestrem ordinem cooptari. Fuit & Oliuario patruus Ioannes Andium Pontifex omni liberali doctrina politissimus, idemque magni nominis poëta, cuius effigies cum Latino Epitaphio, quod argutè & eleganter sibi fecit, apud Andes in æde Mauritianæ conspicitur. Sed satis hic fuerit eum attigisse, quem sumus ipsi aliquando (si Deus annuerit) peculiari elogio celebraturi.

Latino superiores. Impediebat surdæ auris virium, quod in Italica peregrinatione collegerat, quominus frequens in Regis aula versaretur: cum tamen huic esset à styli elegantia & suauitate acceptissimus: nec vllum patrij sermonis opus lubentius in tota Gallia legeretur, quàm aurei duo de Roma libelli, quorû altero collapsa vetustæ vrbs monumenta, altero corruptos aulæ Pontificiæ mores, totamque aulicorum gentem aculeatis vbique epigramatis aptissimè depinxit & ob oculos posuit. Hunc tamen liberi & faceti ingenij feruorem remittere paulatim cœperat, grauioraque deinceps & sacro homine digniora meditari. Sed cum Burdigalę Antistes ab illo suo Cardinale iam designaretur, vix quinque & triginta annorum iuuenis repentina resolutione neruorum corpus vniuersum infestante Lutetiæ oppressus est, ac in B. Virginis, vbi sacerdotiû possidebat, sepultus ipsis Ianuarij mensis Calendis illius ineuntis anni, quo tumultûs Gallici primus fomes ad Ambosium oppidum exarsit. Vt hæc vitæ breuitas eò minus dolenda cēseri debeat, quodd eum instanti patriæ incendio tam opportunè subtraxerit.



*Ioannes Brodæus.*

Ic præcellentis ingenij vir Cæsaro-  
roduni Turonū ex honesta Bro-  
dæorum familia patre Ludouici  
Regis cubiculario genitus, abdi-  
cata Iurisprudentiæ cura, cui ado-  
lescens apud Biturigas, doctore Alciato, ali-  
quot annos in spem ciuilis vitæ impenderat,  
totum se ad vtriusque linguę bonarumque ar-  
tium cognitionem & scientiam applicuit.  
Quarum incredibilem amorem iam olim à  
pueritia conceptum auxit etiam & inflamma-  
uit ipsa P. Danesij Gallorum id ætatis doctis-  
simi consuetudo & familiaritas, dum ambo  
Georgium Seluam Regis ad Venetos Orato-  
rem in legationis ornamentum secuti, erudi-  
ta illa felicitis Italiæ ingenia Sadoletos, Eгна-  
tios, Bembos, Flaminios, & eorū similes pari  
animorum contentione superare cōtendunt.  
Hos enim Brodæus omnes partim Venetiis,  
partim Romæ Georgio Armeniaco Regis itē  
ad Pontificem Legato comes ascitus & vidit  
familiariter & propter studiorum cōiunctio-  
nem facilè sibi conciliauit. Hoc etiam aliquā-

to superior quòd ad eas, quibus pariter incū-  
bebant, elegantiores literas & Mathematicas  
artes & Hebræam, Chaldeámque linguam in-  
super adhiberet. Quare in Galliam reuersus  
multa scripsit & publicauit tot ac tantis labo-  
ribus nō indigna. in quibus principem locum  
tenent variæ lectiones, diligentissimique in  
multos Græcæ linguæ auctores commentarij,  
maximéque in Epigrammata labore & indu-  
stria Planudis Monachi collecta, quorum &  
Brodeus bonam partem Latina venustate cō-  
uertit. Inter hæc beata otia cœlebs & sacra-  
tus cum ad sexaginta tres annos honestè pie-  
que vixisset, sub exitum primi ciuilis ob reli-  
gionem belli cœpit leui tentari febricula, sed  
ad extremum exitiali: dūmque viribus paula-  
tim deficientibus debitum à sacris literis ani-  
mi solatium petit, legente anagnosta, inter  
suorum amplexus & lacrimas felicem ani-  
mam Deo reddidit. Funeratus est Cæsarodu-  
ni Martiniana in æde tumulo tenui nec ad-  
modum operoso, sed & Brodæ gentis in-  
signibus & piis amicorum Elogijs hone-  
stato.

*Sebastianus Castalio,*

**Q**VI ex asperis & salebrofis Allobrogum montibus humili ortus fortuna, sed ingenio bonis literis excultissimo, cum Musas in omni disciplinarum genere Latinè loquentes videret, tentare voluit num & sacrae literæ negligentiore hæctenus & horridiore quodam stylo contentæ his quoque munditiis exornari possent & expoliri. Hoc itaq; animo nouam Bibliorum translationē exorsus omnes vtriusq; fœderis libros raro & admirabili nec vlli dum in his literis vsitato puritatis & elegantiae nitore expressos intra decennium adornauit & publicauit. Magnam proculdubio ab eruditis omnibus & piis gratiam initurus, nisi sacrosanctam rerum diuinarum maiestatem visus esset aliquot in locis præ nimio Latinitatis & facundiae studio violasse. Violauit certè multò imprudentius, ne dicam ineptius, dum eandem Gallicè operam præstare cupiens vir in Hebræorum, Græcorum, Latinorum assidua lectione volutatus, patrijque interim sermonis penè oblitus, arreptis è triuio & infi-

ma plebe voculis ac loquendi formulis, ridendum se omnibus in re tam seria præbuit atq; contemnendum. Deberi tamen videtur hoc eius egregiæ voluntati, summoque labori & veterum linguarum singulari peritiæ, vt inter doctissimos huius ætatis viros vel cum primis enumeretur. Homo cæteroqui simplex & ab omni fastu alienus, qui suburbanum prædium sua ipse manu quotidie foderet, susceptamq; iuuentutis erudiendæ curam alterno telluris colendæ labore adæquaret. Excessit Basileæ Rauracorum ex febre nondum senex anno CIO. 15. LXIII.

---

*Stephanus Boetianus, &  
Michael Montanus.*



STEPHANVS BOETIANVS ex Sarlato Petracoriorum oppido adolescentiam vix egressus in Aquitaniæ Senatu sedit, ea doctrinæ, grauitatis & constantiæ fama quam homo excellenti natura præditus, pariq; culturæ diligentia expolitus poterat facile de se polliceri. vt qui præter

eam, cui peculiari voto se dederat, iurisprudentiam philosophiæ partes omnes & eam præcipuè quæ est de moribus non calleteret modo, sed etiam in omni vita præclarissimè exprimeret. Poëmata verò siue Gallica, siue Latina, quo lepore, qua elegantia, qua facilitate concinebat? Omnino hic ille est, cuius magna ex parte ingenio & industria id Aquitania tandem obtinuit, quod ab Ausonij temporibus ne tentare quidem ausa fuerat, ut serio poetandi gloriam vel Italia invidente sibi quoque hoc tempore arrogaret. Nec ei minor ab oratione soluta laus fuit. sed huius generis pauca tantum extant è Xenophonte & Plutarcho patria lingua, cuius munditia multum pollebat, fidelissimè conuersa. Cætera ne quam fortè pio cineri maculam aspergerent, ut pote liberius paulò scripta quàm ut hæc tempora ferre possent, amicorum consilio latuere. Trium & triginta annorum iuuenis dysenteria periit, anno supra mille & quingentos LXXII. morte acerba, sed placida, quam Michaël Montanus eius æqualis, popularisque & collega coniunctissimus discretissimè descripsit, demortuique operibus à se collectis in perenne amoris erga illum sui pignus & monumentum adiungi voluit. Hic

apud Montanum gentile castrum in agro Petracorienti Equite patre natus auitam rei bellicæ gloriam initio neglexerat, partisque felici studiorum labore disciplinis in eundem Senatum fuerat assumptus. sed fratre natu maiore post aliquot annos vita functo, magistratu se sponte abdicauit, Regiique ordinis insignibus à Principe cohonestatus aliud planè vitæ genus instituit. ita tamen ut quæ togatus fœdera cum Musis iniuerat, ea nec torquatus quidem defereret. Hoc enim testantur elegantes illi & ingenua loquendi libertate non minus quàm doctrinæ varietate amabiles Miscellaneorum libri ab eo Gallicè conscripti, quos titulo sanè superbiore dignos modestissimè Conatus appellauit. Quantam porrò sibi pepererit ex illius pulcherrimi operis editione vel apud exterarum nationes eruditionis & sapientiæ opinionem tum patuit, cum ipsa illa Roma, quæ inter omnes totius orbis terræ ciuitates principem sibi locum vendicat, eum ultro in ciuium suorum numerum allegit atque cooptauit. Nec potuit sibi temperare vir cæteroqui ab inani gloriæ cupiditate remotissimus quominus hunc honorem sibi habitum posteris prædicaret, ipsumque Ro-

manorum diploma scriptis suis intersereret. Vixit Boetiano suo longè senior, superatis admirabili constantia colici doloris, qui senescentem inuasit, assiduus propè molestiis. Demúmque tricesimo, ost amici casum anno fatis etiam concessit. Saluete ô felices animæ, gemini Musarum ocelli, & commune hoc vobis ambobus Elogium boni ac volentes accipite. Absurdum enim fore arbitrabar, si quorum animos perpetuus amor in vita cōiunxerat, eorum nomina post obitum inepta seiungeret laudatio.

---

*Arnoldus Ferronus.*

**E**odem anno quo sublatus est Boetianus Arnoldum etiam Ferronum patricium & Senatorem suū Burdigala desiderauit. Cuius viri eximie doctrinæ & industriæ multum quidē patria debuit, quòd præter assiduam in iure dicundo prudentiā & equitatem, leges Burdigalensium municipales pluribus in locis obscuras & perplexas disertissimis enarrationibus illustrauit. Longè tamen ei plus debuit vniuersa Gallia, quando is rerū Gallicarum hi-

storiā Pauli Æmylij libris attexēdam à Caroli  
VIII. temporibus ad Henrici II. aduentum ea-  
dē styli tum puritate tū velocitate persecutus  
est. Non minus amplam & vberem nactus  
operis continuādi segetem, si ad ea quæ dein-  
de vidimus turbulentissima Galliæ tempora  
filum historiæ suæ perduxisset, nec in medio  
cursu constitisset. Eo tamen faciliore iactura,  
quòd summæ vir auctoritatis atque doctrinæ  
Iacobus Augustus Thuanus id quoque argu-  
mēti suscipere magno Gallici nominis incre-  
mento meditatur. Obiit Ferronus ad octo &  
quadraginta natus annos, mœrētibus Musis,  
alumnōq; carissimo perpetuam nominis fa-  
mam breuiore vita repensuris, vt ex equo La-  
tinę facultatis opes omnes cum Aufonio ciue  
suo partitus tantum hic pedestri facundia  
quantum alter equestri valuisse iudicetur.

---

*Petrus Fuluius.*


**M**Irabuntur fortasse nonnulli quòd  
inter illustria tot ingenia hunc  
quoque ruris Pictonici alumnū,  
& aliquot alios parum nobiles vi-  
ros interea commemorem. Ego verò qui hæ-



minum præstantiam non famæ celebritate, quæ plerûque vana & inanis est, sed ipso veræ virtutis merito metiendam esse ducerem, non satis mihi videbar ex officio facturus, nisi quotquot noueram eruditionis opinione dignos, eorum nomina, quanquam aliis ignota prædicarem. Fuluius quidem iste ætatem omnem apud suos in scholastico puluere contriuit libertate quadam poëtica dissolutus. Quæ causa fuit, vt & popularibus contemptui haberetur, & apud exteros nomen eius esset obscurius. Multos tamen interea versus argutissimos atque suauissimos condidit, quorum pusilla quædam fragmenta supersunt beneficio Rolandi Betolai non vulgari doctrina viri ab interitu vindicata. Cætera nisi periissent eiusmodi erant, vt nulla vetustate aboleri possent: præsertim Tragædiæ, in quibus Senecam vnicum earum apud Latinos exemplar adhibito iudicio prudentissimè imitabatur: vt qui grauitatem pro re interdum aptissimè remitteret. Hanc autem scribendi facultatem potissimum imbibebat ex doctorum hominum, qui Pictauien-

sem Academiam frequentabant usu & sermonibus, ac imprimis ex M. Antonij Murreti consuetudine; qui dum iuuenili ætate in gymnasio Sammarthano doceret, hunc studiorum comitem & æmulum habuit. Neque hoc utique tacendum est, Ioachimo Bellaio Parisiis ad legum studia recens illuc profecto natum fuisse inter illos tres certamen poëticum, iudice Salmonio Macrino Iuliodunensi, qui è tribus Epigrammatis amatoriiis Fuluiano palmam attribuit. Perit verò Fulvius iuuenis Augustoriti Pictonum in prima intestini dissidij procella, exorto apud Iacobitas insanissimò tumultu, cum cæcus plebis concitata furor in ipsas templi statuas temerè sæuens, & obuium quemque ferro petens omnem repente urbem insolito pauore perculisset. Qui nimirum subito caloris nativæ spirituumque & sanguinis ad intima recessu hominis meticulosi molliorem animam facile oppressisse creditus est.

*Gulielmus Philander.*

 Astilione ad Sequanam hic ortus est: eius autem ingenium & eruditionem admirati Romani, apud quos illis temporibus optime omnes literæ vehementissime colebantur, cum ultro post editas in Vitruuium laboriosas cōmentationes in ciuitatem receperunt. Quarū tamen commentationum procæmio multa insuper alia reconditoris & insolentioris doctrinæ opera temerè pollicitus tā pulchræ lucubrationis gloriam inani tot promissorum expectatione non mediocriter obscurauit. Quasi enim esset eo famæ nascentis auspicio contētus pristinam deinceps diligentiam abiecit, neglectaque per socordiam non studiorum modò, sed & rei familiaris omni cura Tholosæ tandem sexaginta annorum senex ante secundum ciuile bellum in Cardinalis Armeniaci cliētela diem clausit, eiusdemque pia cura & liberalitate in D. Stephani sepultus.

*Jacobus*

*Iacobus Gopilus.*

ACOBVS GOPILVS comparatis vtriusque linguæ diuitiis cùm aliquot annos partim in Pictonibus, vnde ortus erat, partim in Santonibus apud quosdam primæ nobilitatis equites in eorum liberis instituendis collocasset, Lutetiam petiit, vbi Medicinam quoque professus extincto Siluio principem in illa explicanda locum adeptus est. cùm & publicè magna frequentia doceret, & in veterum Græcorum qui de illa arte scripserunt codicibus recensendis priuatam operam impenderet. Cuius laboris indices habemus fidissimos Trallianum, Dioscoridem, Actuarium & alios magna diligentia iudiciòque recognitos & adnotatos. Verùm gliscētibus in Gallia ciuilibus discordiis, cùm turbulenti de plebe homines in Musæum, quod pluribus voluminibus tum impressis tum manuscriptis ornatum habebat, inuolassent, sacramque illam suppellectilem profanis manibus violassent ac diripuissent, tātum inde mœrorem collegit, vt extremum vitæ

diem clauderet, & Ecphrasim quam in omnes Hippocratis libros meditabatur inchoatam relinqueret.

---

*Iacobus Hollerius.*

**H**IVS lectissimi viri patria fuit ager Stempensis nō longè à Lutetia dissitus: quæ loci proximitas opportunum illi aditum ad nobilissimam totius orbis academiam præbuit, in qua Medicus breui tempore factus est omnibus numeris absolutus: siue perfectam artis cognitionem spectes, siue in morbis curandis vsus & solertiâ: cū in ore subagrēsti summa lateret urbanitas, ægorūque mentes non minus quàm corpora, iucunda sermonis comitate & hilaritate recrearet. Sed hoc vnicè dolendum est, quòd ex doctissimis tanti viri scriptis pauca tantum & posthuma neque dum ab auctore consummata peruenerunt in hominum manus: cætera aut à plagiariis surrepta sunt, aut magno humani generis incōmodo suppressa perierunt. Neque minori dispēdio accidit vt eruditissimus filius in suprema vectigalium curia Senator, qui morienti

superstes fuit, ante nobis eriperetur, quàm vlla summæ doctrinæ argumenta literis consignata relinqueret. Quod forsitan à senescente poterat expectari, nisi mors acerbior id venisset. Iuuenis enim dum vixit otij prorsus impariens & impotenti peregrinandi amore correptus quoties à publico munere vacabat, ceu compedibus solutus, continuò se quàm in Asiam, quàm in Africam ad exteras nationes inuisendas dissimulata suis profectioe proripiebat. Minimè scilicet contentus ea, quæ ex librorum lectione comparari potest, rerum naturæ noticia, nisi varios hominum mores, regionumq; situs & loca ipsis oculis videret ac pernosceret. Obiit autè Hollerius pater sub ipsa belli ciuilis initia, paucis ante mensibus quàm in Druydum campo captis vtrinq; ductoribus ancipiti diu Marte pugnaretur.

---

*Adrianus Turnebus.*

**A**DRIANVM TURNEBVM, singulare sui seculi decus, produxit Andelia Rotomagensis agri oppidulum tanti viri natalibus in posterum nobile. Is autè pauca scripsit si hominis

eruditionem spectes : totius enim Galliæ doctissimus merito suo iudicatur. Sed eius præcipua in docendo laus fuit, dum Tholosa, vbi profitebatur, Lutetiam reuocatus & Tusano vita functo successor appellatus discipulis, qui ab vltimis orbis terræ partibus frequentissimi ad illum audiendum concurrebant, reconditæ antiquitatis thesauros omnes mira quadam facundia depromit. Quanquam & ea quæ scripsit eiusmodi sunt vt auctoris decus atque dignitatem præ se ferant. Nam in poëmatiis sublimis est atq; acutus, in oratione soluta tersus atque elegans. In aduersariis verò tot veterum tum Græcorum tum Latinorum difficiles loci aut emédantur aut explicantur, vt dubium fecerit plúsne in eo ingenij an diligentia admirari debeamus. Statura fuit mediocri, facie honesta, probis moribus, accedente ad cæteras virtutes iucredibili modestia: vt æmuli subinde per opprobrium illi obiicerent quod vultum virginali pudore demissum gereret. cùm tamen sub verecundo eius ore latentem generosi spiritus indolem ipsi quoque experirentur. Vixit annos LIII. reliquitque moriēs plures filios paternarum virtutum hæredes omnes certatim futuros, nisi fata inuidissent, vno tantum ex illis su-

perstite: quem etiamnum grauiſſimo Senato-  
ris munere pari doctrinæ probitatique laude  
fungentem Lutetia veneratur. Diem verò ſuū  
obiit prid. Id. Iunias anno huius ſeculi Lxv.  
atq; in cœmeterio Scholaſticorum iuxta Sil-  
uij collegæ cineres nulla funebri pompa, ſic  
enim iuſſerat, ſepultus eſt.

*Carolus Molinaeus.*




Carolus Molinaeus Pariſienſis  
Iuriſconſultorum ſuo ſeculo  
doctiſſimus omnes ſupremæ  
curiæ patronos ſi non dicendo  
(nam lingua nonnunquam hæ-  
ſitabat) certè ſcribendo reſpō-  
dendóque facile ſuperabat. Quo in munere  
tandiu permanſit, dū exardeſcente inter Hen-  
ricum ſecundum & Iulium Pontificem maxi-  
mum bello in Romanam curiam ea ſcripſit,  
quæ cum ad tuendam Eccleſiæ Gallicæ liber-  
tatem ſpectarent, à quibuſdam ita ſunt acce-  
pta, quaſi auctoritatem Põtificiam conuelle-  
re videretur. Quo nomine voluntarius exul in  
Germaniam abiit, ubi tanto omnium princi-



pum ciuitatumque applausu exceptus est, vt certatim ab illis vel ad profitendum vel ad respondendum de iure propositis præmiis inuitaretur. Insigni leuitatis documento, cum post aliquot annos mutatis ex Religionis dissidio animis, à nonnullis eorum in vincula coniectus indignissimè haberetur, nec nisi elusis custodibus vna cum vxore & liberis induta famuli persona euaderet. Nec verò in Galliam ex Regis decreto reuocatus fortunam apud suos æquiores expertus est, recrudescente in dies maleuolorum inuidia, per quorum tandem insidias vir innocentissimus in ipsa senectute carceris molestiam subiit. Sed ea fuit in illo ingenij vis & copia, quæ nec inter tot sæuiantis Fortunæ procellas à scribendo abstineret: vt non solum Romani Iuris plures locos, sed & multarum Galliæ gentium, maximèque, vt bonum ciuem decuit, Parisiensium leges municipales non vulgari subtilitate interpretaretur. Quos industriæ suæ testes si quando in lucem produceret, his ferè se Galliæ & Germaniæ Iurisconsultum inscribebat. Arroganter quidem, sed verè: cum ex eiusmodi commentationibus tanquam ex viuo & iugi quodam fonte perennes Iurisprudentiæ riuus ad omnes omnium nationum ho-

mines abundè profluerent. Obiit Lutetiæ  
anno salutis cis. is. lxxvi.

*Gulielmus Rondeletius.*

 Academia Mōnspeľiensis Medi-  
dicinę studio florentissima nul-  
lum vnquā huius professorem  
habuit Rondeletio alumno &  
ciue suo clariorē. Qui siue loci  
opportunitate & genio, siue quadam animi  
propēsione à puero totum Apollini se dedit:  
neque tantum apud suos, verum & Romæ &  
apud Belgas & in optimis quibusque Galliaę  
vrbibus diuinam illius artem exercuit. Sed  
enim cum esset Monspeľuli professor publi-  
cus, Academiaęque pręfectum siue, vt illi vo-  
cant, Cancellarium ageret, pręcipuam studio-  
rum sedem in illa vrbe constituit. Ibi multa  
quidē pręclarē molitus est, sed nihil memo-  
rabilius in vita perfecit, quàm quum magnifi-  
co eruditionis apparatu, nō sine Gul. Pellicerij  
doctissimi quoq; viri auxiliaribus copiis, vastū  
illud Neptuni regnum ingressus est, vnde am-  
plissimis eius spoliis onustus ad nos rediit,

Aquatiliúmque species omnes tum spectádas tum cognoscendas nobis obtulit. Quod enim attinet ad postuma eius opera, indignum esset ea celebrare, quæ ipse dum viveret luciedere neglexerit. Vixit abstemius & viribus integris ad sexagesimum propè annum ætatem produxit: videbaturque longius producturus, cum Tholosa redeuntem anno CIO. IO. LXVI. dysenterix morbus ex immoderato ficuum esu contractus inuasit, cuius infestis doloribus intra paucos dies oppressus est.

---

*Petrus Montavreus.*



ETRO MONTAVREO summo viro Lutetia ortum, Italia cultum ingenij, Aurelia fortunarum domicilium dedit. Erat is vultu graui admodum & seверо, nec temerè cuius aut in accessu facilem aut in congressu familiarem sese offerebat. Licet à Musarum amœnitate non alienus versibus interim ea luderet, quibus nihil excogitari poterat in

suo genere aptius nihil perfectius. Atq; hæc morositas non tam à Natura ipsa quàm à studiorum laboribus & assidua meditandi consuetudine proficisci meritò censebatur. Quicquid enim temporis à ciuilibus negotijs & Senatorio munere, quod in magno Regis cōsilio sustinebat, vacuum superesse poterat, id omne ponebat in literarum studijs, ac præsertim in Mathematicis, quorum insatiabili amore tenebatur. Hoc enim eius scripta in Euclidem & quidem in decimum librum à paucis adhuc tentatum satis declarant. Sed & philosophiam vnicè colebat, iis grauissimè infensus qui scriptionibus suis Aristotelem summum eius Antistitem his temporibus lacerare non sunt veriti. Neque vllam in eos inuehendi prætermittebat occasionem. Non tamen tot egregiæ quæ in illo fulgebant ingenij dotes obstitere, quin secundo bello ciuili exul & profugus nequedum planè senex apud Săcerras in agro Bituricensi moretetur. Ad cuius rei tam indignæ nuncium M. Hospitalius in versus erupit acerbitatis & querellæ plenos, quibus vir ille clariss. æternam huic ingrato seculo maculam inussit.

*Natalis Brulartus &  
Baptista Menilius.*

**C**V M eruditos dico, non eòs intel-  
ligo tantùm qui priuatis in studiis  
vel scribendo vel docendo quietè  
ac placidè vitam degunt. sed eos  
vel maximè, qui ciuilibus vitæ laboriosis actio-  
nibus occupari literariæ laudis eam partem,  
quæ est aliquantò splendidior & fortunatior,  
omissa rerum contemplatione conſectantur.  
In his memorandi veniunt celebres duo Re-  
giæ procurationis in augusta Lutetiæ curia  
Triumuii Natalis Brulartus & Baptista Me-  
nilius, Regis hic aduocatus, ille cognitor, vter  
que natione Pariſienſis; Qui diuerſa quidem  
via & ratione, ſed eodem vtique ſucceſſu ad  
ſupremum honeſtæ famæ decus & incredibi-  
lem apud Senatum ipſum auctoritatem eua-  
ſere. Brulartus enim vt generoſa & nobili  
deductus familia, quæ iam olim ex equeſtri  
ordine ad Senatorium ſe traduxit, nec minus  
ab integritatis & conſtantiæ commendatio-

ne conspicuus ac venerabilis innata quadam  
grauitate censoriâque planè seueritate sic e-  
minebat, vt amplissimum ordinem etsi sponte  
sua satis diligentem illum, aliquanto tamen  
diligentiorē redderet, in officioque & sedu-  
litate solita contineret. Menilius verò in-  
comparabilis tunc eloquentiæ vir, &, quod  
summæ prudentiæ fuit, iniquioris causæ nus-  
quam defensor tanto natiui sermonis cando-  
re, tanta sententiarum vbertate Patrum ani-  
mos demulcebat, vt eos in quam optaret par-  
tem ferè flecteret ac impelleret. Hoc adeò  
memorabiles & nullo æuo perituri, quòd v-  
terque suo in genere successoribus iter ad ve-  
ram gloriam aperuisse, facemque prætulisse  
non iniuria dici possit. Hinc enim sese extu-  
lere viri tot egregij & excellentes, qui sequē-  
tibus annis hac ipsa triumuirali dignitate no-  
uo quodam & inusitato cum splendore sunt  
perfuncti. Brulartus porrò ætate longè supe-  
rior, & septuagesimum excedens annum  
iam ab Henrici secundi temporibus è vita  
sublatus est, post funus quoque ipsum nobi-  
lis, & in illa perenni beatitate, qua fruitur,  
hac etiam voluptatis accessione letus & felix,  
quod Brulartium nomen magis ac magis in  
Gallia florere nūc è cælo cōspicit ac intuerur.

Vt enim alia præteream, quæ multa sunt huius plæclaræ gentis ornamenta, quis te satis illustri meritæ laudis præconio celebrauerit, ô Nicolae sacri sigilli custos amplissime, cuius in fide & salubribus consiliis Rex prudentissimus magno rei Gallicæ bono iamdudum acquiescit? Obiit autem Menilius ex aqua intercute nondum senex anno post collegæ mortem vndecimo, cum se magistratu prius abdicasset; quodque vix vlli privato cōtigit, Senatorium ei funus ob singularem virtutis opinionem summo Patrum consensu decretum & præstitum est. Nec defuit propinquorum pietas, quos inter Antonius Oiselius I. C. in D. Ioannis æde sepultum erudito & eleganti epitaphio decorauit.

---

*Ægidius Burdinus.*



RVLARTO successit Ægidius Burdinus & ipse Parisiensis, in cuius hominis obeso grauique corpore viuudum & velox ingenium licebat admirari, vel ob id maximè, quòd sepultis, vt quidem videbatur,

altissimo semper sopore sensibus, cum indefinenter sterteret, nihilominus & loquentes probè audiret & illis appositissimè responderet. Disciplinas certè omnes tanta celeritate hauserat, vt puer ipsos linguarum & philosophiæ magistros laceggeret ac propè superaret. Quotus verò quisque potuit è nostratibus reperiri, qui ad eum Græcæ linguæ peruenisset vsus, vt, quod vir ille maximus in Aristophanem egregiè molitus est, antiquos Græciæ auctores sua ipsorum lingua explicandos enarrandosque susciperet? Præcipuum tamè ei studium fuit Iurisprudentia, cuius auspicijs forum ingressus quætalem se quantumque gesserit ex eo potuit intelligi, quod vnus inter tot excellentes causarum patronos electus est, qui grauissimum illud Regij Cognitoris munus in supremo Regni Senatu sustineret. Est enim ea dignitas apud Gallos amplissima, fereque summis viris à Principè delata, quæ nunc quoque Iacobum Guellæum genere, doctrina, virtute conspicuum integerrimè fungentem vniuersa meritò suspicit Gallia. Burdinus eo quem dixi corporis habitu in apoplexiam facilè incidit, qua repente oppressus anno supra sesquimillesimū septuagesimo



tres & quinquaginta natus annos expirauit. Cæterùm ex tanti viri laboribus, præter Græcos illos commentarios, leguntur pauca tantùm, quibus nonnullam iuris Gallici partem interpretatus est. Aded letissimis illis hominibus, qui maxima Reipublicæ negotia gerunt, parum vel otij vel etiam animi superest ad meditandum & scribendum.

---

*Claudius Espencæus.*



EMO Theologorum Parisiensium majore omnium ordinum concursu & admiratione frequētes de rebus diuinis ad populum cōciones habuit, quàm Claudius Espencæus nobili ad Cathalaunum loco natus. vt qui ad munus illud clarissimum eximiam eruditæ facundiæ laudem, firmissimâque latera & gestum oris maximè decentem afferret: tantisper in eo versatus, dum viribus imminente senio diminutis ad scribendi laborem se con-

tulit. Extant enim quamplurimæ de Religione quæstiones ab eo Latinè Gallicèque magna subtilitate ac diligētia pertractatæ. Quorum rerum existimatione permota Catharina Regis pueri mater, instituto de rei Christianæ controuersis apud Pissiacum celeberrimo doctorum hominum congressu, hunc virum inter alios dignum censuit, cuius maximè opera & iudicio res tanti momenti disceptaretur. Cùm & Christianis illis conuentibus, qui Bononiæ agi cœperant maxima cum Gallici nominis fama iam interfuisset.

Nonnulla spe sacri etiam galeri à summò Pontifice obtinendi : quem ei nec Italià inuidebat, homini videlicet ex Apuliæ finibus oriundo, maternumque genus ad illustrem Vrsinorum familiam referenti. Sed occultus collegarum liuor hanc viro de Religione bene merito iustissimæ dignitatis occasionem ademit. Sexagenarius vita functus est anno crio. io. lxxi. Lutetiæque in D. Cosmi tumulatus, vbi saxea eius effigies Theologi habitu còlumnæ imposita cum Elogio conspicitur.

*Nicolaus Gruchius.*

**N**ICOLAUS GRUCHIUS Rothomagensis genere ortus nobili, & omniliterarum ornamento præditus poterat in ea fama & celebritate requiescere, quam à perpetua eloquentiæ cum philosophia coniunctione Lutetiæ, Burdegalaëque, & in ipsa denique Lusitania diu multumque profitendo cõparauerat. Sed quasi esset ea propagandi nominis occasio, quæ ex alienis opinionibus insectandis quæritur, commodior multò & amplior, ab importuna disputandi & altercandi consuetudine vir alioqui prudens & moderatus nunquam ferè abfuit. Vt nunc in Aristotelis interpretem Perionium quasi sumpta in manum scutica pædagogicis correctionibus animaduerneret, nunc excitata cum Sigonio de Romanorum comitiis decertatione hominem illum Italiæ doctissimum dissimulanter quidem & adhibita laudis præfatione, sed acriter interim & acutè perstringeret, ac postremò conficeret.

Nec

Nec spes eum sua frustrata est, nullus enim illa ætate vixit eruditorum maiore apud omnes existimatione & auctoritate, nullus qui ambitiosius à multis passim ad docendum accerleretur. Cumq; & Rupellani ciues transacto motu ciuili tertio in spem diuturnæ pacis erecti ludum literarium in illo suo litore Santonico aperire statuissent, Gruchiumque inter alios ad philosophiæ professionem honesta conditione inuitassent, vix ea pedem in vrbe posuerat, cum ex lenta febre in longo itinere collecta nondum senex pro suggestu tumulum sortitus occubuit. incredibili ciuium mœrore, à quibus maxima cum beneuolentia fuerat salutatus, & ab ipso vrbis præfecto proprias in ædes perhumaniter exceptus. Sanè quanto opere tanti viri stilum Sigonius reformidaret ex eo videre fuit, quòd qui viuo Gruchio nunquam nisi honorificè vel in mediis velitationibus de summa & excellenti eius doctrina loqueretur, mox in defuncti cõpositos manes acerbè contumeliosèque sit inuectus. Hoc autem inter eos literarium certamen Septimius noster his eruditis versibus lepidissimè celebrauit,

Q. Septimij Flotentis  
Christiani,

**A**ntiquata iacent veteris quæ culmina Romæ,  
Fractæque disiectis mœnia ruderibus.  
Et lingua accusant & barbara prælia dextræ:  
Sic ut vix sit pes, quod fuit ante caput.  
At nunc doctarum linguarum mite duellum,  
Et cædes hosti non nocitura suo,  
Instaurant Romam, quæ vos Gruchi atque Sigoni  
Mauult quàm pacem bella mouere sibi.

---

Tilij duo.



**I**OANNES TILIVS Curia  
Parisiensis actuarius ex ipsis  
archiuorum tabulis, quarum  
ei pro suo munere parata sem-  
per erat copia, Francorum ori-  
ginem, instituta, magistratus, Regiaque stir-  
pis familias omnes curiosè admodum atque  
diligenter excerpfit, & in Gallicos commen-  
tarios integerrima fide summòque iudicio

redegit. Fuit ei cognominis frater Briocensium & Meldensium Pontifex, qui & ipse de re Gallica bene mereri cupiens Francorum Regum res gestas breui chronico sed absolutissimo tum Latinè tum Gallicè complexus est. Quia fratrum æmulatione quid honestius, quid omni posteritatis memoria dignius hæc ætas vel ingeniorum fecundissima proferre potuit? Ducebant porrò Tilij genus suum ab Engolisma celebri Aquitanix oppido: sed hanc sibi familiam vendicauerat; hodieque opibus & honoribus florentem vindicat Lutetia præstantium virorum perpetua sedes, vbi demum eo ipso mense, quo Carolus nonus vxorem duxit Elisabetham Maximiliani Cæsaris filiam ambo iam senes in viuis esse desiere. Vt hoc fortunæ factum admirabile videri possit, & commemoratione non indignum, quòd eruditos illos nobilesque duos fratres, & nomen idem sortitos, & eadem ferè studia professos, nec adeo multum ætate dispares idem locus, idem annus, idemque mensis è vita sustulerit.

*Christophorus Harlæus.*

ST in Senonenſi agro Sæſiacum gentis Harlææ caſtrum vetus & celebre, cuius inſignes toparchi nec virtute minus, quàm ſanguine illuſtres ante ducentos annos in maximis Galliæ rebus enituere. His maioribus ortus eſt Chriſtophorus Harlæus rariffimum togæ ornamentum, qui ad quadraginta amplius annos in ſuprema regni curia tū Senator tum primæ notæ Præſes Harlæum nomen belli ſtudiis antea florens & nobile nouo laudis genere cumulauit. Nullus enim aut in iudiciis æquior, aut in Republica tractanda prudentior, aut in omni denique actione ſanctior & integrior vnquam fuit. Quibus egregiis virtutibus non minimam inſuper dignitatem afferebat oris & vultûs innata quædam grauitas, ea ſermonis vrbanitate, liberalique ſemper ſale condita, quæ omnium animos ad ſui

amorem simul admirationemque commoueret. Ac eò magis, quòd fasces, purpuram, & omnes honorum titulos, vt solo virtutis & sapientiæ præsidio contentus, haut obscure negligeret. Certè enim ei non semel consilium fuit magistratum ipsum deponere, nisi togatorum princeps Michaël Hospitalius, cui multò carissimus erat, Reipublicæ tātum lumen eripi pro sui muneris auctoritate vetuisset. Adoleuit interea filius Achilles omnium virtutum admirabile specimen, & huius æui splendor maximus, quem sibi demum pius pater ea sortis felicitate suffecit, vt is vlterius inde progressus ad maiora contenderet, primariusque tandem Præses in eadem suprema Curia merito suo conspiceretur. Sed Christophorus vrgente calculi dolore, cū excidendum se chirurgus iam septuagenarius præbuisset, anno supra sesquimillesimum septuagesimo secundo sub finem Iulij mensis ad superiores demigravit.



*Petrus Ramus.*

PVD Cuthum agri Veromandui vicum natus est Petrus Ramus patre quidem agricola, sed stirpe nobili, quæ genus suum ex Eburonibus repetebat. Auus enim infestis Burgundionum armis patria pulsus, bonisque omnibus exutus ad Veromandos confugit, ibique carbonariam artem exercuit. Petrus autem cum à puero ingenita quadam discendi cupiditate incensus Lutetiam sponte adiisset, superatis omnibus paupertatis incommodis ad supremam eruditi ingenij laudem peruenit, susceptoque profitendi munere æquales suos omnes tum auditorum frequentia, tum eloquentiæ fama longissimè anteiuit. Præsertim si quando plenis subselliis magna oris & sermonis dignitate Ciceronem aut alios Latinæ linguæ procures interpretaretur. Nam philosophiam neque tam aptè tractabat, & dum editis in Aristotelé animaduersionibus summum illum philosophum liberius insectatur, mirum quantos in tota Parisiensi Academia

tumultus excitaret, insurgentibus in eum pene omnibus eius æui professoribus & magistris ( cuiusmodi fuere Goueanus, Perionius, Gallandius, Carpentarius, alij ) receptamque in scholis disciplinam certatim asserentibus atque defendentibus. Postremò & Mathematicas disciplinas auidissimè amplexus est: præbente operam Ioanne Pena iuvene supra ætatem erudito, hisq; potissimùm in artibus egregiè versato. quarum utiq; studia Ramus tãti fecit, vt munificentia quadam Regia publicam earum professionem Lutetiæ institueret, annuaque in id stipendia de vectigali suo legaret. Quin & cum virorum hoc doctrinæ genere præstantium magnus esset in Germania numerus, horum vt optato congressu animum expleret, liberam à Rege legationem feruentibus in Gallia bellis impetrauit. Indèque pace, vt quidem videbatur, Gallis restituta ad suam stationem reuersus est. Sed mox interfecto Colignio cum in omnes, qui ab illo steterant, impunè sæuiretur, Rammum quoque sicarij ex æmuli insidiis pugione confossum de summa ædium fenestra precipitem deiecere, fœdòque ac immani spectaculo raptatum per vicos vrbis & omni crude-

litate laceratum cadauer in propinquum Sequanæ profluentem demersere.

*Dionysius Lambinus.*



IONYSIVS LAMBINVS Monstrolij ad Oceanum quanquam cælo crasso & turbido Musis tamen serenis & fauentibus natus ab earum dulci commercio quæsitæ multiplicis eruditionis opes tunc potissimum discendi cupidæ iuuentuti explicuit, cum ex Italia reuersus, vbi plures annos in Frâcisçi Turnonij Cardinalis comitatu vixerat, optimos quosque Græcæ Latinaque linguæ auctores Lutetiæ in schola Regia siue prælegendo, siue commentando explanaret. Vnde manarunt illi vberes in Lucretium, Horatium, Plautum commentarij, qui vice variarum lectionum esse possint. Nam de Ciceronis operibus, quæ summa diligentia nec minori fiducia recensuit, alij iudicabunt. Certè quàm studiosè multumque fuerit in eius auctoris lectione versatus

documento sunt aduersariæ Demosthenis & Aeschinis orationes, Aristotelis poëtica, librique de moribus, & quæcunque præterea de Græcis Latina purissimè fecit. Ob eamque causam & à doctissimis viris, quibus Italia tunc affluebat, magno semper in honore habitus est, & omnibus Musarum alumniis immaturo fato moriens acerbissimum sui desiderium reliquit. Periit enim ex temporum tædio sex tantum & quinquaginta natus annos paulò post indignam Rami collegæ necem, relicto ex Vrsina vxore nobili matrona filio doctrinæ quoque laude prædito, qui procurata posthumorum aliquot patris operum editione non absurdè sanctis eius Manibus hoc eruditæ pietatis officio parentauit.

*Ioannes Corrasius.*

**H**ic Tolosæ celebri legum domicilio natus & in ipso Iurisprudentiæ sinu molliter innutritus, quam à sacro eius vbere suxerat æqui & boni disciplinam pari deinde profitendi

scribendique labore in florentissimis Europe gymnasiis largissimè profudit. Relicto que tandem scholastico otio in patrium Senatum allectus, ac paulò mox in aulam Nauarræ ad Cancellarij dignitatem euocatus videbatur sibi comparasse tranquillam & honoratam à laboriosa iuuentute senectutem, cùm in ciuili tumultu præter omnium spem redintegrato post interemptos Lutetiæ Borbonicarum partium duces, eadem & ipse plebeculæ furentis amentia Tolosæ crudeliter interfectus est.

---

*Franciscus Balduinus.*



T Balduinum quoque licet natione Belgam hominibus nostris adnumerare quid vetat? Quando quidem nisi vi & iniuria ius oppressum sit, ager ipse Atrebatensis, vnde prodijt, nō alium certè dominum & principem quàm potentissimum Galliæ regem agnoscat. Ille togato patre fisci patrono genitus, & iisdem artibus ac insuper eloquentiæ studiis eruditus

in Iurisconsultum ætate nostrâ celeberrimum  
euasit, eoq; celebriorem, quòd obitis prope  
omnibus Galliæ Germaniæq; gymnasiis, quam  
ex operum editione quæsuerat absens erudi-  
tionis opinionem præsentia sua non modò  
non minuebat, sed magis etiam adaugebat.  
Homo enim facundissimus ipsoq; oris ac ro-  
tius corporis habitu non iniucundus ex histo-  
riarũ & ciuilis disciplinæ coniunctione singu-  
larem suis prælectionibus gratiam & venerẽ  
afferebat. Ac eum quidem sæpe vidimus hoc  
splendido summæ doctrinæ apparatu Lutetiæ  
profitentem cum ad eius auditoriũ permulti  
primæ notæ homines episcopi, senatores, e-  
quites libenter & maxima frequentia cõflue-  
rent. Quorum postea commendatione in  
Henrici Poloniæ Regis familiam & consili-  
um ascitus, sperabat serenissimum illum Prin-  
cipem ad capeßenda noui principatûs insi-  
gnia proficiscentem comitari, cùm ex rapida  
febre tres tantum & quinquaginta natus an-  
nos intempestiuè surreptus est. Clausere ei  
oculos Bitonia vxor & vnica filia, quarum piis  
officiis Lutetiæ in æde Mathurinensium est  
sepultus.

*Antonius Contius.*

NTONIVM CONTIVM  
Nouiodunésesem ius apud Bitu-  
rigas Margarete Sabaude stipē  
diis ac item apud Aurelios diu  
professum exercuere collega-  
rum Duareni, Hotomani, & aliorum doctri-  
na præstantium assidue prope velitationes.  
vnde hunc fructum tulit vel amplissimum &  
vberimum, quòd vir magni animi dum se  
parem huic negotio præstare nititur, indefes-  
so labore perennibusque vigilijs ad exactam  
iuris intelligentiam peruenit, eamque multis  
ac eruditis voluminibus egregiè testatam ré-  
liquit, Auarici demum fato functus, & iux-  
ta ipsius Duareni cineres in Diui Hippolyti  
fano tumulatus, vt qui se perpetuo dum viue-  
rent, inuicem agitauere, nunc tandem vnà  
mortui conquiescant.

*Ioannes Mercerus.*

VBLATO è viuus Francisco Vatablo Hebraicarum literarum apud Gallos instauratore, vnus in eius locum suffici promeruit Ioannes Mercerus, cui primas in eo genere docti omnes magna cum ingenij admiratione deferebant: & eo quidem maiore, quò seriùs ad hæc studia se applicuit. Cum enim, vt erat honesta ortus familia, in eam spem à suis educaretur, vt sibi ad reipublicę gubernacula & dignitates viam pararet, Iuriciuili operam adolescens Auenione Tholosæque primum impenderat, eiusque otij non leue documentum ediderat Harmenopulo e Græca lingua fidelissimè translato. Sed longè grauiora sunt, & homine Christiano digniora, quæ mox in Iobum & in omnes prophetas magna diligentia parique iudicio commentatus est: plura etiam præstiturus, nisi Venetiis rediens, quo se



tumultuante iterum Gallia in Ferrerij legati Regij comitatu contulerat, apud Nitiobriges patriam suam lethali morbo deprehensus ante annos occidisset. Corpore fuit gracili & à studiorum laboribus macilento, sed voce robusta & virili quæ auditoriū probè impleveret: temperantia autem, pudore, modestia, & cæteris animi bonis supra variæ doctrinæ laudem nulli secundus. Cui & hoc à Superûm indulgentia concessum est, vt sibi quodammodo superstes non omnino cum morte interiret. Vxorem enim duxerat Allerij nobilis viri & Antonia Deloinæ filiam, Camillæ Morellæ virginis doctissimæ sororem, quo ex connubio Iosiam filium tanto patre dignissimum suscepit.

---

*Reginaldus Clutinius.*



REGINALDVS CLVTINIVS  
 patricius Parisiensis à Patre Senatûs Præsîde in spem successoris educatus fœcundis Iurifconsultorum latifundiis amœna Musarum

viridaria prætulit: cum Oiselius quoque frater natu maior neglecto literarum otio ad bellicas artes & reipublicæ munia se contulisset. Neque sanè improspere; hic enim & in Scotia Francisci secundi legatus Anglorum arma fortissimè repulit, & Romæ Caroli successoris Orator multa magni momenti negotia fidelissimè procuravit. Hinc fiebat, ut ex eius commendatione Principes, apud quos virtutis nomine gratosus erat, Clutinium fratrem plurimis & opimis sacerdotiis ornarent. Ille igitur hac fortunæ indulgentia usus vitam cœlibem egit inter honesta studia, carminis præcipuè Latini curiosus artifex, & Maronianæ maiestatis mirificus imitator. Cuius generis pauca quidem emisit, sed numeris omnibus absoluta; Quale est imprimis poëma illud Epicum, quod non multò ante extremū diem de victoria Christianæ classis aduersus Turcas ad Naupactum parta publicauit.

*Michaël Hospitalius.*

Enio nunc ad Michaëlem Hospitalium virum incomparabilem, neque solum Arueniæ, vbi fausto siderum concursu primum ortus est, sed omnino Galliæ, immo & Europæ totius immortalis ornamentum. qui omnibus & humanitatis & iurisprudentiæ studiis tum in Gallia tum in Italia liberalissimè institutus adedò felicibus auspiciis Rempublicam aggressus est, vt nullam eius partem intactam relinqueret, donec ad supremam togati ordinis dignitatem peritissimus omnium accederet. Quinetiam eius quædam veluti rudimenta posuerat Cancellarij quoq. honore functus apud Allobrogas, quorum Principi Margaretæ Henrici regis sorori uirtutis & literarum nomine gratissimus semper fuit. Sed profectò tam exilis prouincia tantum virum non capiebat. Itaque hunc in maximis suis temporibus meritò sibi Gallia vindicauit. Quæ tamen salutaribus  
eius

eius consiliis longum frui non potuit: cum è primoribus nonnulli ad imperij Gallici perniciem nati homines omnem publicæ vtilitatis occasionem auerterent, neque porro conquiescerent, donec sanctissimum senem sacri sigilli custodiæ octauo post initum magistratum anno eximerent: maiori certè Reipub. damno, quàm suo. Ille enim, vt erat ab omnibus philosophiæ præsidiis instructissimus, hæc lubricæ sortis inconstantiam constanter & æquo animo tulit. Specie fuit augusta, vultu graui & tranquillo, qui, vt ex veteri numismate apparuit, Aristotelis faciem planè referret. Sed nec ingenio minus eum referebat, cùm ipse quoque philosophiæ & quidem veteris optimus magister multa de iure scripserit, quæ nisi premirentur summam procul dubio Reipublicæ vtilitatem afferre possent. Poëmata non premuntur beneficio clarissimorum virorum Vidi Fabri & Michaëlis Huralti eius generi magni Hospitalij nepotis, qui ea studiosissimè collegère, & in lucem emittèda curauère. In his autem Hospitalius Horatium præcipuè imitatus est. ita tamen, vt verborum nitore & sententiarum gravitate illum æquarit, carminis certè lenitate su-

nitare superarit. Fato functus est in Viniano suo circiter septuagesimum ætatis annum III. Id. Mart. anno Christianæ salutis CIO. IO. LXXIII.



FINIS LIBRI SECVNDI.





SCÆVOLÆ  
S A M M A R T H A N I  
E L O G I O R V M  
Liber tertius.

---

*Carolus Lotharingus Cardinalis.*

**S**IT hic inter nobiles eruditione viros tam illustri Heroi nō immeritō reſeruatus locus, quādo is à pueritia neglectis potētiorum studiis, qui Muſarum ferè ſecuri tantum ea cogitant quæ inania & caduca ſunt, ad firmiora ſe contulit literarum & ſapientiæ præſidia, quæ nec vllis fortunæ caſibus amitti poſſunt, nec vlla temporis longinquitate aboleri. Natus erat in Gallia patre Guiſio Renati Lotharingiæ Ducis filio, maternamque originem ad ipſos Galliæ Reges

multiplici cognationis vinculo referebat. Ad hanc itaque sanguinis claritatem accedente insuper tanta indole, dignus à Paulo III Pontifice Maximo iudicatus est, qui triam & viginti annorum adolescens in sacrum purpuratorum ordinem allegeretur: nec eo minus in suscepta semel studiorum cura perpetuòque literarum amore permansit. Quòd si per eas licuisset occupationes, quibus assiduè distractum impeditumque grauissima totius Christiani orbis negotia tenuère, haberemus profectò non pauca tam rari & excellentis ingenij monumenta, quæ cum veteribus etiam optimis comparare possemus. Commendabat has animi fortunæq; dotes & illustrabat staturæ quoque dignitas & forma summo conueniens Principi, quique omnes eius actiones admirabili suauitate condiebat sermo elegans & vberissima semper dicendi copia. cùm interim Franciscus frater bellica virtute inclitus parem in diuerso genere laudem quotidie promereretur. Vt aulici eius ætatis poetæ, quos amicissimè Carolus fovebat, generosis illis fratribus non incallidè adulantes alterum Martis, alterum Mercurij nomine subinde celebrarent, ac velut humana forte maiorem diuinis vtrumque lau-

dibus cumularent. Hæc autem eloquentiæ vis in eo maximè tum elucebat, cum aut in conuentibus Christianis de instaurando numinis cultu ex veterum patrum disciplina disputaret, aut è sacro suggestu, quem insolito purpuræ fulgore decorabat, verenda legis diuinæ oracula populo admiranti deprimere. Quibus artibus eam consequebatur & apud omnes ordines & apud Reges ipsos tum gratiam tum etiam auctoritatem, vt quæcunque res occurrerant grauioris in Republica momenti ex eius potissimùm sentètia iudicioque transigerentur. Floruit in his studiis ad vsque tēpus illud, cūm Hēricus tertius. Carolo fratre sublato Gallicum Imperium adeptus est. Cui ex Polonia redeunti cum ipse Roma quoque reuertens Lugduni occurrisset, Auenionemque paulò mox in eius comitatu profectus esset, in sæuissimam incidit febrem, ex qua decimo septimo postquam ægrotare cœperat die sub finem anni millesimi quingentesimi septuagesimi quarti nondum planè quinquagenarius expirauit. Corpus eius Rhemos delatum & in sepulchro, quod sibi ipse viuens parauerat, addito breui Elogio, conditum est. Famam verò tanti nominis nullus tumulus, nulla teget vnquam obliuio,



non ob familiæ modo splendorem, celebri-  
umqum tot laborum immortalem gloriam,  
sed eo maximè, quod præstantibus ingenio  
doctrinæque viris benignissimum in omni vi-  
ta præbuerit se fautorem & patronum.

---

*Joannes Monlucius.*



MONLUCII fratres nobili apud  
Condomenses loco nati, quò  
magis auitum decus & familiæ  
honestatem tuerètur, omnibuf-  
que numeris illustrem ad poste-  
ros traderent, sic sua inter se  
studia diuisere, vt Blasio natu maiori bellica  
disciplina, Ioanni pacis artes literarumque  
ornamenta cederent. Ac Blasij quidem res  
tum in Gallia tum in Italia strenuè feliciterq;  
gestas, quibus amplissimam Tribuni Equitum  
dignitatem promeruit, non est huius loci fu-  
sius commemorare: præsertim cùm in illa sui  
temporis historia, quam militari facundia  
exarauit, abundè suo ipse stilo totum se des-  
cripserit atque ad viuum effinxerit. Ioannes  
autem, quem & Valentia Ponsficatu sua me-  
rita auxerunt, cum ad Religionis & Reipub.

curā pari ardore animi diligētiaq; amplectendam peracre ingenium & beatissimā dicendi vbertatem attulisset, magnus omnino & admirabilis in vtroque genere vir fuit. Sacris enim concionibus nunc Valentiaē, nunc in Regis aula frequenter habitis vnus maximē aulicorum animos deliciis & luxu diffuentes ad seueriorē Christianaē vitę disciplinam efficaci facundia reuocare & in officio continere vitus est. Nec in illa porrò disputatione apud Pissiacum instituta, vbi de Religionis rebus amicē tractari cœptum est, vllus inter cēteros Galliaē Præsules repertus est doctior & prudentior, qui Catholicorum partes tuendas ac defendendas susciperet. Legationes autem, in quibus eadem eloquentiē facultas aliquāto maiore cū splendore illuxit, quis vllas vnquam gessit aut numero plures, aut rerum de quibus agebatur pondere & momēto grauiiores? Nec enim ad Europaē tantū Principes & populos propē omnes à quatuor maximis Galliaē Regibus Orator subinde legatus est. sed ipsum etiam præpotentem Asiaē Tyrannum eo successu adiit & conuenit, vt rebus penē afflictis exoptatam in vniuerso orbe Christiano pacem ac tranquillitatem constitueret, si minus diuturnam & stabilem, at certē opportunam

& pro temporum conditione maximè vrilem. Quare Sigismundo Sarmatiæ rege sine mascula prole mortuo dux Andriū Henricus Caroli noni frater in eius locū succedere cupiens huic potissimum viro & Lansaco iuniori nobilitate generis ac ingenij laude præstanti (quos ad promerenda Polonorum suffragia peridoneos esse sentiebat) omnem huius petitionis curam & sollicitudinem commisit. Prensabant quatuor competitores illustrissimi, Suecis, Austrius, Transiluanus, & Moscouita, qui cum apud gentem illam, vt viciniorem & vitæ morumque similitudine coniunctiorem, gratia & auctoritate multum possent, eos tamen hi duo solertissimi homines siue Caroli auspicijs siue potentiore Ducis Genio, siue sua ipsi facundia freti, strenuè & feliciter sua spe deiecerunt ac deturbarunt. Sed hoc rei bene gestæ præmium fuit, vt ambo in ipsius Henrici grauem offensionem & capitale penè odium incurrerent. Subtili enim ingenio princeps, ne dicam suspicioso, hanc electionem postea sic interpretatus est, quasi per noui regni speciem eò relegaretur, vt à Gallici imperij successione, quâ spe non dubia iam præsumebat, aliquantò minore negotio repelli posset, eaque demum

excludi. Excessit aliquot post annos è vita Monlucius iam planè senex, nec à Republica tamen abstinens, cum & nouissimè præclaram ad Galliæ Narbonensis ordines de pace inter ipsos ex Edictò Regio constituenda legationem exegisset.

---

*Ioannes Moruillerius.*



ARI ferè studio & æmulatione Monlucium æqualem suum secutus est Ioannes Moruillerius Blæsiensis honesto loco natus. qui apud eosdem potētissimos Galliæ Reges ea virtutis opinione floruit, vt omniū pacis ac belli consiliorum particeps per totos triginta quinque annos grauissima quæq; regni negotia domi forisque tractauerit, immortalique sua cū laude confecerit. Gesserat primò præfectutam apud Biturigas, multisque deinde legationibus continenter obitis non obscura futuræ gloriæ signa & indicia iam ediderat. Mox verò dum ad maiora sublatus hanc negotiorum molem

in celeberrima Regis aula sustineret, nemo cum grauitate & iudicio, nemo sagacitate & solertia, nemo candore & humanitate superauit. Illud porro quantæ moderationis fuit, quantæ modestiæ, quòd cum ad Cancellarij munus in Oliuarij defuncti locum à Francisco secundo Rege vocaretur, hunc magistratum, qui togatæ militiæ supremus in Gallia gradus est, non modo non ambiit, sed recusauit etiam, seque tanquam oneri tanto minimè parem excusauit? vt ex eius demum repudiatione Michael Hospitalius (qualis & quantus vir!) ad amplissimam illam auctoritatem perueniret. Sed Hospitalio ipso post aliquot annos per summam inuidiam aula pulso, domumq; relegato, cum iterum à Carolo Francisci fratre & successore ad hoc ipsum inuitaretur ac vehementius vrgeretur, aliquando tandem adduci potuit, vt sigilli procuratorem susciperet, absentisque Cancellarij vicem impleret. quam tamen biennio post Renato Birago homini Mediolanensi, nec rerum nostrarum satis perito, sed apud Reginam gratiose facile concessit. Nimirum generosus & excelsus animus quæcunque à fortis arbitrio pendent infra se ponit, nec vir-

tutis præmia sed virtutem ipsam honestiore cura & studio consecratur. Solebat Moruillærius oblectari Musarum studiis & earum eximios cultores amicè liberaliterque fouebat, non Gallos tantùm, sed exteros etiam, ac præsertim Italos, ex quibus aded nonnulli grati & memores frequentem eius mentionem suis in scriptis honorificentissimè sunt prosecuti. Quò magis verendum nobis erat ne grauitè in patriæ decus atque dignitatem peccasse diceremur, si tam clarum & celebre nomen, quod nec ab exteris neglectum esset, negligeremus ipsi, nec inter illustria Gallicæ gentis ornamenta collocaremus. Obiit exactæ ætatis senex anno supra quingentesimum & millesimum septuagesimo septimo, & apud Bloesios in æde Franciscana sepultus, quum Aureliæ Pontificatu (nam & hunc à Rege meruerat) iam pridem se sponte abdicasset. Cui tanquam singulari amico & collegæ Pomponius Bellevreus vir amplissimus & morienti clausit oculos, & elato luculentum ex marmore tumulum addito insigni elogio consecrauit.

*Iacobus Bugius.*

Iacobus Bugius è Castronouo Andium elegantis ingenij vir & admirandæ memoriæ confectam à doctrinæ varietate Iurisconsulti, Philosophi, Poëtæ famam peregregiè tulit. Latini quidem carminis arguria cum facilitate & lepore coniuncta præcipuè commendabilis, & ex ipsius Michaëlis Hospitalij censura cum veteribus Romæ poëtis conferendus: verùm in scriptitandis Gallicis ideo frequentior, quòd ad procerum aures deliniendas & gratiam in aula aucupadam aptiores esse crederètur & opportuniore. Nec fefellit euentus coniecturam. Adolescens enim inter aulicos eius ætatis poetas nobilitatem adeptus aditum sibi ad augustam Regiæ sororis familiam hoc eruditæ suauitatis lenocinio patefecit: dignioréque mox habitus loco supplicibus apud eam libellis consiliisq; diu præfuit. Vigebant ea tempestate in Gallia laudandæ omnes artes, quas à Francisco primùm

excitatus Henricus filius, etsi durior ad hæc studia, tamen recenti patris exemplo liberaliter promouebat, earumque celebres alumnos ad opes atque dignitates efferebat. Bugius itaque beato seculo fruens, procurante id potissimum Regina, in Armoricum Senatium assumptus & Inquisitionum classi præfectus quam Reipub. debebat boni & eruditi cuius operam ad usque scalarem vitæ annum L X I I. piè fideliterque perfoluit. Eo tamen studiorum temperamento, ut subsecuius horis nunc ad poeticos lusus, nunc ad philosophicas oblectiones & illecebrosam auri conflandi scientiam à Senatoria seueritate se referret. Verum utroque labore prorsus inani citraque frugem effluente; quando & suorum ipse carminum fastidiosè negligens iacere sineret ea perireque in aduersariis, & dum metalla in fornacibus recoquendo montes sibi aureos temerè pollicetur, nihil inde præter leues euanidósque fumos eliceret. Vnum tamen eius Epigramma tanquam ex naufragio tabulam hic lubet subiicere, quod, nisi fallo, non leue reliquorum desiderium legentibus afferre possit,



IN ILLVSTRIS CVIVSDAM  
fœminæ nuptias.


**I**mpubes nupsî valido, iam firmior annis  
*Exsucco & molli sum sociata viro.*  
*Ille fatigauit teneram, hic atate valentem*  
*Intactam tota nocte iacere sinit.*  
*Dum nollem licuit, nunc dum volo non licet vti.*  
*O Hymen, aut annos aut mihi redde virum.*

*Joannes Gorreus.*

**I**oannes Gorreus Lutetiæ natus est  
 patre Bituricense non obscuri no-  
 minis medico, quem tamen ipse  
 medicinam quoque professus lon-  
 gissimo interuallo superauit. Nam quæ duæ  
 potissimum res homini ad eam disciplinam  
 contendenti necessariae sunt Græcæ linguæ v-  
 sus & absoluta Naturæ cognitio, hæ in Gorreô  
 filio iam inde ab adolescentia sic enituerunt,  
 vt mirû esse non debeat, si vir factus ad sum-  
 mum in illa arte principatum Lutetiæ suo tẽ-  
 pore peruenerit. Nec interim illi defuit La-  
 tinæ orationis facultas & poëticus lepos mi-  
 nimè vulgaris, cuius in Nicandro & Græco-

rum aliquot epigrammatis transferendis nobile argumentum edidit. Sanè in ipsius Nicandri interpretatione id eximium fuit, quod res ieiunas & à poëtica vbertate multùm abhorrentes seruatà vbique carminis lenitate non minus verè & fideliter, quam aptè & eleganter expressit. additis etià commentariis, & non iniucunda de lepore marino ad Gulielmum Rondeletium apologia, quæ simul cum innata grauitate summam ingenij morumque suauitatem & festiuitatem in eo concurrere demonstraret. Scripsit & medicarum definitionum libros, in quibus omnium, quæ ad medicinam pertinent, naturæ, differentiæ, proprietates explicantur. Opus egregium & perutile, quod cum eruditis omnibus satisfecerit, ipsi tamen auctori non satisfecit. Statuerat enim ornare illud & amplificare, nisi valetudinis incommoda vetuissent. vel inde maximè orta & excitata, quod cum armatorum manus læticæ, qua forte vehabatur, tempestate turbulenta occurrisset, repentino pauore exanimatus, quam longa deinde vita fuit (vixit autem ad annos septuaginta duos) à seipso deficere quodammodo videretur, in eaq; ægritudine vir tantus anno CIO. IO. LXXVII. decederet.

*Remigius Bellaqua.*

 E quoq; Remigi Bellaqua No-  
gēti Vnellorum oppidi alumne  
iniquum sit inter nobiles huius  
ætatis poëtas non recēdere. Qui  
omnino siquid versibus effin-  
gendum lulciperes, præsertim in Bucolicis,  
rem ipsam pingere & oculis subiicere vide-  
baris, vnde & Naturæ pictor à nostro sæpe  
Ronsardo solebas appellari. Anacreontis ua-  
tem poëtae temulenti Græcas Odas ab Hen-  
rico Stephano luci redditas quo sermonis  
Gallici lepore, quanta facilitate vir omnium  
maximè frugi & sobrius expressisti? Sed in-  
ter eximios ingenij fœtus, quibus patriam ex-  
ornasti, præcipuum illud poëma fuit, quo va-  
rias gemmarum species facultatésque perse-  
queris, eo quidem carminis nitore qui cum  
ipsis gemmis certare iudicetur. Obiit Bella-  
qua sub annum vitæ quinquagesimum ingen-  
ti sodalium luctu, quorum humeris in ædem  
D. Augustini magis honesta quam sumptuosa  
funeris pompa illatus est, ab illisque omnibus  
supremum

supremum carminis officium tulit, maximè.  
 à Ronsardo, qui Gallicum epithaphium à se  
 cōscriptum lapideo eius tumulo iussit inscul-  
 pi. Et nos ei, dum viueret, hoc in Anacreōtis  
 versionem epigramma quondam lusimus.

**A**Ntè quidem lepidò referebas carmine totum  
*Anacreonta, Remigi.*

Nunc etiam similis magis incipis esse, quòd alba  
 Canent, Vt illi, tempora,

Discrepat hoc tantum, quòd sobrius ebria cantas  
 Senis faceti pocula.

Quòd si de solito quid fortè pudore remittas,  
 Musisq̃ue iungas Liberum,

Quàm bene vinosus superares vina canentem,  
 Qui secus illum sic refers!


### Ludouicus Regius.



VDOVICVS REGIVS Con-  
 stantinus Philippi Cossæi Con-  
 stantiarum Episcopi alumnus  
 Latinis aliquot epistolis & Bu-  
 dæi vitâ mūdissimè scriptâ pe-  
 destribus facundiæ laudem à doctissimis Italis

non vano iudicio adeptus est. Is vbi plures annos nunc in Italia nunc in regis aula consumpsisset, Lutetiæ tandem redditus omiffis aliquantisper Græcis & Latinis ad patriæ lingue studium se applicuit, multòsque philosophiæ locos ex Platone, Aristotele, Xenophonte desumptos Gallicis verbis aptè admodum illustrauit. Erat enim in omnibus disciplinis egregiè versatus, quæ res ei ad nouum & inuisitatum scribendi genus non parum adiumenti attulit. In hoc porrò non ferendus, quòd iniquus alienæ industriæ æstimator scriptores sui temporis ferè omnes acerbiorè subinde censure perstringeret. Quæ carpendi libidine cùm Ioach. quoque Bellaium temerè offendisset, ab illo magni nominis poëta præter spem iocosus & mordacibus versiculis exceptus longum apud omnes aulicos in ridiculo fuit. Nouissimè dum Timæi Platonici tralationem adornat, anno millesimo quingentesimo septuagesimo nono iam senex morte sublatus est, eruditis quidem luctuola, sed ipsi nequaquam importuna, quæ mente à vilium rerum cogitationibus abducta tam grauià seriò meditantem adorta est.

*Antonius Fumeus Blandæus.*

 VMEORVM gentem olim e-  
questrem primus ad munera  
togæ trāstulit Adamus Fumeus  
vir eximia virtute & industria,  
qui Lodonico XI. Rege supre-  
mam turis Gallici præfecturam adeptus est.  
Ab eo repetebat originem hic Antonius in-  
genio & ipse præstanti, atque ad omne lite-  
rarum genus benè felicitérque nato. Itaque  
non ijs cōtentus disciplinis, quæ ad honores  
in Republica suscipiendos per auita pater-  
næque vestigia viam illi sternerent, Philoso-  
phiam quoque & politiores Musas magno  
diligentique studio his adiecit. Circumfe-  
runtur & maximè probātur à doctis nonnul-  
la eius poëmata nondum illa typis mandata,  
sed siue sermonis lepōrem, siue sentētiarum  
varietatem spectemus, hominum profectò  
luce dignissima. Scripsit & oratione solutā  
quædam paris elegantix. In Republica verò  
Senatoriisq̃ue muneribus obeundis cū ad-  
mirabilem præferret eruditionis & fidei præ-  
stantiam, virgente bello civili tertio legatus.

in Austriâ à Carolo ix missus est, si auxiliares Germanorum copiae, quas in suam perniciem cōscribi Rex audierat, Cæsaris auctoritate ac potētia retineri possent & à Gallię finib⁹ prohiberi. Exindēque in sanctius illud cōsiliū, vbi amplissima regni negotia explicantur, ab Henrico iii. Rege talium virorum singulari æstimatore facile assumptus est. Cuius demum Principis iussu profectus in Auerniam grauissimis de rebus dum peracta legatione Lugdunum sidere infesto asperaque & difficili via contendit, collecta ex itineris laboribus ægritudine nondum senex emisit animam, superstitē filio, qui hodiēque libellorum præfectura ornatus antiquum familiæ splendorem honestissimè tuetur.

---

*Petrus Seguierius pater.*



Eguierij, quorum ampla & honorata familia Lutetiæ floret, primam domus originem à Septimania repetunt, vbi iam olim ea gens præcipuis tum Reipubl. tum etiam Ecclesiæ dignitatibus insignis enituit, Parisiisque demum inserta hunc edidit eminē-

tissimum interrogatos ætate sua virum, qui postquam in celebribus aduocatorum subfelliis abundè claruisset, Regij primùm Patroni, mox & Præsidis in sūma Curia munus obtinuit, cū in eo supra nobile forensis eloquentiæ laudē multa quoq; rerum inesset scientia, multus vsus, multaque iudicij grauitas, & in rebus administrandis ea fides ac firmitudo animi, quæ à boni ciuis officio, constantique erga Rempublicam studio nusquam recederet. Nec in ipsa modò Senatorij muneris functione, sed & in maximis regni negotiis, quæ subinde Rex ei credebat, excellentes & eximiæ tot virtutes emicuere. Potissimùm vero ex illa quæ de finibus inter Caroli noni & Philiberti Sabaudie Ducis delegatos Lugduni agitata est cōtrouersia perpetuam apud omnes Galos commendationem promeruit. Huius enim disceptationis delectus à Rege arbiter adèò generosè grauiusque se gessit, reiectis ac repulsis omnibus ambitiosi Ducis artibus, vt si procures qui summæ rerum in Gallia tunc præerant, salubri eius & recto iudicio stare maluissent, non ita magno cum nostro pudore & incommodo præclusus nobis nunc esset omnis in Italiam aditus. Cæterùm ad has animi veras



dotes Fortuna quoque ipsa suas opes & copias liberaliter adiunxerat. Sed nihil ei beatius in vita contigit, quàm lætissimus liberorum prouentus & vberima propagandi nominis occasio. Huic enim succedere multi præstantes filij, & in his duo Senatus item suo tempore Præsides Petrus natu maior, & Antonius, qui fratri superstes hodie viuit ac viget ab eruditionis & facundiæ summa gloriâ, summâque in iure dicundo æquitate & prudentia iamdudum clarissimus. Obijt Seguietius pater planè felix inter pias tot natorum lacrymas viii Kal. Nouembr. anno cto id LXXX & in D. Andreæ sepultus, cum vixisset in altissima tranquillitate animi ad septuaginta sex ipsos annos, eoque dignitatis in illa Gallorū amplissima curia processisset, vt alterū ab eius principe gradū teneret.

---

*Jacobus Billius.*



Jacobus Billius Prunæus ex nobilitate Carnutensi, Guisæ natus est, proximo Atrebatum & Hannonum finibus oppido, quod Ludovicus pater homo strenuus & spectatæ in

bello solertiæ Francisci primi nomine tum  
regebat. Is autem diuersa vitæ ratione & in-  
stituto inter Musas educatus literarum & sa-  
pientiæ studiis inclarescere maluit. Erat Lu-  
douico filius maior natu Ioannes duobus o-  
pulenrissimis in ora Santonica cœnobijs præ-  
fectus, qui cùm præ nimio rerum humana-  
rum fastidio subducere se hominum cōgres-  
sibus, & in secessu Carthusiano seueriorem  
vitam agere meditaretur, non prius eò mi-  
grare voluit, quàm vtriusque sacerdotii bo-  
norumque omnium possessione sese in Iaco-  
bi fratris gratiam abdicasset. Quare studiosus  
adolescens, qui ad literarium decus toto ani-  
mo anhelabat, ex fraterna liberalitate factus  
auctior & fortunatior, habuit vnde oprato  
in otio desiderium suum expleret, eosq; de-  
mum produceret ingenij fœtus, quibus &  
summo beneficio Rempublicam Christia-  
nam affecit, & gloriam ipse immortalem cō-  
secutus est. Plurima enim ex Damasceno,  
Chrysostomo, Basilio, cæterisque sanctissimis  
legis diuinæ interpretibus, ac potissimum ex  
illo singulari scriptore Nazianzeno, qui  
Theologi cognomen est meritis, doctissime  
fidelissimèque transtulit. Plurima & suo ipse  
ingenio meditatus est. Cùmque totus in scri-

bendi labore semper fuerit, tamen, quæ fuit  
eius verè Christiana modestia, nullum vn-  
quam argumentum attigit, ne tum quidem  
cum versibus Gallicis animi causâ luderet,  
quin ad pietatem & Religionem pertineret.  
Cætera omnia tanquam fluxa & caduca ge-  
neroso quodam animi vigore contemnebat.  
Vtebatur familiariter Gilberto Genebrardo  
viro doctissimo, cuius in ædibus Lutetiæ dū  
valetudine parum firma hospitatur, & Gre-  
gorianæ versionis nuper à se recognitæ no-  
uam editionem vrget, sub exitum anni cio  
is lxxxı post longa morborum tædia ex  
phthisi tandem octo & quadraginta natus  
annos interiit, elatusq; est ad Seuerini fanum  
& piis eruditorum epithaphiis consecratus.

---

*Simeo Bosius.*

**I** Sab Aurato populari suo Græcæ  
Latinaque linguæ facultates om-  
nes, à Duareno exactam Iuris &  
Legum scientiam adeptus, huius  
quidē in exercenda Lemouicensis prouinciæ  
præfectura, illarum verò in Ciceronis ad At-  
ticum Epistolis magna cum excellentis inge-

nij exquisitæque doctrinæ præstantia castigandis & illustrandis pulcherrimum sui dedit specimen. Ad maiora quoq; progressurus nisi spes eius egregias & rectè conceptas importuna fatorum invidia fefellisset. Iuuenis enim, nec sine veneni suspitione, Ratiasti Lemouicū ereptus est. Nec ea porro vitæ breuitas longius à nobis Elogium requirit.

---

*Ianus Morellus Grynæus.*

**N**E adolescente solebat huius viri honesta cū primis & pudica domus tanquā sacra Musarum ædes Lutetiæ magna eruditorum frequentia celebrari cū & eius vxor Deloina & filiæ tres bonis omnes disciplinis & moribus ornatissimæ perelegantes vtraque lingua versus inusitata felicitate concinerent, ipse autem chori dux & princeps Apolinis interea vicem bellissimè redderet ac representaret. Egerat bonam adolescentiæ partē apud Heluetios in Erasmi contubernio, cui ad Basileam clausit oculos & honorifico poemate parentauit: peragrataque mox Italia regis au-

læ succedens, ut homo sermonis & morum  
elegantia non minus quàm doctrinæ nomi-  
ne spectabilis maximam inter literatos au-  
thoritatem breui tempore obtinuit. Cuius  
deinde merito receptus est in Reginae fami-  
liam & Hērici Engolismæi Principis illustris-  
simi adolescentiæ regendæ appositus : nec  
potuit has inter occupationes ea meditari &  
scribere, quibus aliquando posteris innotef-  
ceret. Sed quod sibi ipse non præstitit, hoc  
omnes illius æui nobiliores poëtæ, quibus-  
cum arctissima familiaritate iunctus erat,  
certatim suis in scriptis & cumulatè præsti-  
tere. Septuagesimum ætatis annum agebat  
cùm accessit ad senectutem cæcitas, nec lon-  
go post interuallo secutus interitus, quem  
Camilla filiarum natu maxima piè pariter ac  
eruditè lugens hoc epigrammate Græco ce-  
lebrauit.

Εἰ θάνατος χηροῖς (ὡς πιστεῖον) ἄτραπος  
ὄντως

Ες βίον ἀθανάτων ἐστὶν ἐτοιμοῦσθαι

Δάκρυα πάντα κεν' εἶδ' ἡμῶν, φίλοι, ἀμφὶ  
Μορέλλῃ,

Ζῶσι ἐν ἀθάνατοις θρανὸς αὐτὸν ἔχει.

*Gulielmus Postellus.*

Icapud Barentonium Norma-  
 niæ vicum obscuris ortus paren-  
 tibus cùm ingenium apprimè ca-  
 pax & ad concipiēdas artes ido-  
 neum à Naturæ bonitate acce-  
 pissæt, melioris disciplinæ subsidio destitu-  
 tus ea nitidioris eloquentiæ facultate ca-  
 ruit, quæ vna maximè doctorem hominum  
 scriptis dignitatem atque splendorem affer-  
 re potest. Adoleſcentiam vix attigerat, quan-  
 do ipse adhuc docendus difficile docendi  
 munus aggressus est: cùmque multos vitæ an-  
 nos in vicinorum liberis erudiēdis ac perpe-  
 tuo studiorum labore traduxisset, tandem è  
 ludi magistro pagano creatus à Rege peregri-  
 natū linguarum professor in urbē venit, edi-  
 tis locupletibus comentariis quibus duode-  
 cim inter se differētes & variæ linguæ super-  
 ba doctrinæ ostentatione explicantur. Neque  
 multò post visendi orbis cupiditate incēsus  
 reliquit Galliam, confectaque sedecim anno-  
 rum peregrinatione Venetijs demū cōsedit:

Vbi nescio cuius mulierculæ præstigiis absurda quædam & impia de Religione commentus est, quæ deinde Lutetiæ frequēti auditorum turba publicauit: cū se morte obita reuocatum ad superos & iuuenili ætati restitutum ineptè mentiretur. Magna quidē stolidæ plebis admiratione, præsertim eorum qui ante profectiōem eum nouerant, quod uidelicet meminissent iam vetulum & canescentem hinc abiisse, quem longo post intervallo reducem nigrante barba & æui flore conspicuum cernerent. Sic enim eos captabat, simulatōque per pigmenta miraculo fidem suis nugis atque auctoritatem cōciliare conabatur. Sed vrgente magistratu violatæ persuasiōis reus aufugit in Germaniam & in Ferdinandi Cæsaris aula tandiu fuit, dum recantatis erroribus in patriam redeundi & publicè profitendi facultas à Principe reddita est. At cū eodem recidere videretur, ex Senatus decreto in D. Martini monasterium relegatus est. Quo in secessu viribus integris ad alterum & octogesimum huius seculi peruenit annum, centenariōque proximus interiit.



*Jacobus Peletarius.*

E verò Iacobe Peletari, non vulgare Cœnomanorum decus, quo potius nomine commēdem? Fuit enim tibi varium & versatile ingenium, quod nullis inclusum spatiis per omnes omnium generum disciplinas liberius euagaretur. Eandemque & in omni vita libertatem servare visus es, cū nullibi vnquam stabile rerum domicilium elegeris. Nec eò minus intērea solebas ea meditari & componere, quæ non nisi ab homine planè quieto & in studiorum laboribus assiduo proficisci viderentur. Maiore tamen famæ quàm fortunæ prouentu. Cui faustissimum exordium præbuerunt elegantes illi de Orthographia dialogi ad veterum imitationem tibi Gallicè conscripti, quibus præter vsu receptam apud Gallos scribendi rationem & formulam perinde scribendum ac loquendum asseueras. Scribebas autem ea lingua profectò mundissimè, neque solum dialogos, epistolas & poëma:



ta, quæ nitorem orationis facillè recipiunt, verum etiam asperas & spinosas Mathematicarum artium præceptiones, quas admirabili methodo facilitatèque tractabas. Nam licet Medicinæ nomen dederis, Matheseos tamen studium, quo iuuenis flagraueras, neque vir neque senex vnquam remisisti, multa in Euclidem Latinè commentatus, quæ iam extât: sed castigationes & scholia, quæ dum Critici quoque personam sustines in Ciceronem Virgilium & Horatium antè paulò quàm nobis eripereris exaraueras, nondum, quod sciam, in publicum exiere. Te autem luximus eodem illo mente Galliæ insuper luctuoso, quo à nostris Phillippo Strozio duce aduersus nauales Hispanorum copias ad insulâ D. Michaelis infelicitèr pugnatum est.

---

*Christophorus Thuanus.*

**H** V A N A gens antiquæ nobilitatis à Thuanò Campaniæ Belgicæ castro, quod olim possedit, nomen sortita diuisa fuit in familias plures: quarum vna traiecto Sequana migravit ad Celtas & in Aureliano saltu consedit. Hu-

ius auctor & princeps fuit Syluester homo strenuus Aurelianensis prouinciæ præfectus, cuius deinde posterì perstiterunt in equestri ordine: donec Iacobus Iacobi filius natu minor ad studia togæ se contulit, Regiique patròni munus à principe obtinuit. Fuit illi filius Augustinus, qui & ipse paternis vestigiis inhærens in Senatū assumptus & ad Prælidis honorem euectus est, susceptis ex vxore claro loco fœmina Henrici Marliani Galliarum Cancellarij pronepte vno & viginti liberis, quorum natu maximus fuit Christophorus hic noster amplissimi ordinis lumen & splendor. Is ab adolescentia forum ingressus tantisper in illa palæstra se exercuit, dum ab Hērico 11. Rege, præcellentis eruditionis, probitatis, & facundię merito Præses quoque diceretur. Nec ita multò post Ægidio Magistro Senatus principe vita functo, in eius locum à Carolo 1x. Henrici filio cum incredibili bonorum omnium applausu & lætitia suffectus est. Quo in grauissimo munere totos viginti annos ita se gessit, vt accedēte ad ceteras quibus eminebat virtutes admirabili vigilantia omnes qui antecesserant lōgo interuallo antecederet, neque principis modò gratiam, sed & omnium ordinū fauorem beneuolentiāque

promereretur: cùm Senatoriam feueritatem  
singulari quadam oris & sermonis comitate  
côdiret. Certè quantus esset ciuium amor &  
de summa eius virtute iudicium tum facile  
expertus est, cùm asperrimis temporibus v-  
num elegere quem vrbi præficerent, & cuius  
fidei se, fortunæque suas omnes crederent.  
magno quidem vrbs commodo, sed nec mi-  
nore ornamento, cùm pace constituta publi-  
cis eam monumētis & ædificiis maximè om-  
nium auxerit. Postremò & à Francisco Regis  
fratre serenissimo Andium ac Belgarū duce  
ad Cancellarij dignitatem vocatus rāto prin-  
cipi deesse noluit. Quo mirandum minus est  
si tot vndique districtus negotijs quos eximia  
eius eruditio polliceri videbatur ingenij fœ-  
tus nullos reliquit, præter inchoatum de re-  
bus Gallicis commētarium, cuius editionem  
docti omnes & nominis Gallici amantes viri  
avidissimè desiderant. Fato functus est Kal.  
Nouembr. anno c. 15. 15 LXXXII. cùm ad an-  
num ætatis septuagesimum quartum firmissi-  
ma valetudine peruenisset: publico quoque lu-  
ctu apud Andreæ fanum in maiorū sepulchro  
conditus est. instaurante funus vxore Iacoba  
Tulea splendido etiam genere orta: ex cuius  
fortunato connubio genuit filios tres, atque  
in ijs

in iis Augustum nunc quoque Senatus Præsidentem virtutum pariter omnium & scientiarum Antistitem, filias autem duas, quæ generos ei dederunt suprema illa duo togæ ornamenta Philippum Huraltum Cheuernij Comitem & Achillem Harlæum, quorum alter summam iuris Gallici præfecturam, alter Senatus principatum à focii morte relictum obtinet.

---

*Vidus Faber Tibracius.*



X gente Fabricia Tholosæ cum primis clara & nobili natus est patre Senatûs Præside Vidus Faber amœnissimoviringenio, multipliciq; doctrina. Quicum in Tridentino confessu Caroli Regis orator omnẽ Christianum orbem eloquentiæ sue fama complevisset, eiusque deinde commendatione Regium in supremo Galliæ Senatu patronum agere meruisset, actiones illas forenses raris & exquisitis Græcæ Romanæque antiquitatis opibus adeo feliciter exornare aggressus est, ut politioris illius facundiæ, qua nunc tot eruditi Lutetiæ patroni certatim enitere conten-

dunt, primus auctor & inceptor optimo iure dici mereatur. Accessit inde ad aulam, & Henrico Regis fratri in Sarmatiam ad insignia regni capeſſenda proficiſcenti comes aſcitus ſingulare per totam illam peregrinationē fidei, grauitatis & conſtantię documentum dedit. Non tamen ſine aperto yitę diſcrimine, cū Poloni Carolo mortuo clandestinum Regis diſceſſum indignē ferentes in comitatum omnem, qui à præcipiti eius abitione relictus fuerat, impotentiffimē ſauirent, Vidūſque ab illis deprehenſus in ſumma rerum deſperatione verſaretur: niſi quam toties aliis præſtiterat facundiæ operam in ſui ipſius uſum & ſalutem opportunē impendiſſet. Huius præſenti ope liberatus cum in Galliam ſe recepiſſet, non longo poſt interuallo indiſtis à Polonico Senatu comitiis in Poloniam remeare iuſſus eſt, vt Regis nomine illis intereſſet, ipſiūſque auctoritatem & nominis Gallici dignitatem pro ſua prudētia tueretur. Sed potentiorum diſcordiis & ſolita gentis illius vecordia res eò peruenit, vt & Henrico imperium abrogaretur, & comitia de noui Regis electione indicerentur. Ille, quòd rei tam indignæ ſpectator eſſe nolle, relictā Polonia conſeſtim in Galliam reuerſus eſt, eo

tempore, cum res Gallicæ longis bellorum  
offensionibus afflicte salutari eius opera plu-  
rimum indigeret. Règi enim qui potissimum  
in eius consiliis acquiescebat pacis inter suos  
constituendæ suavor præcipuus ac administer  
fuit. Quod ipsum pius ille princeps & pu-  
blicæ salutis ante omnia cupidus in summo  
meriti loco posuisse visusest, quando & cum  
in eodem supremo Senatu Præsidentem appel-  
lauit, & à Francisco fratre Cancellarij mune-  
re honestatum lubentissimè approbavit. Sed  
non longum his frui fata concessere; Vidus  
enim post aliquot annos, & quidem paucis  
ante ipsius Francisci obitum diebus, ex diu-  
turni morbi tædio annum ætatis agens quin-  
quagesimum sextum è vita sublatus est. Ex-  
tant eius cultissimæ aliquot orationes in  
Senatu habitæ, aureæque de moribus poë-  
matia, quæ inter tot negotiorum fluctus  
admiranda ingenij tranquillitate concine-  
bat. Vir ad omnia natus, & profectò di-  
gnus qui ampliore à nobis elogio diceretur,  
nisi eius vitam à Carolo Pascasio disertissi-  
mo viro fusissimè scriptam docti omnes ha-  
berent in manibus.

*Paulus Foxius.*

ON dissimili fatorum iniuria idem annus, qui Pibracium abstulerat, Paulum quoque Foxium vt patria, sic ætate, & studiis ferè omnibus Pibracio coniunctum mœrenti Galliæ ademitt. Is patrem habuerat Ioannem Carmanij Comitem ex vetustissima clarissimâque Foxiorum stirpe, quæ à multis annis regias omnes totius Europæ familias affinitate sibi iunxit. Atque hæc generis nobilitas bonarum artium lumine, longoque rerum vsu illustrata viam illi ad Regum amicitias patefecit, à quibus amplissimas togæ dignitates ac Tholosanum insuper Archiepiscopatum adeptus est. Dúmque post multas legationes in Anglia, Scotia, Italia, de grauissimis rebus obitas Henrici tertij apud Gregorium Pontificem Orator præclarum illud munus Romæ quoque sustinet, iniqua Mors & planè intempestiua debitum illi sacræ purpuræ honorem inuidit.

*Laurentius Iobertus.*

AVRENTIVS IOBERTVS Valentiaë Cauarum honesta natus familia postquam & apud Parisios ex Siluij auditorio & inde trans Alpes ex Argentorij vsu & consuetudine Medicinæ arcana percepisset, in gymnasio Monspelienſi professus primùm inclaruit, collectamque his artibus famam frequenti lucubrationum prouentu latiùs propagauit. non vana eruditi ingenij, solertisq; iudicij ostentatione, dum præter varias quæstiones ex veterum placitis doctissimè agitas Paradoxa quoque plurima, resq; à vulgari philosophorum sententia remotas argutè subtilitèrque proponit & asserit. Futurus tamen cautior, si contentus iis, quæ in vsum eruditorum sermone Latino componebat, scriptionibus Gallicis abstinere maluisset. Naturam enim pro concessa Medicis facultate liberiùs euoluens temerè se in plebis imperitæ censuram atque risum obiecit. Eum



in aula vidimus à Rege Henrico tertio euocatum, cùm pius ille Princeps prolis in publicam vtilitatem suscipiendæ cupidus maximam voti sui spem in eius industria nequidquam collocasset: non suo, sed factorum vitio, quæ Galliæ tranquillitatem auertebant. Paucisque mensibus interiectis eodè ferè fato quo Rondeletius, cui mortuo in Academia præfecturam successerat, nec minori studioforum desiderio, Tholosa quoque Monspessulum rediens interceptus est.

---

*Marcus Antonius Muretus.*



VIS non miretur hominem Gallum & quidem in Lemouicibus natum, suo ipsius ingenio & absque vlla præceptoris opera cruditum tantos in literis fecisse progressus, vt præter exactam Græcæ linguæ scientiam ipsis etiam Italici peculiarem illam Latini sermonis laudem vnus eriperet? Neque verò id Muretus in oratione soluta solum, sed in versibus etiam affecturus

est, in quibus tam erat Catullo similis quàm ipse Catullus sibi. Accedebat ad excellens & diuinum illud ingenium incredibilis morum candor & vrbalitas, quæ mirifica suauitate hominum animos alliciebat atque attrahebat. Sed nescio quo malo fato ipsa sibi Gallia tantum virum inuidit. Quem errantem & profugum Venetiæ primum exceperunt, vbi honesto in otio variarum lectionum octo priores libros meditatus est. Deinde Roma ipsa ciuitate donatum & inter Hippolyti Atestini Cardinalis liberalissimi familiares receptum sibi cupidissimè vendicauit. Quo in celeberrimo totius Europæ theatro grauib; de reb; identidem orantem magna meritò nominis claritas est consecuta. Dum, quæ ab omnibus nationibus & principibus exteris certatim inuitatur, patrique studio & contentione, auctis quotidie stipendiis, à summo Pontifice retinetur, vix quinquaginta septem natus annos felix & solida literarum gloria fruens anno supra sesquimillesimum octogesimo quinto fati concessit.

*Petrus Ronsardus.*



**P**ETRO RONSARDO è Pannonia oriundo, apud Vindocin-  
nos equestri familia nato, ab  
Aurati disciplina Græcè Lati-  
néque doctissimo, patrij sermo-  
nis instauratori, Poëtarum ab  
omnibus seculis secundum Maronem facile  
principi, hoc Epicedium pro Elogio dica-  
uimus,

**H** *As tibi Parisiis sacras in collibus aras,  
Magne parens grata ponimus ecce manus.  
Tu patrij Deus eloqui, quo numine quondam  
Pierias Francum protulit vber opes.  
Ergo Velut Cereri & Baccho sua sacra quotannis  
Vouerat & festos gens operata dies.  
Sic tibi quotquot erunt Galli, tua turba, poëta  
Annua solenni carmine vota canent.  
Iamque tibi primos ecce instauramus honores,  
Et vitæ aggreddimur dicere facta tuæ.  
Vt clare antiqua deductus origine gentis  
Threicio dederis tempora prima Deo.*

Ut mox & laudis meliore incensus amore  
 Malueris Musas Graia per antra sequi.  
 Nullus erat tua qui regeret vestigia callis  
 Saxa per & nullo culmina trita pede.  
 Tu tamen & salebras & sentibus aspera vincis  
 Omnia, nec cæcum te remoratur iter.  
 Donec Hyanteo teneras à fonte sorores  
 Deducas patrios victor ad vsque lacus.  
 Inde ubi per medias Nymphis comitantibus vrbes  
 Conspicuum insigni tollis honore caput.  
 Protinus ut r'eo surgit cum Lucifer ortus,  
 Cum tenebris fugiunt astra minora suis,  
 Sic rudis incultos aluit quos Gallia vates  
 Fug're ad vultus lumina prima tui.  
 Nunc igitur laudésque hominum laudésque Deorum  
 Concinis, aut blandus quæ tibi dictat Amor.  
 Nunc ortus rerum varios, verique latebras  
 Quæris, & audaci tendis in astra via.  
 Martia nunc resonas Heroo prælia versu  
 Francósque à Phrygio Principe ducis auos.  
 Néue tibi veteres contendant laude poetæ  
 Quotquot habet Latium, Græcia quotquot habet,  
 Nil intentatum mens indefessa reliquit,  
 Siue placent citharæ munera, siue tubæ.  
 Felices Ligeris ripæ, felicia Cosmi  
 Fana tui, vberibus Turoque diues agris,  
 Et quacunque tuo demulsa carmine gentes

*Hausere ætherios vatis ab ore fauos.*  
*Te nemorum coluere Dea, te sæpe canentem*  
*Mænaliis Faunus visit ab usque iugis.*  
*Te stupuit Natura parens: nec te tua cepit*  
*Gallia, quæ tanti ciuis honore tumet.*  
*Sed norunt late populi quosque Ultima Thule,*  
*Quosque alit Hesperio terra propinqua freto,*  
*Quique bibunt Istri gelidum septemplex amnem,*  
*Quique Euphrate habitant & loca cincta Tigri.*  
*Salve cura Deum, salve ipsis addite Diuis,*  
*Vindocini æternum sidus bonosque soli.*  
*Non tibi querenda est alieno fama labore,*  
*Digna nec ingenio laus satis vlla tuo est.*  
*Tu tamen hæc cape vota lubens, seu lactea mundi*  
*Te plaga, seu magni te tenet aula Iouis.*  
*Et si quis tibi restat amor, si cura tuorum,*  
*Nec te operis memorem iam piget esse tui,*  
*Respice nos, animis que fauens illabere nostris,*  
*Tractamus patriæ dum noua plectra lyra.*

Fuit Ronfardus excelsa statura, decoro  
 vultu, qui generosum quendam animi vi-  
 gorem diuinitus afflatum facile indicaret,  
 corpore vegeto quidem robustoque, sed sub  
 ingrauescentem ætatem ex præteritis vigiliis  
 fracto ac debilitato: neq; sexagesimum ætatis  
 annū excessit, articulari morbo sæuissimè ve-

xatus, cuius diuturnis molestijs anno tandem supra mille & quingentos octogesimo quinto mortem obiit, ac in Turonum suburbio ad Cosmi fanum, cui præerat, sepultus.

---

*Luduoicus Duretus.*

**C**VM multos in medicæ artis professione præstantes viros hætenus tulerit Gallia, quem Ludouico Duretus non dicam præferret, sed adæquaret, profectò vix vllum habuit. Vt qui locos Hippocratis planè omnes memoria teneret, prælectionesque suas incomparabili sermonis venustate ac suauitate cōdiret; cùm de superiore loco disputātem neque honesti vultus decor, neque vocis & motus elegantia deficerent. Is in vltima Burgundia natus Lutetiam admodū puer ad literarum studia capessenda missus est. Qua in vrbe totius orbis terræ florentissima sedem nactus ingenio suo dignā quicquid vitæ fuit in perpetuo solide laudis cursu peregit: solidioris tamen futuræ, si quod summa eius eruditio postulabat, partam assidua docendi morbosque profligandi opera existimationē pari scribēdi labore cumulasset.

Hanc autē nominis per literarum monumēta propagandi negligentiam numeroso præstantissimæ sobolis prouentu abundè rependisse visus est; Vno etiam ex filiis paterni muneris successore; Qui eius functionem ab ipsa adolescentia ingressus admirabile statim eruditi ingenij argumentum præbuit, & patris in Coacas Hippocratis prænotiones opus inchoatū non absoluit modò, verum etiam utilitatis publicæ cupidus in lucem emisit. Cæteros autem sibi vindicat Iurisprudētia, cuius opibus instructi nunc in foro Parisiensi magna cum facundiæ laude versantur. Obiit Duretus anno salutis cix 15 xxcvi ætatis Lix morte nō dum satis matura, sed placida, & (quod imprimis tanto medico dignum erat) omnino præuifa. Cuius aduētū multa de numinis benignitate præfatus, vxore liberisq; salutatis tanquā in blādisimum soporem iucidisset, expirauit.

---

*Arnoldus Ferrerius.*

**N**usquam aliàs illudentis fortunæ maius argumētum apparuit, quàm in Arnolde Ferrerio Tolosate Iurisconsulto sui temporis eruditissimo, qui de legum professore Senator, Inquisi-

tionumque postea Lutetiæ præses & Concilio Tridentino regis nomine summa cum dignitate interfuit, & ab eodem principe missus ad Venetos Orator maxima regni negotia diu splendidèque & fideliter administravit. Eo tamè laboris & industriæ fructu, ut qui animum ad spes amplissimas hinc erigere debuerat, stipendiis ipsis fraudatus & ex alieno prope demersus in Galliã redire cogeretur, nec ei porro quod impenderat, satis opportunè præstaretur. Incidit enim in extrema patriæ tēpora cum specie boni publici & catholicæ religionis tuendæ bellum toti Gallię funestum regni quondam opulentissimi res affligeret ac penè perderet. Quare non satis pro merito beatus senex ad Henricum Borbonium tunc Regem Nauarræ confugit, principem omnium virtutem fautorem & eximium vindicem, à quo nō benignè tantum exceptus, sed ob excellentis doctrinæ famam sacri etiam sigilli custodia ornatus est. cœperatque facilioris & commodioris vitæ spes aliqua tandem affulgere, cum amplissimi muneris administrationem vix ingressus (tanquā ei prosperæ sortis occasio tantum ostenderetur) nec ita multis ante annis quam ipsi Henrico Gallicum Imperium obveniret, in ipso repente lumine concidit. Intem-



pestiuè quidem, sed si hominis mentem æstimes, maturè. Nam & ab illo sene sapientissimo vox audita est, cum ex vrbe Venetorum decedens honorum se ac vitæ saturum esse profiteretur: vt quorum in ditioe primus ad gloriam gradus ei contigisset (Patauij enim laureâ adolescens acceperat) apud eosdem regia legatione peracta supremam suæ ambitioni metam statueret ac figeret.

---

*Antonius Nicolaius.*



Ecepta Gallicis armis Neapoli, cum Rex victor assertum bellica virtute imperium legibus & iustitia tuèdum esse non ignoraret, ea Senatum in vrbe constituit, Cancellariique dignitati virum præfecit inter cæteros Gallia togatos illa tempestate nobilem Ioannem Nicolaium in Gallia Narbonensi claro loco natum. Qui & paulò mox Lutetiam reuersus primò quidem libellorum supplicum in Regia Magister, inde verò supremæ Rationum curiæ primarius Præses à Rege Ludouico XII. dici meruit. Functus est eo munere plures annos, donec ætate iam

grauior, abdicatis Reipublicæ curis & suffecto suum in locum Æmario filio, patriam inter cæteras Galliæ regiones vnã delegit, cuius in sinu tranquillum senectuti nidum poneret,,ac in ipso tandem S. Audeoli ad Rhodanum oppidulo (vbi maiorum domus & veteres erant penates) animam de Gallico imperio benemeritam Deo reddidit. Æmario natus est hic Antonius, qui & ipse paterni magistratus hæres ad quatuor & triginta amplius annos eum splendidissimè tenuit: eius itidem postea relicto successore Ioanne filio libellorum quoque supplicum antea Magistro, cuius eximijs virtutibus hodièque fruitur, ac vti nam diu fruatur, tanto felix alumno Lutetia. Itaque quòd raro, ac ne rarò quidem hactenus vlli contigit, hoc ornatissimæ Nicolaiorum familiæ singulari Superûm benignitate concessum est, vt quatuor ex ea summi viri seriatim & ex ordine hunc honorem, qui suo in genere supremus est, integro iam seculo possiderent. Cæterum in Antonio viguerunt animi dotes quamplurimæ. Magnum enim fuit eius in omni re iudicium, magnum & indefessum recti studium, dignaq; amplissimi ordinis principe viro grauitas, & incomparabilis in munere administrando tum fides tum vigilantia. vt

in eos, qui Regias opes & pecuniam publicam impuris manibus tractarent, nemo vel inquireret exactius, vel maiori cum seueritate animaduerneret. Qua hominis integritate non minus quàm officij, quod gerebat, amplitudine permoti Reges intimis eum regni consiliis & arcanis vltro ac libenter admisere. His igitur titulis honestatus & florebat existimatione & magnam apud omnes auctoritatem obtinebat. Ac ne ad solidam eius fortunam desiderari quidquam posset, hanc etiam ornabant paternæ & auitæ opes innocenter partē & habitæ. Statura fuit procera sed recta, colore non satis viuido, nec valetudine multum stabili, qui nimirum inexhausta sanguinis copia laborans frequentiore pleuritidis incommodo conflictaretur. Hoc tamen habitu vir frugi & sobrius peruenit ad annum vitæ LXII. Ac postremò pridie Nonas Maias anno salutis CIO. IO. XXCVII. in ædibus atque adco in amplexu P. Amorij Senatoris clarissimi, quem pro veteri necessitudine inuiserat, ictu sanguinis extinctus est. Interfuerat paulò ante sanctiori consilio Principis, ibique, vt incredibili ardebat erga Rempublicam studio, sententiam de maximis regni negotiis tanta contentione dixerat, vt hæc inde repentina

mors ei contigisse credatur. Sepultus est Lutetia ad Mederici fanum in Ballietorum sacello, qua ex familia inter Parisienses maximè illustri & veteri maternam originem ducebat.

### *Rupea Pictavienses.*



VBIT illius temporis iucundissima recordatio, cùm Rupeam matrem doctissimam sanè fœminam de omnibus disciplinis mira quadam facilitate & copia differentem filia non indolentior excipiebat. quæ matris & sua ipsius lepidissima carmina tantavenuſtate recitabat, ut omnium qui aderāt animos in admirationem conuerteret. Aderant autem quotidie plurimi literarum & elegantiaæ amantes viri, qui ad illarum ædes tanquam ad aliquam academiam cupidissimè confluebant: nec ullus erat qui nō inde rediret politior. In matre apparebant eximia pulchritudinis vestigia, in filia flos ipse integerrimus & nitidissimus elucebat, morum in vtraq; tam incredibilis consensus, tantaque

stri populares non immeritò glorianur. Huius quidem pater Claudius vir egregius pariq; votorum religione Themidis Phœbique sacris initiatus, ne in tenebris atque otio delitesceret, in forum Parisiense relicto Iuliodunensi agro se contulit, vbi ad exactam ætatem & fama & fortunis auctus felicissimè consenuit. Hoc vno maximè beatus quod talem ex se filium edidit, cui si vitæ vsura contigisset longior vix vllum aut certè paucos tota Gallia pares fuisset habitura. Quis enim ad solidam Iuris vtriusque prudentiam cetera bonarum artium ornamenta cumulatiùs vnquam attulit? quem aut in dicendo disertiores, aut in muneribus obeundis castiores, aut in omni denique vita sanctiorem sumus hætenus admirati? Cùmque facultates abundè suppetere, quibus pro more nostris vsitato statim ex ephœbis excedens ad summos in Republ. magistratus progredieretur: tamen, quæ fuit eius vel modestia vel prudentia, non priùs eò contendere voluit, quàm in priuatorum causis agendis iudicium quoddà à Natura solertissimum habebat vsu etiam & exercitatione confirmaret. Ac primò quidem vir factus libellorum supplicum in Prætorio præfecturam adeptus est, cui mox & Regij pro-

curatoris in augusta Rationum curia dignitatem adiecit, hunc fructum sane amplissimum ex ea consecutus, quòd non modò ex archivorum tabulis ( quæ quoties libitum fuerat ipsi patebant) verumetiam ex virorum virtute ac rerum vsu præstantium ( quibus præclarissimum illud collegium constat) consuetudine & consortio solebat eorum quæ ad totius rei Gallicæ statum pertinent quotidie peritior euadere. Quod postea lectus etiam Regis in Senatu patronus magno sibi sensit esse ad gravissimi muneris functionem præsidio & ornamento. Sed surgentem eius gloriam ulterius fata progredi vetuerunt. Febris enim oborta sub Autumnum anni crio. io. xxcvii. vix quinque & triginta natum annos eripuit, magnòque patrum mœrore os illud eloquentissimum & sapientissimum ærerno damnauit silentio. Defunctum in Senatu laudauit Iacobus Faius Speſſæus eius collega virtutùmque non minùs quàm muneris & laborum socius, quem sua post eruditio & aduersis temporibus certissima in Principem fides ad supremum tribunal extulere. Cum enim sit hoc in more positum vt primis Curix auspiciis Regius Aduocatus oratione sua cæteros caussarum patronos ad officium hor-

retur ac suscitetur, non alio commodius exemplo se id affecutorum sperabat, quàm si talem tantumque virum illis ad imitandum proponeret.

---

*Elias Vinetus.*



S è Vinetorum pago apud Santones in agro Barbeziensi natus meliorem ætatis partem Burdigalæ in docendo collocavit. Si paucos annos exceperis eidem muneri obeundo in Lusitania quoque impensos, cum ipse (quæ fuit eruditionis fama) vnà cum Buchanano, Gruchio & aliis eiusdem notæ viris à Ioanne tertio Lusitanorum Rege ad instaurandum Conimbricæ gymnasium euocatus fuisset. Vnde Burdigalam reuersus & ipsi demum scholæ præfectus quam ab initio vitæ rationem instituerat ad extremam senectutem retinuit, frequentique nec infrugifera voluminum editione cumulavit: siue ea æstimes quæ humanitatis præcepta continent, ac potissimum vberrimos in Aufonij poëmata commentarios: siue Mathematica,

tum ea quæ ex Euclide trāstulit, tum quæ suo ipsius ingenio ad Arithmeticam Geometriāq; pertinentia persequutus est. Periit octogennarius senex prid. Id. Iun. illius anni, quem Contrasiense prælium & Germanici exercitus ad Ligerim clades insignem fecere.

*Germanus Valens Pimpontius.*



Germanus Valens Aurelianus raræ adolescens indolis & eximie doctrinæ ad Franciscum primum productus dum studiosus ille Princeps inter molliora cibi tempora eruditorum, qui ferè adstabant, sermone & disputationibus oblectatur, adeo prolixè & feliciter opinionem de se cōceptæ satisfecit, ut ab omni corona præsertimque à Rege ipso mirificè laudatus, acerrimos inde sibi stimulos admoueri sentiret, ad ea persequenda, quæ tam auspiciatò cœperat cum elegantioribus Musis habere commercia. Ut nec cum deinceps in toto vitæ cursu vel Senatoria dignitas, vel suscepta Regis nomine domi forisque negotia, vel ipse



deniq; seni delatus Aureliæ patriæ vrbis episcopatus à iucundo & optabili Dearum vsu reuocaret. Erat enim ingenio mirè fœcundo & valido, quod varia simul diuersaque studia nullo prorsus incommodo complecteretur. Ex plurimis autem eius operibus, quorû bona pars viuenti adhuc auctori bellorum iniuria periit, vnum illud extat oppidò magnum & laboriosum, quo Maronem noua quadam cõmentandi via & ratione interpretatus, non scholiis tantum & notis, verum etiam accurata diligentique Græcorum cum Latinis collatione obscurioribus diuini illius poëtæ locis lumen afferre contendit. Hunc enim sicut & reliquos vtriusq; linguæ poëtas à puero semper in deliciis habuerat, scribebatque ipse nō numquam pressiore quidem, ob idque forsità obscuriore stilo, sed quæ sententiarum vbertate & pondere non auersas eruditorum aures vtique cāperet ac deliniret. Eiusmodi poëma legimus ab eo conscriptum anno ante infandum Regis parricidium altero, quo poëmate septuagenarius vates imminuentem Galliæ tempestatem præsagens, miserabilem rerum statum deplorauit: aliquantòque post Meduni ad Ligerim suæ Diœcesis oppidulo rebus humanis exemptus est.

*Joannes Guellaus.*


VIVS amplissimi viri præclaro exemplo videre licet, quãto versentur in errore nonnulli, qui splendido & equestri sanguine genitis belli modò studia non etiam pacis artes conuenire arbitrantur. Is in Aruernia natus patrem habuit Franciscum vetustæ nobilitatis Equitè, Comitatus Aruerniæ Governatorem, qui duos genuit filios, Antonium natu maiorem & Ioannem hunc nostrum, quem eo consilio pater bonis literis ac disciplinis tum in Gallia tum in Italia curauit erudiendum, vt is aliquando sacris initiaretur. verùm Antonio præmaturè sublato, cum deinceps nobilissimæ familiæ spes omnis ab hoc vno penderet, facile consensit prudēs & rerū peritus senex, vt repudiaret filius consilium de cælibatu, nec eò minus in literarum otio perseueraret, augustoque Senatorum ordini sese demum insereret. Inerant ei, quæ magna sunt ad res agendas præsidia, & adiumenta solertis ingenij vigor, vigilantia, fides

probitas, aliæque summæ virtutes, quas in veteris amici & clientis filio libenter admirata Catharina Regum mater ipsius Aruerniæ Comes, consentaneum esse iudicauit eum ad maiora prouehere, tractandisque grauioribus regni negotiis adhibere. Itaque recrudescente apud nos identidem ciuili dissidio Guellæus bonam ætatis partem in legationibus per Galliam obeundis ita exegit, vt fideli eius opera & consilio Septimania, Normania, Burgundia, & item aliæ nobiles Gallici imperij prouinciæ suo quæque tempore pacarentur, ad officiumque reuocarentur. Cumque & in ipsius Burgundiæ summa curia primas tenere meruisset, consedit ibi ad aliquot annos, iudiciisque tandiu præfuit, quoad Ægidio Burdino generali Regis cognitore vita functo redire Lutetiam est iussus, vt in demortui locū & gradum ex ipsa Caroli Regis optione succederet; Adeo quidem ægrè ferente multūque renitente omni Burgundia, vt in publicis eius comitiis deligerentur, qui ex Ordinum decreto Regem adirent, Præsidemque de se bene meritum, quamuis irritò conatu, supplices ab eo reposcerent. Nec verò minore gratia floruit apud Caroli fratrem & successorem Henricum, cuius deinde permissu &

voluntate suffecto suum in locum Iacobo filiorum natu maximo iam tum ob ingenij doctrinæque laudem ea functione dignissimo, ipse ad Præsidis in eodem Senatu fastigium ascendit, honestamque domum suam hoc duplici maximarum dignitatum ornamento cumulauit. Exortæ sunt exinde turbulentissimæ tempestates, quibus infame funestumque dedit initium Parisiensis illa seditio, cum Rex vrbe cedere, Carnutumque se recipere coactus est. Quam populi furentis audaciam Senatus, pro eo ac debuit indignè ferens, ipsique Regi fidem interea suam per legatos probare, & quid consilij capiendum in tanta rerum confusione videretur aperire cupiens, Guellæum quem ei gratum & acceptum esse sentiebat huic præclaræ legationi præfecit. Sed vetuit infelicis Galliæ malus genius ne generosis consiliis & omnem belli segetem haut dubie præcisuris maturè fides adhiberetur. Ille peracto negotio Laurellum in suum (id castello nomen est) animi quidem gratia, sed non sine raro quodam Fortunæ beneficio se contulit. Quid enim ei vel ad animi tranquillitatem beatius, vel ad nominis famam honestius accidere poterat, quā

ex vrbe factiosa moxque turpiter à Principe defectura sese tam opportunè subducere? Verum intra paucos menses (cum annum ætatis climactericum ageret) in illa iucundi secessûs amœnitate fatali morbo correptus interiit, ibidemque domestico sacrario sepultus, quod eius in memoriam vxor & liberi mœrentes æterno pietatis argumento posuere. Vxorem enim duxerat ex Belsiensi nobilitate splendidis cognationibus insignem, ex qua tulit quinque filios Iacobum ipsum non minus virtute, quàm Regiæ procurationis auctoritate nobilem & Franciscum Turonensis Ecclesiæ sacrum Antistitem, itemque Alexandrum & Ioannem bellica laude florentes viros, qui quatuor superstites hodie viuunt. Carolum verò iampridem acerba mors in obsidione Drocensi fortiter & strenuè dimicantem oppressit. Cum nemo esset æqualium, qui rigidi Martis asperitatem vel maiore morum suauitate & elegantia, vel vberiore literarum scientia & cognitione temperaret.

*Joannes Stephanus Durantus.*

 V o te nomine appellem Tolosa, felicemne an miseram, quæ cum huius tantiviri natalibus & educatione gloriaris, eiusdem indignissima cede perpetuâ nomini tuo maculâ inuisti? ut vel hinc satis appareat, huius vestræ factionis homines (de modestioribus non loquor, nec eorum famæ quidquam detractum volo) dum religionis Catholicæ causam libidini suæ prætendunt, non alio spectasse, quàm ut bonorum civium internecone teterrimam huic imperio pestem exitiumque molirentur. Quem enim in hac animorum dissensione vidit Gallia qui religionem ipsam aut coleret constanter, aut maiore studio, labore, diligentiaque promoueret? Comprobat hoc celebris illa de ritibus Ecclesiæ lucubratio, quam ut Catholicis partibus apprimè utilem Sixtus ipse Pontifex maximus tanta excepit cum admiratione, ut & eam Romæ suis impensis excudi iusserit, & eius auctorem Durantum in-

credibili fauore beneuolentiaque fit amplexus. Quid igitur superest, nisi vt Catholicæ religionis hostes pronunciemus eos, qui tam acrem & probatum eius propugnatorem stolidè crudeliterque sustulerunt? Erat is patre Senatore genitus, vtque patricium decebat, omnibus artibus eximio Iurisconsulto dignis liberaliter adornatus, qui postquam Regiæ aduocationis in patrio Senatu munus per aliquot annos tenuisset, mox ad ipsum Senatûs principatum admirabili cum totius vrbis & prouinciæ lætitia peruenit, primariusq; Præses in locum ornatissimi viri Io. Dasij soceri sui renunciatus est. Augebant in dies hanc omnium ordinum approbationem spectata hominis integritas, perfectaque Iuris vtriusque prudentia cum summa semper æquitate coniuncta, donec cæsis apud Blæsios Guisianis fratribus, Tolosæ vt & aliis in locis oborta est furiosa repentè seditio, cui dum vir ille amplissimus pro suis muneris auctoritate resistere, Regiumque nomen tueri ad defendere nititur, à factiosis abreptus & intra cœnobij Dominicani septa in custodiam traditus, indeque post aliquot dies in sæuientis plebeculæ furorem obiectus, immanissimè tandem trucidatus est. Additum &

sceleri scelus, integerrimo viro Iacobo Dasio Præsidis filio, qui Durante in Aduocati Regij dignitatem successerat, simili furoris impotentia confosso. Duranti autem iustissimū desiderium elapsis aliquot annis hoc magna ex parte lenire potuit, quod P. Fabrum alterum à Cuiacio restitutæ Iurisprudentiæ lumen Rex æquissimus in eodem Senatu principem collocauit.

---

*Augerius Ferrerius.*

**A**Vgerius primæ notæ Medicus Tolosæ natus est patre quidem professione Chirurgo, sed more veterum vtramque Medicinæ partem exercente: cuius ductu & studio maturè institutus patriæ ciuibusque suis ab adolescentia totum se dedit. Vigebat in eo flagrantissimum doctrinæ studiū, neque modò Medicinam, sed eius etiam adiutrices Mathematicas disciplinas tenebat omnium perfectissimè. quodque ad leuandos ægros nō mediocriter conducit, hilaritatem quādam & festiuitatem in vultu, in sermonibus, in omni actione præferebat. His facultatibus eminens



commendante Ioanne Bertrando Iuris præfecto, qui sacram postea purpuram adeptus est, Catharinæ Regum matri medicas operas aliquandiu præbuit, Romamque mox in eiusdem Cardinalis comitatu profectus quam in Gallia famam & libris editis & assiduo medicinæ faciendæ labore quæsierat, latissimè in Italia propagauit: ac inde Tolosæ suæ redditus est. Ibi postquam ad septuaginta quinque annos integerrima valetudine vixisset, atrocibus demum ac diuturnis intestinorum torminibus paulò ante quàm Regina ipsa decederet, sublatus est è vita, dum seueriore Bodini censura notatus prouocatusq; susceptâ aduersus eū de Republica disputatione adornaret.

---

*Ioannes Auratus.*



*Vid memorem Auratum patrem, plenissi-  
ma cuius*

*Copia Pierias vndique fundit opes?*

*Auratū à quo vno vatū, seu fonte perenni  
Gallorum Aonia labra rigantur aqua?*

Libet enim hîc versus attexere, quibus iam-  
pridem à nobis dictus est idem ille, cuius

nunc Elogium ordimur, Ioannes Auratus vatum in Gallia coryphæus, ex infelici Lemouicum solo velut Hesiodus alter è Bœotia natus. Qui veteres poëtas omnes tanta dexteritate iuuentuti explicabat, vt ex eius Musæo, tanquam ex Helicone quodam, innumeri nostra ætate vates prodierint. Canebat autē ipse versus & Græcos & Latinos, dum per ætatem licuit, omnium scitissimè: neque solùm in Lyricis Horatium æmulabatur, sed etiā ad Pindari numeros Latinas Odas inusitata venustate effingebat. Quæ res illi maximam apud omnes nationes nominis celebritatem peperit: eoque maiorem quod & summa eruditione & acerrima coniectura præstans optimi quoque Critici laudem quotidie mereretur. Sed cum factus è Doctore Poëta Regius profitendi prouinciam Gulonio genero Græcæ linguæ doctissimo transcripsisset, nec vtique iam senior à scribendo sibi temperaret, certè nonnihil de pristino vigore ac diligentia visus est remisisse. Nullus enim nouus liber in lucem exibat, quin sibi commédatricem Aurati Musam pro Mercurio itineris duce & auspice deposceret. Nullus in tota Gallia paulò nobilior è viuis excedebat, quin ab Aurati lugubribus Camœnis, tanquā Præficus solemnes

solennes funeri questus & lacrymæ sufficerentur. Quo fiebat vt in tanta similium argumentorum multitudine beata illa quondam vberioris ingenij vena non aresceret quidem sed fundo propior lâguidius negligentiusque flueret ac se traheret. Ad extremum ducta recens vxore vndeuginti annorum puella, cum intempestiuis amoribus licentiam poetice iocosè prætexeret, octogenarius senex emisit animam, qua tempestate Henricus tertius afflicta Gallia consulens publicos regni conuentus apud Blæsios iterum agebat.

*Petrus Bulengerus.*



Vratum ad superos demigrantem non longo interuallo secutus est eius olim studiorum comes & sub Tusano cōdiscipulus, quāquam aliquātò iunior, Petrus Bulengerus Trecensis vir Græce & Latinè cum primis eruditus, qui si celebriore loco docuisset, poterat inter clarissimos huius ætatis professores locū mereri. Sed quod fuit hominis moderati minimeq; ambiciosi inge-

nium, Iulioduni forte sua cōtētus in ciuium liberis erudiendis tacitè consenuit. Similique modestia cū Historiam de rebus Gallicis partim ex probatissimi scriptoris G. Halliani Frāciæ Historici opere Gallico traductam, partim suo ipsius labore & industria concinnatam à primis regni exordiis ad hæc ferè tempora Latina vbertate perscripsisset, hanc lucubrationem sanè egregiam exemplo suo latere maluit. Quæ si quando à studiosis eius filius ac præsertim à Iulio Cæsare Ecclesiaste regio præstantis doctrinæ viro in lucem proferatur, non dubium est, quin hunc auctori suo locum iure deberi liquidissimè sit probatura.

---

*Carolus & Iacobus  
Sammarthani.*



E tamen videar (quod ille ait) alienos agros colere, proprium negligere, liceat hic postremò celebrare duo Sammarthanæ gētis honestamēta Carolum & Iacobum patruos in eos: quorum alter Iurisprudentiam alter Medici-

nam coluit, vterque Græcam linguam, philosophiâ, & ingenuas omnes artes non leuiter aut perfunctoriè, sed seriò diligenterque amplexus est. Diuerso tamen more, nec eodem studiorum instituto. Carolus enim auræ popularis auidior perutiles de re sepulchralicòmentarios, itemque pias in Dauidis carmina commentationes, & multa varij generis poëmatia tum Latina tum Gallica publicauit. Iacobus autem licet Romani sermonis facultate perfectissimus, tamè quod homo esset inanis gloriæ nusquam appetens, totum istud scribendi studium facile neglexit, vberimas illas multiplicis eruditionis opes eodem quo se ipsum tumulo conditurus, nisi hæredes earum reliquisset filios elegantiora studia cum exercitatione forensi doctissimè adæquantes. Hic Scæuolæ patris, vestigia secutus Lodoice & Leonoræ Borboniis cœnobij Fontebraldei Principibus illustrissimis ad extremam vsque senectutem non modo in arte medica, sed etiam in consiliis & omnibus magni momenti rebus fidelem nauauit operam. Ille Margaretæ Nauarræ auspiciis causarum capitalium apud Alenconios præfecturam adeptus patronam fato functam luculentissima laudatione consecrauit. Nec ita multò post

integro adhuc æuo nimia vi & copia sanguinis oppressus emisit animam. cum sanguis ipse ruptis vasis magno se impetu circum præcordia diffundens natium repente calorem suffocasset.

FINIS LIBRI IIM.





SCÆVOLÆ.  
S A M M A R T H A N I  
E L O G I O R V M  
Liber quartus.

---

*Franciscus Roaldesius.*



Ereor equidem ne piis modestissimi viri Manibus temerè dicar obstrepere, dum importunus laudator eum ego hîc celebrare instituo, qui suis ipse scriptis æternæ posteritatis memoriæ mandari maximè omnium potuit, nec voluit. Roaldesius enim (quo nemo vnquam diligentius in assidua doctrinæ peruestigatione versatus est) contumaci quodam gloriæ contemptu honestum illum & optabilem studiorum fructum, qui ex dulcissima immortalitatis spe percipi

M iij

solet, eo vsque reiecit ac repudiauit, vt Soçra-  
tis exemplo sola docendi opera contentus ni-  
hil ferè in vita scriptum reliquerit, quo se  
posteris aliquando vixisse testaretur. Id verò  
testabūtur omnes eius æquales Iurisconsulti,  
qui frequenter & honorificè suis in libris tam  
rari & præstātis viri nōmen vsurpauere. Duó-  
q; ante alios huius disciplinæ antistites Cuias-  
cius & Hotomanus, quorū vterque Roalde-  
sium tanti fecit, vt eum exorta inter ipsos de  
Iuris interpretatione cōtrouersia iudicē fer-  
re non recularet. Omniū enim optimè noue-  
rant in exactissima totius antiquitatis Roma-  
nique Iuris cognitione nullum esse hoc ho-  
mine maiorem aut superiorem. Quinatus  
apud Ruthenos & pia sacrificuli cuiusdam  
cura primis literis imbutus, continuóque  
Tholosam perductus, cūm adolescens philo-  
sophiæ studiis & curiosa rerum Naturæ con-  
templatione ad aliquot annos animum o-  
blectasset, processit inde ad Iurispruden-  
tiam, acceptaque apud Augustoritum à Ro-  
berto Irlando Antecessore sui temporis cla-  
rissimo laurea, profitendi mox laborem ag-  
gressus est. Quo in munere per omnem de-  
inceps ætatem raras admirabilis doctrinæ di-  
uitias in variis Galliæ gymnasiis iuuentuti stu-



diosæ liberaliter expediuit. In id, credo, tantum à Deo immortalis reſeruatus, cum in cunis tenellus adhuc infans vtroque parente peste ſublato, infectiſque cæli vitio totis ædibus, ipſe vnus præter omnium expectationem euasit incolumis. Fuit autem vltima ſtudiorum ſedes Tholoſa ipſa, vbi poſt lacrymabilem Duranti Præſidis, quem vnicè colebat, aliorumque bonorum ciuium cædem accedente ad mœrorem dyſenteria ſeptuagenario prouectior è viuis exceſſit.

*Robertus Garnerius.*

**M**Vſis aſpice Ronſardo ex Italia in Galliam traductis, primus noſtrorum Iodelius acerrimi vir ingenij Tragicum poëma exprimere aggreſſus eſt, paulò tamen adhuc durior ſtylo, minusque dilucido, ſed qui vel ipſa operis nouitate ſic placuit, vt cum in Henrici II. aula magnifico veteris ſcenæ apparatu Cleopatrz fabulam dediſſet, incredibilem de ſe tota repente Gallia famam accenderet. Succedit ei Peruſius poëta ſanè

terfior & politior, adeoque nisi mors imma-  
turius obfuiſſet, Gallicus Euripides erudito-  
rum iudicio euafurus. Vtrumque autem ſine  
controuerſia ſuperauit Garnerius noſter Cœ-  
nomano ex agro, Senecæ quidem ille potius  
quàm Græcorum æmulator, ſed & rebus &  
perſonis ita ſemper accommodatus, tam cre-  
ber ſententiis, tanta verborum vbertate locu-  
ples, vt veterū cuilibet comparari poſſe me-  
ritò cenſeatur. Extant eius Tragædiæ nouem,  
quas in deliciis habent Galli omnes hanc in-  
genij facilitatem admirati, cuius beneficio  
potuerit inter ſeuera togæ ſtudia in pangen-  
dis carminibus, & quidem in eo genere quo  
difficilius & operoſius nullum eſt, tam dili-  
genter aſſidueq; verſari. Quæſitoris enim in  
patria dignitatem diu tenuit, indeque iam  
proiectior in magnum aulæ Senatū à Prin-  
cipe allectus eſt, nec ullum vitæ tempus à Re-  
publica vacuum exegit. Qui verò ſolebat in  
ſcena tristes aliorum caſus & querellas effin-  
gere, parum abſuit quin ipſe funeſtiſſimæ  
Tragædiæ non leue argumentum daret, in-  
ſigni domesticorum perfidia & audacia: qui  
domus expilandæ cupidi Garnerium ipſum  
& eius vxorem cum tota familia veneno tol-  
lere conſtituerant, peſtis contagionem ſæ-

uissimè tum grassantem tot cumulatis funcri-  
bus obtensuri: nisi nefarij conatus & consilij  
tota vis hæssisset in vna vxore, quæ statim  
hausto poculo manifesta veneni signa pro-  
didit. Nec enim passa est Nemesis integer-  
rimi sui mystæ sacros penates à tam flagitiosis  
& perditis hominibus impunè violari. Per-  
uenit ad annum vitæ duntaxat quinquagesi-  
mum sextū, fatóque functus est Cœnomani  
& iuxta coniugis carissimæ cineres Fráncisca-  
na in æde tumulatus.

---

*Jacobus Faius Speßæus.*



Artholomæus Faius Lugdunēsis  
familia natus cum primis hone-  
sta, plurimisque & maximis co-  
gnationibus illustri, sed ab in-  
genij cultu lōgè clarior sola do-  
ctrinæ virtutisque commendatione in Sēna-  
tum assumptus est, præsidisque demum offi-  
cio fungi promeruit. Habebat is vxorem ex  
nobili Violarum stirpe. Spectatæ probitatis  
matronam, vnde filium inter alios tulit hunc  
Iacobum, qui vt erat viuido & acri in-

genio, memoriaque planè mirabili præditus ad eam breui tempore peruenit eruditionis exuperantiam, vt vel adhuc adolescens & imberbis in Senatorium quoque ordinem ex patris eiuratione cooptaretur, nec ita multò post legatus in Sarmatiam de rebus grauissimis vna cum Nicolao Angenæo Rembolieto præcipuæ nobilitatis & virtutis Equite propinquo suo mitteretur. Ac eius quidem legationis præmium fuit libellorum in prætorio præfectura, quæ vix vlla est apud nos inter togatas illustrior. sed ea mox repudiata lectus in supremo Senatu filici patronus, tum demum in illo celeberrimo totius orbis terræ confessu totum sese, quantus erat, explicauit. Nemo enim ampliores multiplicis doctrinæ copias, nemo asperis temporibus maiorem inuicti animi constantiam ad graue & honestum illud munus pro dignitate obeundum attulit. Cuius eximiæ virtutis cum sæpe alias, tum verò sub ipsa Ibericæ factionis exordia magnum & memorabile dedit specimen, detectis non semel & in Henrici tertij Regis optimi conspectu magnificè repulsis eorum artibus, qui per speciem pietatis proposita sacri Con-

cilij promulgatione re vera hoc agebāt, vt Ecclesiæ Gallicanæ libertatem, ac per eius latus ipsam Principis auctoritatem inuaderēt, paulatimq; labefactarent. Secutus est funestissimus toti Galliæ tumultus, Rege per insignem furorem Parisijs expulso, Senatuq; obtam nouum & indignum facinus ad Turones translato. Cumq; omnes illius amplissimi ordinis Præsides partim ea tempestate disiecti ac dissipati, partim à coniuuratis intercepti procul ab aula tunc abessent, occurrit statim Regi Speffæus, qui tam arduum tantæq; molis magistratum pro sua singulari virtute sustineret. Is igitur abdicata Triuiriuali auctoritate & sussepto suum in locum Ludouico Seruino præcellentis eruditionis & expeditæ facundiæ, fidissimiq; erga Regem animi viro, factus præses non modo inter tot seditionum fluctus & procellas permansit ipse inconcussus in officio & fide, sed multorum etiam labantes erexit animos atque firmavit, acerrimumque Regij nominis vindicem & assertorem se præbuit. Sed vixit in ea functione paucos menses. Obsessâ enim iterum Lutetiâ, cum sese rapidis Iulij mensis caloribus in castra contulisset, nec à militaribus mu-

niis abstineret, lethalem accersuit febrem, qua indefinenter æstuante, sex tantum & quadraginta natus annos extremum vitæ diem exegit, eo quidem tranquillius & placidius, quod in Iacobi Augusti Thuani collegæ carissimi amico sinu piam & felicem exhalarer animam. Erat fronte minaci & seueræ, sed sermone comi faciliq̃ue nec à liberalibus facetiis abhorrente, magnus in eo candor, magna semper humanitas elucebat. Quodque fuit in viro tantæ doctrinæ sibi conscio valde mirum, tam longè aberat ab omni gloriæ fumo, vt cum tradere posteris multa posset ingenij sui documenta, tamen post absolutissimas tot veterum lucubrationes publicare nouos libros non modo superuacaneum esse duceret, sed etiam ineptum. Nec è diurnis eius vigiliis hodie quidquam legeremus, nisi duo lectissimi Senatores Iacobus Gilotus & Carolus Faius, hic Speßæi germanus frater, ille fraterna cum Speßæo beneuolentia iam à puero coniunctus amanter & piè curassent, vt Galliæ saltem eius aliquot superessent orationes, eo quidem conscriptæ stilo, quem Cæsarianum verè possis dicere. Ita sunt in his omnia natiui cuiusdam candoris & eloquen-

tiæ nusquam affectatæ plenissima, quæ generosum eius animum testentur & ab omni fuco alienum. Funeratus est Siluancæti magno Regis & omnium bonorum luctu xiiii. Cal. Octobr. anno supra mille & quingentos nonagesimo. Nec levis ea sanè felicitas fuit, quòd successorem se dignum in Præsidis munere nactus est Ioannem Forgetum summa æquitate, summaque prudentia, nec minore doctrina Senatore. n.

---

*Franciscus Hotomanus.*



Vit ille quidem auspicatus & felix annus quo Dij superi memorabilem de rebeli exercitu victoriam in agris Evriensibus Christianissimo Regi concessere. sed longè futurus felicior, nisi duo clarissima Iurisprudentiæ lumina Cuiacium & eius æmulum Hotomanum nobis idem eripuisset. Aliquantò tamen dispari nostrorum ciuium desiderio, nempe quòd illius incomparabili eruditione & industria quotidie Gallia magno suo commodo frueretur,



hunc vt è Silesia oriundum & in Germanicis Academiis maxima celebritate diu professũ ipsa sibi Germania penè totum arrogaret. Licet enim Lutetiæ natus esset patre Senatore, credereturquè in togatam illam dignitatem quæ est inter Gallicas nobilissima suo tẽpore successurus, eum tamen vt adolescentem nouitatis cupidum vel ipsius ætatis æstus, vel occulta quædam fati vis alio abripuit, longumquè in Heluetia, Germania, Prussia perpetuo studiorum labore florentem detinuit donec à Principibus Regiæ stirpis in Galliam reuocatus, obitâque mox ad Cæsarem & Germanicos proceres legatione patriæ denuò redditus, quam exteris docendi operam præbuerat, eandem & suis tũ Valentis tũ Auarici ad aliquot annos impendit. Iamquè pertæsus alieni cœli cogitabat in Gallia sedem ponere, certumque sibi larem aliquando tandem constituere, cùm (vt forte Lutetiam venerat) inopinata & improuisa Collignij nece tanquam exorta repente procella turbatus & reiectus proripuit se ad Allobrogas, indeque interiectis aliquot annis ad illas Germaniæ gentes erga literatos egregiè semper animatas velut in optatum aliquem & tranquillum portum se recepit. Fato functus est



Basilæ Rauracorum ex morbo intercute anno vitæ sexagesimo sexto, cum paucis ante annis libellum edidisset planè aureum, quo impendentem apud Gallos inter patrum & fratris filium de Regiæ successionis iure controuersiam non minus verè quàm eruditè in gratiam Henrici legitimi successoris explicauit. Erat omnino ille vir habili & fœcundo ingenio, variâque eruditione; ac potissimùm eximia quadam in Romanorum iure illustrando facundia conspicuus. Quod & posteris plurima eius opera splendidissimè scripta magis ac magis indicabunt.

---

*Bertrandus Argentæus.*



V M Argentæorum vetusta gens & nobilis, quæ ab Argentæo citerioris Britanniæ pago nomen accepit, ad quadringentos ferè annos continuata militarium virorum serie inter equestres Britannici nominis familias honestum locum tenuisset, primus eorum Petrus togam armis prætulit, virtutis-

perspicacibus, colore subaquilo, barbâque & capillis etiam in senectute nigrantibus. Cæterum inter suos ciues nullus erat in supellectile mundior, nullus in omni vitæ cultu ciuilior aut splendidior, vt pote qui omnes politioris ingenij viros aut aliqua virtutis opinione celebres, præsertim exteros, ac ipsos etiam prouinciæ proceres, vt fortè in urbem ventitabant, & mensa & hospitio frequens exciperet, lautèque cum primis & hilariter haberet. Nempe vir elegans animoque à sordibus & auaritia multum abhorrente his ferè in rebus, vt & in prædiis ædificandis, inque Musæo, quod preciosissimum possidebat, magis ac magis ornando amplissimas opes vberimosque patrimoniorum redditus liberaliter impendebat. hoc summè admirabilis, quòd inter tot liberioris vitæ oblectamenta, totq; insuper commentationum & priuati studij pulcherrimos labores, nullus vnquam dies efflaxerit, quin Reipub. ciuilibusque negotiis inseruiret. Peruenit ad annum LXXI, vltèrius etiam progressurus, vt erat valetudine firmissima, nisi ex infelici patriæ statu, quam à bellis ciuilibus hætenus immunem noua demum factio turbauerat, grauissimum animi mærorem collegisset, cuius acerbitate op-

pressus Eid. Febr. annno cix io xc ex hac vita decessit, cum pridie Franciscus Hotomanus clarissimum quoque Iurisprudentiæ fidus apud Basileam occidisset.

### *Iacobus Cuiacius.*



Iacobo Cuiacio in vrbe Tectosagum genere humili nato precessum ac planè caeleste ingenium Natura cōcesserat, cuius vnus ope, nec vllis præterea magistris adiutus, supremum illum eruditionis gradum attigit, quo latè conspicuum & nitentem hac ætate vidimus, dum incredibili nationum omnium concursu intima iuris & antiquitatis penetralia, quorum aditus penes illum erant, iuventuti aperiret ac resolveret. Docuit enim pluribus in locis, ac præsertim apud Biturigas, vbi maximo illius vrbis ornameto longissimè commoratus est. Invidente nequidquam Tholosa, ingrata patria, quæ ad exorientem alumni lucem caligans eum postulado cathedræ honore turpissimè repulerat. Quanti porrò hæc studia faceret

ex eo potissimum apparebat, quod cum rata & insolentis doctrinæ meritò facultas in augusto Senatu sedendi à Principe data esset, hac dignitatis accessione sanè amplissima lubens abstinuit, ne à dulci otio auocatus iuuentuti, quam semel informandam & à Barbarorum nugis reuocandam susceperat, vlllo temporis momento deesse videretur. Huic enim vnicè studebat, adèd quidem vt quò magis adolescentes ingenuos à nebulonum consuetudine auerteret, cum illis interdum conuiuari, & ad ludicra descendere non grauaretur. Hunc quoque fructum ex ea animi remissione colligens, quòd alacrior inde se referebat ad ea quæ in posteritatis vsum quotidie concinnabat ingenij sui monumenta. O beatâ, si sua nouisset bona, Biturigum urbem! At illa cùm tam excellens & nobile depositum omni cura diligentiaq; assèruare ac tueri deberet, indignissimè ipsa penè proiecit ac perdidit: oborto seditiosorum tumultu, qui dum præstantè illum virū de certa in Principē fide suspectū habent, non semel eum interimere conati sunt. Ita vt septuagenarius senex tot malorum pertæsus anno supra sesquimillesimum nonagesimo ineunte mense Octobri ad Superos

de migraret. Mortui vitam & mores Papirius Massonus qua solet styli elegantia munditiâ-que posteritati mandauit. Ex multis autem cœnotaphiis vnum vtpote cultissimum & à clarissimo viro conscriptum hic placuit apponere.

**S**olue comas Biturix, & scinde Tolosa capillos,  
 Impia si potis hic tangere corda dolor.  
 Magnus obit nostri lumen Cuiacius cui  
 Ille à quo potuit discere iura Themis.  
 Mens legum, recti vita æquè cultor vt ore,  
 Par laude & meritis, Papiniane, tibi.  
 Atqui debuerat producere longius annos,  
 Debuerat tantis & superesse malis.  
 Vt nostrorum animos desueta pace feroces  
 Ad pacem egregiæ flecteret artis ope.  
 Extincta legum sed lucem luce perosus  
 Vir pius haud vltra viuere sustinuit.  
 Vixit, quàm longo viguerunt tempore leges,  
 Legibus oppressis debuit ille mori.

IAC. CUIACIO V. C. DOCTORI  
 DE SE OPTIME MERITO  
 I. A. TH. M. P.

*Franciscus Noæus.*

Ic ille est qui vnus ferè hoc seculo vel in media ferri licētia posse  
 militarem virum integrè modē-  
 stēque viuere nouo prorsus exē-  
 plo demōstrauit. Enitebat enim  
 in eo rarissimus omnium virtutū  
 concursus, morūque præcipuè summa casti-  
 tas & singularis in omni vitæ actione mode-  
 ratio. Cūque nemo esset, vbicunque res id  
 posceret, ad pugnam & arma cienda prom-  
 ptior & ferocior, sibi tamen sic tempera-  
 bat, vt victoria demum potitus ab hostium  
 sanguine vel frementibus sociis humanissi-  
 mē semper abstineret. Supra quæ nobilis ex-  
 celsiq̃ue planè animi argumenta & maximas  
 quibus item vigeat eminentis ingenij vires,  
 non vulgarem quoque Natura & formæ ho-  
 nestatem, & corporis ad omnia dexteritatem  
 ei contulerat, vt equitandi peritia cæterisque  
 militaribus muniis nemo æqualium antecel-  
 leret, nemo quoties ad ludicra conuerteba-  
 tur maiori se agilitate ad omne palestræ ge-

nus exerceret. Sed ex plumbeæ glâdis ictu ad Fontenaium oppidum altero mutilatus brachio, hæc otij deinceps oblectamēta coactus est omittere, veteraque reuocare studia & quod relinquebatur à bellico labore vacui temporis in molli & quieto Musarum conubernio consumere. Fuerat enim puer in his studiis educatus, quæ ad corporis & ingenij cultum ex æquo pertinerent. Vnde & clarissimus bello Imperator euasit, & plurimis de ciuili militariq; disciplina disputationibus populari sermone conscriptis optimo quoque iure meruit eruditorum hîc numero cenferi. Posuerat militiæ rudimenta iam ab Henrici secundi temporibus apud Insubres, indèque Principi Condæo cæterisq; Borboniæ stirpis Heroibus fidissimè adhærens iniquas alternantis Fortunę vices incredibili animi æquitate constantiâque superauit. Bis enim eodem anno deletis insigni Henrici fratris Regij felicitate Borbonicarum partiũ copiis, ipse vtraque clade oppressus captusq; est. Mox verò libertate recuperata instauratq; in Santonum & Pictonum finibus mira celeritate suorum exercitu, militibus nostris & numero pluribus & recenti rerum successu elatis ea loci opportunitate ad Lus-

cionium illius tractus oppidum occurrit, ut fusos omnes ac dissipatos latè sterneret, ipsumq; agminis ducem Pogallardium magna virtutis opinione celebrem & veteranū apertam in fugam conuerteret. Rursum autem in Belgica, dum ordinum fœderatorum auspiciis fortiter & strenuè militat, ab Hispanis interceptus longissima superbæ gentis vincula pertulit, molesta illa quidem & graua, sed profectò gloriosa, quando Philippus, qui tot annos captiuum insolenter detinuit, vel hinc apertè ostendebat quanto opere sibi timeret à summa tanti Ducis fortitudine summâque vigilantia. Quam scilicet abundè cùm ex aliis præclaræ famæ operibus, tum maximè ex Montij Hannonicæ vrbs acerri- ma multorum mensium defensione perspectam probè habebat & cognitam. Quare vix tandem intercedente Lotharingiorum Duce facultas exeundi concessa his legibus, ut à Belgico bello in posterum abstineret, nec aduersus Lotharingicæ domus dignitatem hostiliter vnquam se gereret. Seruauit pacti religionem vir fidei tenacissimus, donec detecta coitione Regem ipsum peti, omniâque diuina & humana iura violari sentiens iudicauit esse impium, & ab officio boni ciuis a-



nis humanæ cīo īo xci. Nec omnino periit  
superstite Odeto filio præstantissima virtute  
viro, cuius in omni vita & moribus expressam  
ad viuum intuemur bellicosi pariter & eru-  
diti parentis imaginem.

*Gulielmus Sallustius Bartasius.*



Vlielmum Sallustium (qui & ab  
auito prædio quod possedit in  
Ausciis Bartasij cognomen tu-  
lit) sublimis animi scriptorem,  
nobili in Vasconia loco patre  
Quæstore genitum præterire  
nec possum nec debeo. postquam eius Galli-  
cum poëma de mundi primordiis, Hebdoma-  
dis nomine inscriptum, quanta non aliis in  
Gallia liber cum admiratione & applausu le-  
gitur passim & celebratur. Quanquā (vt varia  
sunt hominum iudicia) dum simplici narra-  
tione contentus oratorem potius agit quàm  
poëtā, cumulatque paruo delectu metapho-  
ris omnem orationis cultum & elegantiam in  
eo ferè constituit, non desunt qui lōgius eum  
abesse contēdant à recta illa scribendi norma

& ratione, quæ quò seuerius in veterum imitatione consistit, eò propius ad veram in eo genere laudem accedere ex eruditorum sententia iudicatur. Sed quis autem cum eo non præclarè actum putet, qui viuus vidensque celeberrimæ suæ gloriæ interfuerit, Musæque lenociniis exteras etiã nationes & principes ad sui amorè pellexerit. ? Eum certè suscepta in Daniam, Angliam & Scotiam legatione ad se aduentantem Iacobus Scotorum Rex augustissimus, quòdque in tãto Princípe rarum est, omni liberali doctrina ornatissimus & per honorificè accepit & omni studio ac benignitate retinere, sibique totũ vendicare conatus est. Ille tamen vt honestæ Regis volûtati morem gereret nunquã potuit adduci, ne Héríco Borbonio principi suo, cui non minus & literarum & armorũ etiam nomine acceptus erat, exterum Principem quãtumuis de se benè meritũ anteposuisse diceretur. ea maximè tempestate, cum tot parti de hostibus triumpho Gallicos omnes pœtas ad Regis inuicti laudes cerratim decantandas inuitarent atque attraherent. Hoc enim officio Bartasius etiam egregiè functus est, nec adeò multò post elatus, quàm Evriensem victoriam inftar suauissimi oloris ad Garumnæ sui

fluenta supremo lyræ cantu celebrasset. Obiit  
sex & quadraginta natus annos patrio qui-  
dem in solo, sed inter arma & tubas p̄ocul à  
dulcibus Musarum otiis, dum sub Matigno-  
ne legato Regio Equitum alæ præfectus, ab  
Apolline ad Martem pro temporis & rerum  
perturbatione deficeret.

---

*Michael Huraltus Hospitalius.*

**M**ichaeli Hospitalio togati ordi-  
nis principis fuit unica filia Mag-  
dalena Roberto Huralto viro  
clarissimo nuptui data. Quo ex  
matrimonio susceptos nepo-  
tes amplissimus ille senex & omni posterita-  
tis memoria dignissimus voluit, ne nulla fa-  
miliæ suæ vestigia superessent, ascititio quoq;  
nomine Hospitalios appellari. Cùmque hunc  
Michaelem inter cæteros vt sibi cognominẽ  
& ardentiore animo literarum studia capes-  
sentem unicè diligeret, Bibliothecam ei suam  
testamẽto legauit. Itaque generosus puer hoc  
aui de se iudicio magis ac magis inflammatus  
ingenium quod acre habebat imprimis &

habile omnibus bonis & liberalibus doctrinis probè ac diligenter expoliuit, indèque ad Senatum & Reipublicæ administrationem suo tempore progressus est. Diuisa tum erant Gallorum inter se studia, nequedum Rex Nauarræ Henricus Borbonius publicæ quietis vindex & instaurator in auito Francorum Regum solio confederat. Huius tamen triumphos & futuram de rebellibus populis victoriam noster hic Michael sagaci iam tum animo præsentiens ad eum duris temporibus in Aquitania belligerantem paucorumque armis & præsidio se tuentem contendit, eiq; relicta Regis aula totum se dedit. Nec fuit hæc ingrata aut inanis apud magnanimum Principem tam fidelis & propensi animi significatio. Factus enim breui tempore non modò consiliorum particeps, verùm etiam facri sigilli custos & magister supremum inter eius Consiliarios honoris & gratiæ locum adeptus est. nemo ferè vt esset cui potius publicæ mandarentur procurationes & grauissima quæque partium illarum negotia. Cuiusmodi fuit ea potissimum legatio, cum ad suppetias exposcendas in Batauiam & Germaniam ire iussus perpetuam illis gentibus reliquit eruditionis & eloquætiæ suæ famam,

Erupit in id tempus eorum qui partibus Hispanicis fauebant infestissima Francico nomini coniuratio. Cuius opprimendæ causa duo propinqui Reges cùm ad Cæsarodunum simultate omni deposita cõuenissent, pepigère inter se inducias, missis vtrinque legatis qui res bellorum tempestate turbatas & confusas communi opera diligentiaque componerent ac ordinarent. Atque hoc Michaëli quoque officium Rex Nauarræ suo nomine gerendum commisit, cùm & nos eidem procurando Christianissimi Regis nomine præfecti essemus. Qua in congressione & quotidiano conuictu licuit mihi propiùs hominis elegans ingenium eximiamque doctrinam & singularem in scribendo tum facilitatem tum libertatem admirari, dum ciuile discordiæ causas nostrorumq; Principum facta, consilia, conditiones, mores vnius veritatis habito respectu exprimeret, literisque in posteritatis gratiam consignaret. Verum audito de optimi Regis impia cæde nuntio confestim collega meus ad nouum Regem salutandum in castra se contulit. ac demum sanctioribus Regni consiliis & arcanis admissus poterat, si auitis tantum vestigiis insistere maluisset, auitum quoque sibi honorem aliquando polli-

ceri. At præ nimio erga Regem & patriam studio vir togatus temerè sese armatis admiscuit, nec in eo porrò vitæ genere parem animo suo sortitus est fortunam. Succubuit enim vel adhuc iuuenis in maritima Normanię ora Quilbouium ad oppidum indignantis animi dolore oppressus, quòd præfectura illius arcis, cuius & opportunitatem obseruauerat penè primus & locum incredibili diligētia munierat, cedere in alterius gratiam iuberetur. Sed in Cancellarij Nauarræ dignitatem successor ei contigit, quo nullus poterat optabilior contingere Sofredus ille Caligno vir clarissimus omnique virtutis atque doctrinæ ornamento cumulatissimus.

---

*Barnabas Brissonius.*



Adem Brissonio quę & Andreę Tiraquello patria fuit Fontenaium in Pictonibus nobilium ingeniorum ferax. Is patre vsus honesto & diuite illius oppidi Proprætore, hoc assecutus est vt prospero studiorum cursu ad summam & inusitatam multiplicis doctrinę laudem breuĩ

tēpore perueniret. Quæ nō quidem in oriolis  
Musarū vmbraculis, sed in publica hominum  
luce clarissimè omnium emicuit. Vix enim  
adolescētiā egressus in celeberrimis aduo-  
catorum subseillis apud summā Galliæ curiam  
singulare sui dedit specimen: cū genere di-  
cendi vteretur copioso quidem illo, neque  
tamen affectato, sed perspicuo facilique & in  
modum lenissimi amnis nitidè, puritèrque  
fluente. Quo in munere longius progressus  
tantam sui nominis famam excitauit, vt ab  
illo veræ virtutis amatore principe Hen-  
rico tertio primū fisci Patronus, indèque  
sacri consistorij Assessor, & postremò amplis-  
simi ordinis Præses non longo interuallo re-  
nūciaretur. Equidem à Rege ipso audiui cū  
diceret nullum in orbe Christiano principem  
esse qui haberet quem Brissonio suo in lite-  
rarum gloria opponeret. Itaque & eum in  
Angliam de maximis rebus legatum misit  
& cū sua maiorūque edicta constitutio-  
nèsque in vnum colligere, iurisque Gallici  
Codicem suo nomine inscribendum com-  
ponere meditaretur, vnum maximè inter to-  
gatos idoneum iudicauit, cui grauem istum  
laborem committeret: quem tamen intra  
paucos mēses admirabili celeritate perfecit.

Scriptit præterea de verborum quæ ad Ius pertinent significatione ingēs. & eruditum opus, itémq; de formulis & solennibus populi Romani verbis alterū, ac opuscula plurima, quorū optimam partē edidit, partē indigna morte præuentus imperfectā reliquit. Cū enim æstuante nouis tumultibus Gallia vrbs ipsa Parisiorū à Rege defecisset, nec facinorosi ex infima plebis fæce homines, quorum in illa rerū perturbatione præcipua erat auctoritas, possent adduci vt crederent tantum virum, iuris & legum antistitem grauiissimū, tam iniustæ causæ verè & ex animo fauere, illum furiali quodam ausu abreptum & multa nequidquam deprecantem ipso in carcere, indicta causa, crudelissimè oppressere. Quod immane scelus & à multis seculis inauditum ne ipsi quidem factionis principes inultum reliquere.

---

*Jacobus Amiotus*



V I D poterat Amioto Meloduni ad Sequanā ex tenui familia edito maius aut fortunatius contingere, quàm è tot tantisque viris, quibus eruditum seculum affluebat, vnum



vnũ ascisci, qui Regios liberos, omnis Europæ nobilissimos pueros, & ipsi iam tum Imperio destinatos edoceret? Cum enim ingrati animi vitium in generosas illas & excelsas mentes cadere non posset, nunquam postea tanti officij non memores extitere. Quin vt quisque suo tempore ad Regium solium euectus est, præceptorem benemeritum & humanissimè semper excepit, & amplissimis sacerdotiis ornauit atque locupletauit. Qui vicissim ne ingratus haberetur, in hoc totus incubuit vt scriptis suis, ac præsertim Plutarcho in sermonem Gallicum splendidissimè translato, vernaculam Principum suorum linguam, quæ nõ postremum Imperij decus merito censetur, ad supremum puritatis & facundia fastigium perduceret: non minori fortasse gloria quàm si vltimos ipsius Imperij fines virtute bellica propagasset. Vixit ad exactam senectutem alumniis suis præpostero factorum ordine superstes, triennioque post Henricum tertium detestabili parricidarum coitione sublatum è viuis excessit. Hoc tantum infelix, quod, sponte an casu incertum, inter factionis illius participes diu versatus non sine aliqua immemoris animi suspitione moreretur: eti-

amfi, vt ego quidem arbitror, iniuria: mihi enim religio est de tanto viro quidquam temerè suspicari, qui iam ab Henrici secundi temporibus ad Concilium Tridentinum Regi nominique Gallico non satis amicum delegatus orator libera & luculenta oratione habita optimum se ciuem & Regiæ dignitatis àpprimè studiosum ostenderit.

---

*Franciscus Foxius Candalla.*



Vlcrum tibi fuit, Cåndalla Heros excellentissime, ex illa gente oriri qua vix vllam nobiliorem aut antiquiorem sibi arrogare quisquam audeat. Pulcrius autem & longè mehercule pulcrius indefesso quodam mentis vigore ed vsque in literis processisse, vt nemo fuerit qui summum in illis ætate tua principatum (præcipuè in Mathematicis & recondita philosophiâ) tibi non meritò concesserit. Huius rei testis erit apud posteros optimus Trifnegistus ille non tibi solum La-

tinè Gallicéque redditus, sed etiam illis commentariis illustratus, qui auctoris obscurissimi sensa quamlibet abstrusa legentibus aperiant & ob oculos constituent. Testis Euclides, multaque præterea cælestis ingenij tui argumenta, & salutare imprimis illud Elixir (sic enim Antidotum admirabili solertia tibi repertum ipse appellas) cuius compositionem & vsum ne posteritas nimio sumptu deterrita negligeret aut amitteret, annuam in id pecuniam de tuo legare non piguit. Quid quod & pari liberalitate publicam Mathematicos professionem honestaque professori stipendia Burdegalaë paucis ante mēſibus quàm de vita decederes instituiſti? Iure igitur tanto alumno superba lætatur Gallia hoc abundè per te consecuta, vt Italiaë suos Mirandulas inuideri iam desinat. Quos cùm virtutibus omnibus anteires, aut certè æquares, factorum etiam indulgentia superasti. Nonagenarius enim eras cùm eodem illo mense, quo Christianis. Henricus quartus cælesti oleo apud Carnutes inungitur, humano carcere liberatus ad cælum euolasti.

*Claudius Puteanus.*

AT Claudium Puteanum, quo homine nihil doctius, probius, aut candidius ætas nostra tulit, commendatione sua fraudare quis ferat? Licet enim, qua erat animi modestia, scriptis inclarescere nunquã ambierit: ex ea tamen qua insigniter vigeat linguarum & antiquitatis cognitione conii-cere facile est non vires illi sed voluntatem defuisse: præsertim cum in aliorum operibus censendis nullus Criticorum esset exactior aut acutior. Sed illa perfecti iudicii vis in eo potissimum elucebat cum ad seria conuersus in dirimendis hominum controuersis præclarrissimo Senatoris munereungebatur. Hoc enim illi optabile contigit vt Lutetiæ ( quæ natalis fuit ) inter purpuratos patres merito suo conspiceretur. Maiora etiam adepturus si per inuæletudinem licuisset, quæ à studiorum vigiliis contracta & miserabili rerum Gallicarum statu (quo vir patriæ amantissimus grauissimè commouebatur) identidem aucta sin-

gulare illud hominum politionum decus nobis ante tempus eripuit. Annum enim vitæ agens quadragesimum quartum ex atrocissimis calculorum doloribus, quibus tenue corpusculum intus penè totum scatebat proximo post urbem Regi restitutam anno extinctus est.

---

*Lud. Castaneus Rupiposæus.*

**R**upiposæorum in Gallia nomen illustre semper fuit, vel eo maxime quod cum sanguinis vetustate non belli modò gloriam, sed & vitæ morumque castitatem constanter adæquarint. Atque hoc peculiare suæ gentis decus Ludouicus hic noster præclare sustinuit, vel potius ingenti laudisaccessione cumulauit: postquam auctore Iosepho Scaligero nobilissimo viro & sui seculi doctissimo ad illam Naturæ bonitatem literarum & sapientiæ lumen adiunxisset. Quo factum est vt foris domique præstans his dubiis Galliæ temporibus optimi ac fortissimi ciuis famam meritò sit consecutus.

O ilj

Primum enim Romam à Christianissimo Rege Henrico tertio missus Orator nominis Gallici decus atque dignitatem aduersus Hispanicas fraudes & insitam illi nationi superbiam in ipsius Pontificis conspectu gnauissimè tutatus est. Inde redux in Patriam & in sanctius Regis consilium assumptus, cum fidei constantiæ & propensi erga Rempublicam animi quotidie documentum aliquod ederet, ingrauescente motu ciuili vtriusque Marchiæ præfecturam à Rege successore obtinuit, adedò secundis auibus, vt intra exiguum tempus perduelles omnes & coniuratos tota illa prouincia expelleret, demùmque numerosam illorum manū duce Villoquerio Guerciæ Vicecomite contractam in Pictonibus ad Vigennam insigni prælio deleret, plurimis eorum cæsis aut in propinquum flauium demersis : in quibus ductor ipse repertus tanti triumphi gloriam suo casu non mediocriter illustrauit. Postremò dum è castris ( in quibus Regi ipsi res in vltiore Burgundia tum gerenti multos menses operam strenuè præstiterat ) per Boios iter facit, Molinij febre ardentissima correptus intra paucos dies absumptus est. Non indigno vitæ exitu, ne vir vtilitati publicæ natus pri-

uatim in suis ædibus vitâ finiret. Cuius ad innumeras virtutes cum vnica laudatio non satis esset, nihil abs re me facturum putauì si pedestri elogio pœticum subiiceretur, quo filiarum nostrarum alteram partem eius aliquando nomini clarissimo consecrauimus.

**Q**uæ tamen ignauos iam mollis inertia Celtas  
 Detinet, aut spatius timor improbus vrget iniquis,  
 Vt sese addicant studio vix segniter vni  
 De genere? placidas auide colit ille Camænis,  
 Doctus, seu magnum numeris æquare Maronem,  
 Siue hominum mentes facundis flectere dictis,  
 Aut rerum causas, aut abdita promere iura.  
 At sit opus valido patriam defendere ferro,  
 Auget femineas imbelli voce querellas,  
 Et penitus trepidæ sit ciuis inutilis vrbi.

Alter Marte potens, primis quem crudus ab annis  
 Ebibit, ingenuas animo non concipit artes.  
 Strenuus ille quidem, & sumptis longè optimus armis,  
 At si succedat rigido pax aurea bello,  
 Negligit inculto ciuilia pectore iura  
 Barbarus, horribili patriam miscetque tumultu.

Hinc adeò externas armis neque pellere gentes,  
 Nec satis inter nos pacem licet vsque tueri.  
 At quos culta dedit seclis melioribus Hellas,  
 Bellatrix aut Roma viros, vtrumque subibant

Æquè onus, & socio gaudebat Apolline Maiores.  
 Non igitur mirum est, si tot tantasque per orbem  
 Illa vel illa tulit gemino stans numine palmas.  
 Nos malè vicino vix tuta tuemur ab hoste  
 Oppida, & vnus captis in mœnibus Urbis  
 Querimus ingentes titulos, finemque laborum,  
 Quem dare victori prouincia victa solebat.  
 Vsq; adeò fractum virtus diuisa vigorem  
 Sentit, & egregius nequaquam sufficit ausis.

Vnus es, o patriæ rarissima gloria terræ,  
 Quem non degeneris ladant contagia seclī,  
 Quique trucem dulci Musa moderere Graduum.

Atque equidem sic te nasci voluere sorores,  
 Ius quibus humana deducere stamina vitæ,  
 Perpetuò regni afflictis vti rebus adesses.  
 Seu magnum affari Tarpeia in rupe parentem  
 Esset opus, blandisque ad pacem inducere verbis,  
 Dum te magnanimo Legatum à Rege tot annos  
 Roma videt, meritumque abeunti reddit honorem.  
 Seu toties bacchante odij ciuilis Erynni  
 Regis amor patriæque salus ad bella vocarent  
 Impavidum, & populis imponere frana iuberent.

Nec si fortè pares felix tibi Gallia multos  
 Ferre queat, paribus non speret & illa triumphis  
 Debellare suo longinquas tempore gentes.

Macte animi, macte ingenij, Ludouice, Deūmq;  
 Non tibi concessas tot amico numine dotes



*Nequidquam esse puta, tanquam sine nomine vulgo.  
 Non omnis moriere, tui pars optima letum  
 Nesciet, & longa viuet per secula fama.  
 Iam tua siderco tollit se gloria celo,  
 Iam tibi gratantes toto ex Helicone Camæne  
 Certatim sua dona ferunt, praeque omnibus vnum  
 (Si quid id est, tenuémque haud aspernabere vatem)  
 Cæpti operis meritò te prima in fronte locamus  
 Insignem, & nostra resonant tua nomina Sylva.*

### *Henricus Memmius.*



Enricus Memmius Ioannis Iacobi viri inter togatos ornatissimi filius paternis vestigiis insistens, sed meliore vsus seculo ingeniũ, quod à Natura fœcundissimum acceperat, per bonas omnes disciplinas liberaliter excoluit. Neque minori felicitate per omnes honorum gradus in Republica progressus ad sacrum Regis consistorium peruenit, Michaeli Hospitalio eius ordinis principi, quanquam dispari ætate, adeò gratus & fidelis comes, vt quoties grauissimus ille senex valetudine vteretur minus prospera

nullum ferè lubentius quàm Memmium in laboris partem vocaret. Quanti autem & ipsi Reges eum fecerint ostendit illa celebris ad Borbonios principes legatio, cui vnà cum Bironè sub finem tertij belli ciuilis à Carolo nono præfectus est, eo euentu vt exacerbatos ex dissidij toties repetiti assuetudine Gallorum animos ad pacis amorem facundia sua reuocaret, cùm superiorèm in dicendi lepore haberet neminem. Cuius nomine apud Regem successorem, vt pote principem eloquentissimū, maxima eius gratia fuit. Donec inuidorū calumniis ab illo distractus excessit ab aula, vt cū amicis & libris, quorū magnam & exquisitā copiam habebat, placidam senectutem exigeret. Sed hanc illi tranquillitatis occasionem ademerunt quæ mox infecuta sunt Ibericæ factionis acerbissima tempora. Quorum tædio vir nominis Gallici studiosissimus paulatim contabuit. Multa interim cōquerens de factorum iniquitate, postquam duos æquales suos & studiorum & munerum societate sibi coniunctissimos, Vidū Fabrum Paulūque Foxium vno eodémque anno vidisset opportunè tot ærumnis eripi, nec se tertium illis adiungi. Atque in eo mœrore anno tandem huius seculi supra nonagesimū

sexto circiter annum ætatis sexagesimum tertium piam egit animam. Coluerunt cum docti omnes ab eo vicissim vnicè dilecti & omni officiorum genere affecti. Atque ante alios Ioannes Passeratius eloquentiæ professor Regius, qui meliores vitæ annos apud eū amicissimè transegit, mortuúmque & à filio patriæ auitæque laudis æmulatore tumulatum immortalī Musarum monumento consecrauit.

---

*Ioannes Bodinus.*



OANNIS quoque Bodini Andegauensis felicissimum ingenium fuit. Qui cùm ab adolescentia bonis omnibus literis egregiè imbutus esset, imprimisque gentium omnium historiam absolutissimè callet, illius legendæ methodum libello breui quidem illo sed sanè luculentissimo complexus est. Fuit hoc illi famæ surgentis auspiciū, quam editis de Republica sex libris varia multiplicique eruditione & stupenda exemplorum varietate refertis abundè postea

confirmauit atque auxit. Neque verò quam scriptis comparauerat existimationem præsentia sua minuebat, si quando in familiari hominum congressu de quacunque re proposita disertè copioseque disputaret. Quo magis mirandum est hominem ea facultate præditum inter nobiliores curiæ Parisiensis aduocatos locum obtinere non potuisse: præsertim cùm æquales haberet Brissorios, Pascasios, Pithæos, & alios complures ingenij laude præstantes viros, qui amœnioribus etiã disciplinis incumberent, nec eò minus celebriter in fori luce versarentur. Hac enim re siue neglecta, siue infelicitè tentata reliquit Lutetiam, adhæsitque serenissimo Andium Duci Regis fratri: quem in Angliam secutus cùm illic è suggestu publico sua scripta inuenibus enarrari comperisset, ex hoc inusitata gloriolæ prouentu non mediocrem vigiliarum suarum fructum sibi visus est collegisse. Trajecit inde ad Belgas in eiusdem principis comitatu, quo mox intempestiuè sublato, Laoduni Veromanduorum, vbi magistratum gerebat, inclinante iam ætate acquieuit, alteroque demum post urbem illam à Rege obsessam & expugnatam anno in cœlum se recepit.

*Q. Sept. Florens Christianus.*

I quem hoc seculo Musæ Græcæ Latinæq; pari vtrunque favore amplexæ sūt, certè is fuit Florēs Christianus Aureliēsis, à cuius erudito filio multa propediem expectamus huius studij ab illo relicta & in perpetuum victura monumenta. Nam ipse dum viueret nihil ferè in vulgus emisit, præter aliquot Græcorum Tragedias Comœdiasq; Latinè conuersas & varia poëmatia, quæ ab amicis rogatus, vt sese aliqua insignis offerebāt occasio, liberrissimè scriptitabat. In his autem erat munitiarum simul & argutiarū plenus, maximè si quando liberiores aculeos in aliquem emitteret. Ad quod scribendi genus non quidem maledicēdi studio, sed libertate quadam poëtica procliuior esse videbatur. Adeò vt adolescentiæ annos nōdum egressus Ronsardum ipsum iam tum insigni laude florentem mordaci & amarulento poëmate lacefferet. Quā ætatis intemperantiam summus ille vir, qua

erat animi magnitudine, non modò cōtemp-  
fit, verum etiam doctissimi adolescentis inge-  
nium exosculatus in amicitiam illum auidif-  
simè recepit. Vidum autem Fabrum pari li-  
bertate offensum vt sibi aliqua propensioris  
animi significatione conciliaret, Tetraſticha  
de moribus ab illo grauissimo viro Gallicè  
conscripta Græcè Latinèque tranſtulit aureo  
ac planè antiquo stylo & in eius gratiam pu-  
blicauit. Sed neque vir in literarum otio mol-  
liter educatus publicam interea hominum lu-  
cem refugit. Vt qui apud Vindocinos, vbi  
fortunarum sedem posuerat, illustrissimæ  
Ducum familiæ à consiliis fuerit, & (quod  
imprimis illi honorificum) Christianissimo  
Regi Henrico tunc Nauarræ principi aliquot  
annos in literis humanioribus operam præ-  
buerit. Cuius meriti gratia factum est vt re-  
belli vrbe à Regiis expugnata, cùm Christia-  
nus, quem cæca illa tempeſtas cùm reliquis  
ciuibus abripuerat, inter captiuos repertus  
eſſet, non modò pius Princeps illi parceret,  
sed etiam militibus qui captiuum detinebant  
redemptionis quantitatem ſua ipſius pecu-  
nia lui iuberet. Periit ſex & quinquaginta  
natus annos ex rapida febre ſub exitum anni  
ſuprà mille & quingentos nonageſimi ſexti.

*Ludovicus Alealmus.*

**L**S patre nobili & diuite Vernolij  
ad septimum ab vrbe lapidem  
Toparcho genitus & in fori Pa-  
risiensis luce non sine maxima  
doctrinæ fama diu versatus Au-  
relia postremò consedit, susceptamque nobi-  
lissimæ & opulentissimæ vrbis præturam per  
totos viginti annos castè imprimis & prudèter  
administrait. Colebat interea sacras Musarum  
artes & ea subseciuo tempore ludebat  
singularis elegantia poëmata, quæ post eius  
obitum à filio paternæ simul dignitatis & vir-  
tutis hærede publicata legunt nunc omnes  
viri politiores & eo magis admirantur, quod  
vel in ieiuna steriliq; materia incōparabilem  
quandā & inexpectatam præ se ferant iugenij  
summè felicitis vbertatem. Excessit autem è  
vita quanquam septuagenario maior, impor-  
tuno tamen interitu & præpropereo, quod  
paucis ante mensibus vitam finiret, quā inter  
inuietissimum Regem & coniuratos Duces  
pacis præuiæ pangerentur induciæ: nec ante

talem horam ea carperet, quibus tandiu caruerat, propinquæ trāquillitatis optatissima tempora. Cuius in laudibus viri commemorandis ideo sumus hîc breuiiores, quod eas in recenti funeris luctu fuerimus longiore iampridem nœnia persecuti.

---

*Nicolaus Sudorius.*



vis verò facilè credat hominem ab ineunte adolescētia foro deditum, grauissimóquē Præsidis munere Lutetiæ perfunctū vel in mediis negotiorum ciuiliū fluctibus ita suæ spontis fuisse, vt ad suauitates poëticas animum interea deflecteret? non vt epigramma vnum aut alterum aliūdve quidpiam leuioris operæ meditaretur: sed, quod Flaccus ipse optimus artis poëticæ magister fieri possē negauerat, aureum illum Dircēs olorem in aërios nubium tractus multiplici gyro sese attollentem assequeretur, eiusque diuinos omnes cantus numero quidem dispari, sed pari omnino spiritu Latinis auribus excipiendos redderet. Atqui arduum  
istud



istud opus neminique adhuc tentatum Sudorius hic noster & confidentissime ausus est & felicissime perfecit. ut nimirum exemplo quoque suo demonstraret quantò cæteris Galliæ ingeniis Lutetiana præstent, si quando ad Naturalem bonitatem præclara educatio multisque rerum usus accesserit. Numeris etiam Gallicis nonnunquam ludebat: quorum ut levis iactura fuerit, non tamen ea quæ de Iure doctissime scripsit celari diutius & iacere in tenebris sine magno Reipublicæ detrimento possunt. Perijt sub id tempus quo recepta est à Rege Lutetia quinquagesimo quinto vitæ anno, ab impia latronum manu (dum à Sequanorum finibus in urbem se recipit) in ipso itinere sæuissime necatus.

*Petrus Pithæus.*



**I**N vrbe Tricassium nati sūt pater nobile & erudito Pithæi duo fratres omnibus disciplinis ornatissimi, nec immeritò geminis Tyndaridis à cōpluribus huius æui scriptoribus adæquati. Quod enim  
P

illi suo fidere nautis in mari sulcando, id isti literarum studiosis in antiquitate peruestiganda diuino doctrinae suae lumine praeclarissime praestitere. Nec id ipsum porro praestare desinit Franciscus natus minor, quem hodieque videmus inter insignes Parisiensis fori Iuriscōsultos merita multiplicis eruditionis fama celeberrimè perfruentem. Te vero, Petre doctissime, quem iniqua nobis nequedum satis matura mors eripuit, lugemus omnes Musarum amātes viri, & eò lugemus acerbius, quò pauciores tui similes reliqueris in hac vltima rei leterariae tempora reſeruatōs. Quantum verò in his studiis emineres vnus & excelleres docuere ſuis certatim elogiis cum alij ſerè omnes huius ætatis eruditi, tum illa potiſſimum duo Galliaē noſtræ ſidera Turnebus & Cuiacius præceptores quondam tui. quorum cum vterque ſuis in libris frequentem & honorificam de te mentionem fecerit, hic inſuper te iuuenem ſenex, diſcipulum magiſter, in dirimendis cum æmulo controuerſis arbitrum ſibi optare minimè dubitauit. Quamquam aliena tibi commendatione quid opus eſt, cum & tuis ipſe ſcriptis, quibus Hiſtorici, Critici, Iuriſconſulti, Philoſophi laudem eſ meritus, & plurimis veterum monumentis,

quæ suppressa in tenebris latebant, per te primum excitatis ac publicatis nomen abundè illustraueris tuum, & memoriæ mandaueris hominum sempiternæ? Sed neque tibi dum hîc ageres dulcissimus ille defuit, qui viuos & sentientes magis afficit, præsentis gloriæ fructus, dum incredibili clientium concursu diuina Themidis oracula quotidie depromis, ea doctrine pariter & sanctitatis admiratione, vt Henricus III missis in Aquitaniam aliquot Patribus qui ius dicerent, his te simul & Oiselum tuum doctissimum quoq; virum legationis comites addiderit, qui sua & Reipubl. grauissima negocia susciperetis in illo Senatu pro singulari vestra diligentia & fide, procuranda. Quid loquar de incomparabili morum suauitate, facilitate, candore, modestia & indefesso illo quo mortales omnes anteibas de bonis omnibus benè merendi studio? Itaque dum tui memoriam boni omnes vicissim colunt, aliique lugubribus tibi parentant næniis, alij vitam tuam & honestissimas actiones pedestri facundia describunt, accipe has etiam inferias & suprema veteris amici munera, quæ & nos tibi offerimus, ne soli tantò è numero simus in eum ingrati, quo nemo vixit omnibus gratior, nemo in omnes

benignior. Fato functus est Petrus Pithæus  
 Nogenti ad Sequanam ex febre septem &  
 quinquaginta natus annos Calend. Nouem-  
 br. die suo natali, biennio postquam eius  
 magna ex parte consilio & opera delusis Ibe-  
 ricæ factionis artibus Lutetia regni caput in  
 legitimi Regis potestatem peruenit.

---

*Nicolaus Vignerius.*



Ic vir natione Barenfis profes-  
 sione Medicus omnes omnium  
 ætatum & gentium res pace  
 bellóque gestas ingenti & ope-  
 roso volumine Gallicè comple-  
 xus rem hercle fecit Gallicæ  
 nobilitati Græcorum & Latinorum ferè igna-  
 ræ vtilem simul & iucundam, sibi verò ipsi  
 nequaquam satis pro tãti laboris merito fru-  
 ctuosam: quando vix vllam inde mercedem  
 retulerit præter nominis famam tota latè  
 Gallia celebratam, sed plus adhuc celebra-  
 tis habituram, si Latino sermone, qui nullus  
 nationum finibus circumscribitur, tam nobi-  
 le & egregium opus moliri in animum indu-

xisset. Hoc enim facile poterat homo Romana facundia præstantissimus. Atenim suis popularibus consulere, doctique viri laudè boni civis opinione cumulare non inani pietatis argumento maluit. Ortus erat familia nec tenui nec obscura, patre fisci Patrono: sed bellorum iniuria rebus attritis contulit se in Germaniam, Principumque liberalitate, apud quos ibi Medicinam exercebat, exilij molestias & patrię desiderium tantisper leniit, dum pacata Gallia receptus ad suos & ab Henrico tertio Medici ac Historici Regij titulis insignitus habuit vnde honorificam & placidam exigeret solo in patrio senectutem. Eius tamen cineres patria ipsa non habuit. Lutetię enim, dum plurima rarę doctrinę volumina typis committere meditatur, ætatis anno sexagesimo sexto de vita sublatus est.

---

*Simo Mallius Brezæus.*



IMONEM MALLIVM Andino ex agro speciosis ortum natalibus & splēdidis opibus affluētem ornabat etiam incomparabilis morum candor, verēque Christiana pietas

& qui ab eiusmodi fortuna plerumque abhorret, literarum amor flagrantissimus. His ille meritis & Archiepiscopus Turonum à Rege dictus est, & cum se Carolo Cardinali Lotharingo in clientelam dedisset, hoc duce profectus in Italiam inter cæteros Europæ præsules Tridentina in Synodo clarus & illustris emicuit. Sed maturè cessit aula vir quietioris vitæ cupidus, ac in Brezæo suæ gentis amœno prædio sedem studiis & commentationibus opportunam delegit. Quo in recessu cum alia conscripsit opera, tum selectas viginti quatuor ex D. Basilio conciones purissimè fecit Latinas & Cardinali suo dedicauit. Habitabat in ea domus parte, quam suis ipse sumptibus ædificauerat opère quidem egregio & eleganti, sed infirmiore positam solo, quæ cùm à fundamentis conulsa de nocte repentè concidisset fatalique & improuisa ruina domesticos propè omnes oppressisset, solus inter effossa suorum cadauera illæsus & incolumis repertus est. vt optimum Præsulem atque diuini cultus obseruantissimum certà numinis prouidentia in rem Christianam seruatum fuisse pij omnes facilè crederent, nec sine maximo stupore lætarètur. Vixit inde ad octogesimum annum & alterum, quamuis arti-

culari morbo distortus, nec antè periit quàm confecto Hispanicæ coniurationis intestino bello iucundissima tandem Galliæ pax arrideret. Hoc etiam felix, quòd idoneum ei successorem superi delegere Franciscum Guelæum nobilissimum virum, qui Themidis quoque pius antistes in senatoria dignitate iam antea præclarum sui specimen edidisset.

---

*Gilbertus Genebrardus.*



Ruernia bonis ingeniis fecunda, cuius è gremio prodierè togati ordinis tot illustres viri, hunc etiam edidit sacri ordinis eruditum virum, qui sanctæ linguæ Regius apud Parisios Interpres Hebraicæ antiquitatis arcana plurima, & ea maximè quæ ad rationes tēporum subducēdas pertinet, adhibito perspicacis ingenij lumine perquisiuit ac in lucem protulit. Hoc enim ex fonte ortum est chronologicū illud opus & alij, qui nunc sunt in manibus hominū, similis industriæ fœtus maximis ab eo vigiliis & la-

boribus elucubrari. Multa ille ex Hebræis & Græcis accuratè transtulit, multa recognovit, multa commentatus est. Nouissimèque Musarum penetralia ingressus amatorium Salomonis Latinè tentauit poëma molle illud quidem ac tenerum, sed pium, quo Seruatoris purissimos in Ecclesiam suam amores intelligi sapientissimi hominès tradidere. Nec eum ab instituta versione deterruit, quòd alij summæ doctrinæ viri & huius ætatis facillè principes poëtæ lepores omnes & gratias in eodem carmine transferendo felicissimè iam impendissent. His studiis insenscentem, partaque præstantis eruditionis opinione latè celebrem Gregorius XIII eorum commendatione qui à Regio nomine descuerant Aquensi Archiepiscopatu donauit. Sed magnanimo Rege rerum potito impetratam his authoribus à Pontifice dignitatem diu seruare ac tueri non potuit. Fato functus est Semuri Burgundionũ, quo in oppido non ignobile sacerdotium possidebat, anno salutis MDXCVII circiter ætatis annum sexagesimum.



*Henricus Stephanus.*

Nter eos qui de re literaria bene meriti sunt Roberti Stephani Parisiensis typographi solertissimi splendidissimique magna cum primis nec vlllo æuo peritura laus fuit, vel ex illo amplissimo Latinitatis thesauro, quem omnibus eius linguæ studiosis plurimo sumptu, plurimo sudore, plurima diligentia deprōpsit. Nec minori postea laudis argumento Henricus filius Græcarum literarum amantes eodem officii genere sibi deuinxit. Sed & veterū innumera tum sacrorum tum exterorū volumina ex celeberrimis eorū officinis exiere multò quàm prius emendatiora, multò venustioribus formis excusa: cum vterque ad insignem industriam & indefessum artis egregiæ studium non vulgarem in omni literarū genere doctrinā feliciter adhiberet. Hēricus certè mirificam de se iam tum excitauit famam, cum adolescens ex Italia reuersus Anacreōtem, qui tot annos latuerat, vetustis notis in libro exaratum secum at-

tulit, moxque Lutetiæ typis Regiis eleganter impressum, paribusque numeris Latinè à se redditum & quidem erudito seculo nec à poetis hilaritatibus alieno eduxit primus è latebris & euulgauit. Erat in eo viro summa ingenij fecunditas & siue Græcè siue Latinè scriberet, vtriusque lingue vsus & facultas omnium paratissima: cumque pati non posset in eo Gallos errore diutius versari, vt patrio sermoni Etruscum anteponendum crederent, nonnulla interdum Gallicè scriptitabat multo sale respersa opuscula, quibus & nostræ linguæ prædicaret præstatiā, & sua ipse in scribendo puritate ac elegantia comprobaret. Sed grauiora fuerunt ea, quæ in multis vtriusque linguæ scriptoribus recensendis & in quorundam imitatione rectè commodeque instituenda subinde molitus est. Habebat fortunarum sedem apud Allobrogas voluntarium patris exilium secutus, non obscuro tamen Lutetiæ desiderio, quam & cæteras item Galliæ vrbes vt se quamlibet leuis offerebat occasio non illibèter inuisebat. Ac postremò Lugduni quò se quoque septuagenarius contulerat fatali morbo correptus anno supra sesquimillesimum duodecentesimo de vita decessit, cum & Robertum patrem, & patri cognominem

fratrem natu minorem, nec industria dispar-  
rem, qui Lutetię paternam officinam redinte-  
grauerat, fata iampridem eripuissent. Reli-  
quit moriēs aliquot liberos, atque in iis Pau-  
lum domesticę laudis æmulū & filiam Isaaco  
Casaubono viro longè doctissimo, Lutetiam-  
que à Rege ad meliores literas instaurandas  
nuper ascito collocatam.

*Germanus Audebertus.*



Ermanus Audebertus Aure-  
lię ad Ligerim honestis ortus  
parentibus vt eloquentię phi-  
losophiæq; studiis, quę ab ine-  
unte adolescētia diligēter co-  
luerat, iuris & legum pruden-  
tiam adiungeret, superatis Alpibus Alciatum  
Bononię tunc docentem plures annos audiit,  
receptusq; ad suos Italię amorem, quem à re-  
gionis amœnitate hominumq; doctissimorum  
optabili conuictu & allocutione conceperat,  
neq; postea vnquam deposuit, & illustri ac di-  
uina Musarum opera peregregiē testatus est.  
Venetias enim & Romam & Parthenopen

amplissimas nominis Italici vrbes ea carminis maiestate descripsit, in cuius immortalis splendore spes illis mansuræ apud posteros memoria non minor quàm in tot sumptuosis maiorum suorum monumentis procul dubio sit reponenda. Quod insigne meritum & quouis auri pretio maius ac præstantius Respublica Veneta vt pote sapientissima nõ putauit satis pro dignitate pensari posse, nisi honorem honore rependeret, præconemq; suæ læudis eximium in ordinem Equitum D. Marci (qui honos Principibus viris & Regibus ipsis deferri solet) ex publico Senatus decreto cooptraret. Sed neque vir prudens & moderatus hac inani gloriolæ accessione sustulit animos, nec sibi quidquã de solita modestia detraxit, contentus ea quam apud suos iamdudum exercebat vectigalium indictionumque præfectura, humili fortasse illa & obscura, si hominis dignitatem respicias; sed quam eo tãtum animo susceperat, ne nullam Reipublicæ partem attigisse sibiq; soli vixisse diceretur. Obiit anno partæ salutis ciro io iic postquam ad octaginta amplius annos honestè, integrè, placidèque vixisset. Relictis præter ea quæ commemorauimus poemata siluarum aliquot libris, qui lucem expectare poterant ab eius hærede

flio in summa Rhedonum curia Senatose,  
nisi & ipse paucorum dierum interiectu ca-  
rissimi parentis funus morte cumulasset sua.

---

*Petrus Lætus.*



Petrus Lætus Iulioduni Medi-  
co patre natus ad Medicinæ  
studium, (hanc enim etiam  
professus est) non ea tantum  
quæ vulgò à Philosophiæ co-  
gnitione peti solent subsidia  
& adiumenta conferebat. Sed & omni libe-  
rali disciplina mirificè excultus maxima cum  
dignitate diuinam & salutarem illam artem  
apud suos exercebat. Non dubium sibi locum  
inter nobiliores Galliæ Medicos asserturus,  
nisi vir pius, qui se patriæ natū crederet, intra  
tenuis oppidi septa procul ab omni ambitio-  
ne latuisset. Emergit tamen è tenebris ali-  
quando tandem & apparuit postquam ab il-  
lustrissimo Dumbarum Principe Henrico  
Borbonio ad repellenda Mercurij Ducis &  
Hispanorum arma se accingente in comita-  
tum & familiam ascitus est. Quibus & nos

in castris decem integros menses Regis imperio viximus Quæstoria dignitate perfuncti, vel eo me hercule commodius & iucundius quòd amici doctissimi suauibus interim alloquiis & vsu quotidiano frui liceret, amboque vt plurimum vacui inuisa Martis tædia molli Musarum amœnitate leuaremus. Atque is in illa ipsa expeditione Iobi Constantiam, aliâque sacrorum vatum carmina patrio lepore decantauit, cùm & aliquot antè annis diuinum Fracastorij de morbo Gallico poema transtulisset his numeris, qui auctoris maiestatem Maronianæ proximam planè referrent. Latinè certè si quid meditaretur (multa autem & prosa & carmine meditatus est) nihil omnino tersius, nihil in vtroque genere perfectius à quoquam poterat expectari. Quo magis dolendum fuerit si vel temporum malignitate, vel hæredum incuria tot elegantes egregij viri lucubrationes ingrata nocte sepeliantur. Ipse enim quinquagenario vix maior intempestiua morte Lutetiæ procul à suis interceptus est, oborta repente febre, cui lethalis iëterus altero die superuenit.

*Franciscus Espineius Sanlucius.*

Ranciscum Sanlucium Gallicæ nobilitatis rarū & singulare decus hæc ætas paucissimis illis annis numerat, qui cū peculiari Martis amore & studio teneretur, Musarum interea molles artes & amœna otia non omisere. Sed in hoc nostro certatim elucebāt innumeræ corporis animique dotes, quibus inter ceteros vnus maximè insignis & cōspiciuus eminebat, os decorum, illustris facundia, faciles mores, quæque potissimū eius ordinis hominem decebat, impauidi animi summus vigor & bellica vis, quæ nec æstu, nec frigore, nec inedia, nec vlllo deniq; periculorum metu frāgeretur aut debilitaretur, & ea demū diuini ingenij facultas expeditaq; solertia, quæ præsertim in militaribus cōsiliis aliquid exquisitū & cum paucis cōmune semper afferret. His ille instructus cum se Regi Henrico tertio paulatim insinuasset, eiusque fauorem ac beneuolentiam promeruisset, cœperat multa & præclara sibi à tãti principis incredibili ac pene dixerim

portentosa liberalitate polliceri. Verùm aliquantò post vrgētibus æmulis exclusus repulsq. cessit aula, Broagiumque (id maritimū est oppidum in Santonico litore loco peropportuno cuius præfecturam gerebat) relicto Regis comitatu se recepit. Fecerat nuptias cum Iana Cossæa Brissaci Equitum Tribuni filia, quæ & ingenij laudibus & flagrantissimo in literas amore viros ipsos adæquabat. Huius igitur in gratiam ascitis aliquot eruditioris hominibus quandam veluti academiam in illo recessu instituit, scripsitq. ipse inter hæc otia patrio lepore multos verius perelegantes & his floribus adornatos, qui Ronsardi, Portæi, ceterorūmq. primæ classis poëtarū scripta penitus redolerent. Inchoauit etiam ac pænè perfecit accuratos de re militari commentarios, & absoluisset, nisi quæ superuenerent bella hominem laudis cupiditate ardentem ad alia studia conuertissent. Is namque & Francisco Regis fratri Belgarum imperium affectanti longo tempore militauit, & eiusdem principis interitu renouatis in Gallia factionibus, Broagium suum à Principe Condæo belli duce impigro cum validis copiis obsessum, acerrimèq. ad multos dies oppugnatum vel in summa rerū penuria felicissimè

defecit



defendit. Princeps enim, quem aliò res vocabant, soluit sponte obsidionem, & cū omni exercitu re infecta discessit. Inde autem ingrauescente bello, cum regias copias ductore Ioëusa in Regem Nauarræ contendentes comitaretur, ea sorte Cotraſiensi prælio interfuit, vt ex infelici pugnae euentu peculiarem ipse laudis & nominis occasionem cōsequeretur. Quod enim ei summè gloriosum fuit, cum eodem illustrissimo Principe fortè congressus, dum aduersis hastis concurritur, eum sic offendit & concussit, vt quantumuis generosè renitentem equo tamen deiiceret ac deturbaret, sed mutatâ repentè fortunâ oppressus ipse, & à Principe captus est. Iam tum enim æqua Regi futuro fauebant & propitia numina, quæ profligato regionum exercitu, caſo ductore, & iis ferè omnibus qui superfuerant in captiuitatem abductis, plenissimam ei victoriam concessere. Huic bello successit aliud longè grauius & infestius, cuius in limine Rex vita excedens, cū Gallici imperij iura ipsi Nauarro vt hæredi & successori legitimo transcripſisset, tum demum visa est sese aperire Sanlucio fortuna blandior & æquior. Nouus enim Rex, qui ad vindicandum imperium & factiones è Gallia pellendas in strenuâ & fideli eius opera multum ponebat, quo maiores ad virtutem stimulos excelsio

& nihil humile spiranti eius animo adhiberet, primò quidem Britannia, inde verò Picardiae Proregem eum renuntiavit, eidemq. paulò mox summam rei tormētariae praefecturam (qui honos in Gallia vel inter primos & amplissimos habetur) maxima cum benevolentiae testificatione concessit. Verùm eadem illa Fortuna more suo fallax & inconstans regiae liberalitatis fructum ei carpere diu non permisit. Accidit enim vt Ambianum vrbs Picardiae munitissima cum primisq; populosa & celebris ab Hispanicis aliquot legionibus insigni ciuium ignauia interciperetur. Cuius recuperandę studio & cupiditate Rex inflāmatuſ & iniurię nusquā paties (quādo sibi per valetudinē eò statim proficisci non licebat) Biromem Equitū Tribunū, qui erat exercitui praefectus, & Sanlucium ipsum vt prouincię Proregem ante alios delegit, qui communibus votis & consiliis, interea dum Rex conualesceret, eam curam capeſſerent, obsidionisq. futurę fundamenta iacerent. Sed in eodum Sanlucius totus est, nec satis cautē sibi prospicit, ab Hispanis emissa glande caput ictus ante quinquagesimū ætatis annū occubuit. Hic fuit exitus clarissimi fortissimique

viri, quem vniuersæ Galliæ desiderabilem ipse ante alios Henricus, addito lacrimis honorifico elogio, diu multúmque deplorauit.

*Montholonij tres.*

**M**ontholoniæ domus, quæ iam olim apud Heduos pace bel-  
lôq. diu floruit, emicuere  
nostro seculo nitidissima duo  
lumina pater & filius eodem  
Francisci nomine appellati, qui pari ferè pro-  
bitatis atq. doctrinæ commendatione ad su-  
premam iuris in Gallia præfecturam suo quis-  
que tempore peruenerunt. Sed in patre vi-  
gebat aliquantò generosior indoles & spiritus  
audentior, qui necopinata occasione tam illu-  
stri rerum accessioni & amplitudini viam fe-  
licissimè aperuit. Cum enim solus inter cæ-  
teros Curia Parisiensis aduocatos Caroli Bor-  
bonij causam aduersus Franciscum primum  
& Lodoicam eius matrem ipso in Senatu se-  
dentes intrepidè tuendam suscepisset, Rex  
etiam in aduersario iustus veræ virtutis æsti-  
mator diuina hominis eloquentia sic affectus

est, ut cum ultro & fisci patronum, & postea Senatûs præsidem, & mox amoto Gul. Poieto Galliæ Cancellario sacri sigilli custodem renuntiaret. Filius autem licet omnibus afflueret ingenij fortunæq. bonis, quibus planum sibi & facilem ad honores aditum parare posset, eorum tamen petitione semper abstinuit. vixq. demum senior & nihil iam tale cogitans accersente Henrico tertio ab ipsis aduocatorum subselliis ad summum illud Reipub. culmen est euectus, nec ita multo post eodem se sponte abdicauit. Horum exempla secuti sunt cum alij nobiles eadem ex familia Senatores, tum verò Nicolaus cultissimo vir ingenio nec impar domesticæ laudis æmulus, qui tamen, ut bonum ciuem decebat, in patrio Burgundiæ Senatu acquieuit. Ibi dum in luce forensi florens adhuc ætate facundiam exercet suam, credi vix potest quanta cum celebritate non Galliæ modo sed exteris etiam & longinquis nationibus innotuerit. Quis enim silentio prætereat, cum ab ultimis Lithuanis, à Virtembergico Duce, ab aliis principibus longè fuisse quæsitum, qui rara legum peritia multoq. perspicacis ingenij acumine res ipsorum dubias & in discrimen adductas ab iniuria vindicaret? Postea verò quàm ad regij

patroni munus, quod integro vicennio tenuit, indeque ad ipsam Præsidis auctoritatem progressus est, quò celsiore loco posita fuit egregij viri virtus, eò clarius & splendidius enituit. Fuere tribus in Montholoniis dux peculiare animi dotes, quibus potissimum ad hæc summa dignitatum fastigia sublatisunt, innata vitæ integritas & erudita cum primis in dicendo facundia. Sed Franciscos patrem & filium insignis quædam comitas affabilitasque sermonis, Nicolaum seueritas maior, & offensionum pro salute publica contemptor animus, ob idque parta apud suos ingens auctoritas ante omnia commendabant. Eum certè, vt priscæ grauitatis exemplum specimen tota ciuitas & viuum vnicè coluit, & mortuum honorifica recordatione luctuque & mærore penè incredibili est profecuta; vel ob id maximè, quòd post cæcam illam populi ferocientis amentiam Rege sua tandem opera salutato, pacis in Burgundia constituendæ præcipuum auctorem & administrum se præbisset. Super sunt eius ingenij monumentis duo tantum volumina, quorum altero celebriora Burgundicæ Curie sancita ipso principis causas agente promulgata continentur, altero, quod

magnus Hospitalius & perlectum probauit, & suis auspiciis in lucem exire desiderauit, non pauca Romani iuris arcana singulari Latinitatis candore & puritate explicantur. Sed hunc thesaurum adhuc latentem aliquando nobis depromet Gulielmus eruditi parentis eruditus filius, qui eiurato Burgundici præsidis honore (nam & in eum Nicolao patri successerat) in Prætorium se contulit, vbi nunc libellorum supplicum magister multa quotidie præbet eaque maxima solertis iudicii politiorisque doctrinæ documenta.

---

*Philippus Huraltus Cheuernius.*



Philippum Huraltum Cheuernij Comitem ex Britannica nobilitate oriundum Belnea mater fœmina quoque nobilis ultimo partu posthumum edidit, cum Rodolphus pater aliquot antè mensibus Neapolitano bello periisset. Adolescentem excepit Academia Pictauiensis legum studio celeberrima cui tamè ita se de-

dit, vt historiarum interim & earum artium  
quæ ad imperij gubernacula pertinerent ali-  
quantò curiosior vnum ferè Tacitum aut Co-  
minium & alios eiusdem notæ scriptores ha-  
beret in manibus, eorumque diligenti & quo-  
tidiana lectione mirificè delectaretur. Scili-  
cet generosi adolescentis egregia iam tum in-  
doles viam sibi ad intima principum consilia,  
tanquam Natura duce per hæc studia parabat  
ac muniebat. Nec tantæ spei postea defuit ad  
facilem euentum præsens & opportuna sortis  
occasio. Duxit enim vxorem Philippus Chri-  
stophori Thuani Senatûs principis filiam, qui  
vir clarissimus & in assidua tanri muneris  
functione occupatus, cum ab Henrico Regis  
fratre ad Cancellarij dignitatem inuitaretur,  
maluit eam ad generum suum deferri: vnde  
præcipuus illi deinceps patuit apud Regem  
futurum auctoritatis & gratiæ locus. Cui de-  
mum absenti & è Sarmatia reditû in Galliam  
audito fratris funere molienti sic adfuit, eius-  
que rationibus adeò cautè fidelitèrque pro-  
spexit, vt nusquam ingratus Princeps matris  
quidem auctoritate sed salutaribus Huralti  
consiliis assertum sibi & seruatum fuisse im-  
perium non obscurè profiteretur, neq; porro  
conquiesceret, donec eum in supremo togatè

militiæ gradu collocaret; lubrico illo quidem & ancipiti, sed in quo tamen vir incomparabili prudentia vel inter medios aulae fluctus & latentes æmulorum insidias perstitit incolumis, & in perpetuo prosperitatis tenore diu permansit: Nullam instabilis & iniquæ fortunæ vicem experturus, nisi optimus princeps qui detectâ multorum perfidiâ desertum se turpiter à suis & proditum sentiret, suspicionum idèò plenus omnes ferè quantumvis probatos & fideles ministros, atque in iis Huraltum ipsum regia pepulisset ac summouisset. Verùm altero post anno reuocauit eum nouus regni successor Henricus quartus, & pristinae dignitati restituit. Erat statura mediocri, specie decora, moribusque suauissimis: nulli se in accessu difficilem aut asperum, nulli morosum ostendebat, ea comitate vultûs, eaq. blandi sermonis efficacia, vt etiam eos, qui repulsam pateretur, nunquam nisi letos ac benè sperantes à se dimitteret. Nec è minus grauitatem in consiliis & insignem totius rei Gallicæ peritiam, quòdque miremur in tanta negotiorû multitudine & varietate paratam semper & expeditam acerrimi iudicij vim præferebat. Sanè constat eius interitum Regi maximo & omnibus aulicis valdè fuisse tri-



stem & acerbum. Longè tamen acerbiorum futurum, nisi amplissimi viri Pomponij Belleuræi successoris eo loco dignissimi admirabilis integritas cum singulari doctrina & longissimo rerum usu coniuncta huic faciliè desiderio modum adferrent. Vixit ad septuaginta duos annos viuendo semper ingenio & sensibus integerrimis, annóq. tandem supra mille & quingentos vndecentesimo, Sextili mense, apud Cheuernium suum, vbi natus erat, mortuus est, ac ibidem in maiorum conditorio iuxta parentis ossa, quæ Capua iusserat in Galliam asportari, tumulatus.

---

*Petrus Faber Sanioranus.*



Ic quoque vir maximus Fabrorum illustre nomen raro & admirabili doctrinæ suæ splendore magis ac magis illustrauit. Vt enim Cuiacius, Duarenus, Hotomanus, & alij si qui sint eorum similes, nobilium hac ætate Iurisconsultorum familiam duxisse non iniuria prædicentur, in eo tamen superior quodammodo censeretur Faber potest, quòd non tranquillo tantum otio priuatique

studiis, sed & ciuiliū rerum assidua tractatione vtilem se hominū societati maximè præbuerit. Eius quidem iudiciū, prudentiam, fidem in conuentu Rotomagensi Rex admiratus, nō alium digniorem existimauit, qui post varia togæ munera laudatissimè obita primarius tandem Præses in Tectosagum ciuitate sibi natali supremo Senatui præficeretur. Sed non longè postea fuit cum sexagenarius pro tribunali ius dicens XIII Kal. Iun. anno millesimo sexcentesimo apoplexiâ repentè suffocatus interiit; fama tamen æternū superstite, postquam eas de iure publicauit commentationes innumeris ingenij doctrinæque luminibus ornatas atque distinctas, quæ donec Romanæ loquentur literæ, maximo semper in honore & pretio ab eruditis omnibus habebantur.

---

*Claudius Falco Rizius.*



Non sperabam fore, vt huius ornatissimi viri sanctis Manibus etiam Elogia nostra parentarent, quando ad quadraginta amplius annos ea viximus inter nos amicitia beneuolentiâque

coniuncti, cùm & eum ego studiosissimè colerem, & ille me vicissim aliqua de meis moribus opinione diligeret, vt

*Me si fata meis paterentur claudere vitam*

*Auspiciis,*

separari à tanto amico ac diuelli ne in ipsa quidem morte debuerim. Natus erat Lutetiæ, sed exSeptimania oriundus genere nobili, habebátque non mediocris fortunæ patrum Carcasonis antistitem, cui postquam ad aliquot annos eruditus adolescens in spem futuræ successionis adhæsisset, aliò tamè se traduxit, sumptáque toga Senatū ingressus Inquisitionum quartæ classi tamdiu præfuit, dum commendante Anna Ioeusæ Duce in sacrum & intimum Regis Henrici tertij consilium accerferetur. Sēsit illicò sagax & egregiè cordatus princeps quanta esset hominis eruditio, quanta facundiæ vis, quanta denique in consiliis explicandis & fides & prudentia, Quæ quo magis omnia niterent, & in illustri posita loco spectarētur, eum quoque nec postulante iussit ad suprēmę Rhedonum Curię principatum attolli. Hac igitur honorum accessione dupliciter exornatus nunc in Britania viuebat, nunc in Regis aula, & alternis vtrumq; munus pari cum dignitate sustinebat,

Verùm turbata nouo tumultu Gallia dum is Rhedones ad stationē suam fortè contēdit, à cōiurata factione interceptus, Nannetēsque in durum atque diuturnū carcerem abductus est. Quēsiuit solatium à Musis, quarum in amoribus acquiescebat, Latinōque poēmate sanè grauiſſimo Lucanū æmulatus impiū illud ac plus quàm ciuile bellum inter vincula decantauit. Compositis autem Galliæ rebus, cū effluxissent aliquot anni, deposuit sponte magistratū alienique cœli tædio se totum Lutetiæ reddidit. scilicet antea actæ vitæ memoria satis superque felix, eoque præsertim filio, cui pulcherrimus virtutum concursus & excellens in omni disciplinarū genere doctrina iam ad summos togatæ militiæ gradus aditum præbuisſent, maiorāque in dies & ampliora non obſcurè pollicerentur. Vixit inde ad ætatis annum circiter quintum & sexagesimum optato literarum otio mirificè delectatus, nec interim à repub. sibi temperans. agebatūque noui seculi primus annus cū ex hac vita vir pius & integer in meliorem alteram & perennio rem se recepit. Salue longū & vale ô felix anima, dum & nos te præcūtem hautquam certè inuiti, quādo cūque summus ille imperator iusserit, sequamur.

*Claudius Falchetus.*

Nlli vnquam nostrorum hominum maior exornandæ patriæ cura maiúsque studium incubuit, quàm Claudio Falcheto Parisiensi omnium quidem antiquitatum, sed earum præcipuè quæ ad Galliam spectarent, indagatori acerrimo. Quanquam & alijs in artibus, quæ reipublicæ non minus prodesse, meliorem ætatis partem exegerat. Iam tum enim cum Senæ à Pontificis & Florétinorum legionibus obsessæ Gallicis armis Monlucio duce defenderentur, traiectis identidem Alpibus, vt Regem de rebus grauissimis à Turonio Cardinale conueniret, ianuam sibi ad honores aperuit, prosperoque tandem progressu ad Monetælis curiæ primum gradum ascendit. Sed genium & naturam secutus, à publicis interim negotijs ad priuata studia se referebat. Eius enim fideli opera Cornelium Tacitum populari sermone loquentem Galli nunc legunt, aliâque multa curiosæ diligentæ

opuscula, quorum vt postremum ita præstantissimum fuit historia de regibus Gallicis ad Capetum vsque perducta, longiusque perducenda, nisi senem septuagenario maiorem nuper inuadens iniqua mors eius vitæ simul & incepto labori finem imposuisset.

---

*Ioannes Passeratius.*



Ic est ille Passeratius origine Trecensis, vtraque lingua doctissimus, qui primus apud Parisios in schola Regia reconditas veræ Latinitatis opes aliquanto maiore cura & studio peruestigauit, iuuentutique aperuit; cùm Turnebus, Auratus, Lambinus, cæterique prius in eadem schola professi Græcis potissimum interpretandis operam & industriam impendissent. Poterat quidem ex vmbra & scholastico otio in apertam fori lucem prodire, & ad rerum administrationem se conferre. nec enim ei deerant opportuna ciuilis discipline præsidia, cuius puros limpidosque fontes apud Biturigas à diuturna Iacobi Cuiacij consuetudine affatim

hauserat & imbiberat. Sed Petro Ramo eloquentiæ doctore delectus à Rege successor in eademum professione consensuit, nobilemque doctrinæ suæ famam vel apud remotissimas orbis terræ nationes longè latèque propagauit: cum nihil vulgare, nihil tritum, nihil è medio sumptum afferret, ob idque politissimi quique homines etiam ex ipso Senatu celebre eius auditorium frequentarent, ac velut ex nitidis & fragrantibus eius hortulis lectissimos Romanæ elegantiae flores admirabili cum voluptate exciperent. Fuit altero captus oculo, facieque rubore suffusa, quæ triste nescio quid ac seuerum præ se ferret; sed eius ingenio nihil erat amoenius, nihil sermone facetius, nihil usu & congressione iucundius. Qua singulari morum suauitate incredibiles sui amores in mentibus hominum excitabat. Adeo quidem ut ab Henrico Memmio viro clarissimo in amicitiam & familiam semel acceptus ad ipsos vndetriginta annos apud eum in summa animorum & studiorum conjunctione vixerit. Extant huius gratissimi conuictus & otij testes multilusus, variæque non vulgaris argumenti pocinaria, quibus ineunte Ianuario solebat quotannis patronum illum salutare, & quæ sitis ex tam pretiosa Musarum

supellectile muneribus magis ac magis de-  
mereri. Atque utinam quæ in Ciceronem,  
Plautum & alios linguæ Latine præcipuos au-  
ctores accuratè ac diligenter adnotauit, aliquã-  
do quoque prodeât, nec diutius in tenebris  
magno studiosorum incommodo sepulta deli-  
tescant. Ob hæc merita dignū illum iudicauim-  
us, qui tot inter eximios bonarum literarū  
proceres locū hīc suum tueretur, atque adeò  
agmen ipsum iure quodam suo clauderet. His  
enim extremis rei literariæ temporibus, nisi  
Scaligeri, Lipsij, Casauboni, Fabri cum aliis  
paucissimis adhuc supersint, quis vltimum  
politioris literaturæ decus in huius tanti viri  
morte concidisse non fateatur? Periiit ex pa-  
ralysi tres & septuaginta natus annos pridie  
Eidus Septembr. anno millesimo sexcente-  
simo secūdo, cum ad integrum penè quinquē-  
nium lecto miserè afflictus in maxima ægri-  
tudine & molestia iacuisset, eo tamen constā-  
tis animi vigore, ut etiam inter vltima suspi-  
ria hoc sibi ipse Epitaphium pro solita iocan-  
di libertate concinnaret.

*Hic situs in parua Ianus Passertius Vrba*

*Ausony doctor regius eloquij.*

*Discipuli memores tumulto date serti magistri,*

*Ut vario florum munere vernet humus.*

*Hoc*



*Hoc culta officio mea molliter ossa quiescent,  
Sint modò carminibus non onerata malis.*

Sepultus est in Dominici fano ad Iacobæam portam, vbi Io. Iacobus Memmius Henrici filius libellorum in regia magister, vti veteris in clientem beneuolentiæ pius hæres, marmoream ei statuam collocauit.

### *Arnoldus Ossatus.*



Ed & hunc sacrari ordinis aureum florem, ocellum nostræ Galliæ, sui denique seculi novum sidus Arnoldum Ossatum quo nunc piaculo præteream? Is humili apud Auscos ortus loco, sed nobili & excelsa præditus indole postquã in umbratilibus Rhetorum & Philosophorum scholis aliquandiu profitendo lauisset, foróque deinde se comparasset, ad alia studia se transtulit, Romamque mox in Pauli Foxij legati Regii comitatu profectus, & eo postea sublato in Cardinalis Atestini rerum Gallicarum patroni familiam ascitus erexit se


R

ad grandiora, tractandisque magni momenti negotiis ita paulatim assuevit, ut in hoc laudis genere parem hæc ætas haberet procul dubio neminem. Itaque Henricus tertius omnis egregiæ virtutis liberalissimus admirator eum ultro in Galliam reuocare constituit, ut ab epistolis interioribusque consiliis eius fideli opera & industria dubiis temporibus uteretur. Sed cum sacris initiatus esset, id munus tanquam à sua professione alienum modeste repudiavit. Nec defuere qui hoc eius factum sic interpretarentur, quasi Romano cælo iam assuetus, & ardentis Fortunæ sibi conscius ad ea se reservaret, quæ Romæ postea consecutus est, longè maioris ampliorisque dignitatis ornamenta. Cum enim Henricus quartus pacata inuictis armis Gallia, cum summo quoque Pontifice redire in gratiam statuisset, Ossatū inter alios delegit, qui vnà cum Ebroicensi episcopo Iacobo Davidio Perrone singulari doctrina viro, nunc amplissimo Cardinale, Romam in id à se tum legato grauissimum illud opus cōficeret, pacemque tanto labore partam aliquanto firmiore præsidio vinciret ac stabiliret. Quo demū negotio feliciter & ex animi sententia transacto vir eximius commendante Rege illustrem sacræ purpuræ honorem à gra-

to & amico Pontifice facile tulit: eoque facilius, quod insignis eius candor & probitas amabilesque mores cum summa eruditionis & prudētię opinatione coniuncti omnium fere Cardinalium animos iamdudū promeruiſſent, ſibi que cōciliaſſent. Obiit in eo fortunę ſplēdore feliciffimus ſenex hoc ipſo anno qui nunc agitur cix ix ciiii. nobiſque vel addita iam operi coronide nouum nec opınatum Elo- gij conſcribendi argumentum obiecit. At vos, in quorum gratiam hac ſacta parauimus, ô celebrium tot virorum beati manes, eſte boni: nec enim dignius ea peragi ſanè poterant, quàm ſi ad extremum tanto nomine appellato ritè conuenienterque ſic litaremus.

FINIS.

Rij



## LECTORI.



**R**VNT fortasse nonnulli, qui ne nunc quidem sibi satisfactum putent, nec secus ac superiore editione multa eruditorum nomina tanquam hic prætermissa desiderent. Ego verò quod fueram pollicitus, idipsum integra fide præstare, nec eorum qui superessent ullum indictum præterire sanè decreueram: sed ea fuit ingeniorum in Gallia fecunditas, ut etiamsi memoremus eos tantum qui vita perfuncti sunt, vix tamen ea pluribus libris possint omnia comprehendere. Ceterum (quod cum bona virorum illustrium venia factum velim) in Elogiis collocandis hunc tenuimus ordinem, ut nullo dignitatum seruatō respectu, solius ætatis ratio, quoad eius fieri potuit, à nobis haberetur, & quò quisque prior è vivis excesserat, eò superiorem sibi locum ex historia lege vendicaret. quando lex ea certè non poterat sine adulationis aliqua suspitione violari.

---

**D**E sine scriptoris breuitatē carpere Liur,  
Non scribit vitas ille, sed Elogia.

P. LAETVS.



ELENCHVS GALLORVM  
DOCTRINA CELEBRIVM,  
*quorum Elogia hoc opere continentur.*

A

<b>A</b> drianus Turnebus.	pag. <u>71.</u>
Aegidius Burdinus.	<u>84.</u>
Aemarius Ranconetus.	<u>92.</u>
Andreas Tiraquellus.	90.
Antonius Contius.	100.
Antonius Fumeus Blandæus.	<u>123.</u>
Antonius Nicolaius.	<u>150.</u>
Arnoldus Ferrerius.	<u>148.</u>
Arnoldus Ferronus.	<u>68.</u>
Arnoldus Oñatus Cardinalis.	<u>242.</u>
Augerius Ferrerius.	<u>166.</u>

B

Baptista Menilius.	<u>82.</u>
Barnabas Brissonus.	<u>128.</u>
Bertrandus Argentæus.	<u>183.</u>

C

Carolus Lotharingus Cardinalis.	<u>107.</u>
Carolus Molinæus.	<u>77.</u>
Carolus Sammarthanus.	<u>170.</u>
Claudius Espencæus.	<u>86.</u>
Claudius Falco.	<u>242.</u>
Claudius Falchetus.	245.
Claudius Puteanus.	204.
Clemens Marotus.	<u>27.</u>

Christophorus Harlaeus.	92.
• Christophorus Longolius.	<u>7.</u>
Christophorus Thuanus.	<u>134.</u>
D	
Dionysius Lambinus.	96.
E	
Elias Vinetus.	<u>157.</u>
F	
• Franciscus Bakluinus.	<u>98.</u>
Franciscus Connanus.	<u>35.</u>
Franciscus Cuarenus.	<u>54.</u>
Franciscus Foxius Candalla.	202.
Franciscus Hotomanus.	181.
Franciscus Montholonius pater.	<u>235.</u>
Franciscus Montholonius filius.	ibid.
Franciscus Noxus.	<u>189.</u>
Franciscus Oliuarius.	<u>57.</u>
Franciscus Rabelæsus.	25.
Franciscus Roaldefius.	<u>173.</u>
Franciscus Espineius Sanlucius.	231.
Franciscus Varablus.	22.
G	
Germanus Audebertus.	<u>127.</u>
Germanus Brivius.	<u>13.</u>
Germanus Valens Pimpontius	<u>158.</u>
Gilbertus Genebrardus.	<u>223.</u>
Gulielmus Bellaius.	<u>16.</u>
Gulielmus Budaus.	4.
Gulielmus Pellicerius.	<u>32.</u>
Gulielmus Philander.	<u>72.</u>
• Gulielmus Postellus.	<u>131.</u>
Gulielmus Rondeletius.	<u>79.</u>
Gulielmus Sallustius Bartasius	<u>193.</u>
H	
Henricus Memmius.	209.
• Henricus Stephanus.	225.

Iacobus Annotus.	200.
Iacobus Billius.	126.
Iacobus Burgius.	116.
Iacobus Cuiacius.	186.
Iacobus Faber Stapulensis.	1.
Iacobus Fauius Spenseus.	177.
Iacobus Gopilus.	73.
Iacobus Hollerius.	74.
Iacobus Lodoicus Strebæus.	34.
Iacobus Mangottus.	154.
Iacobus Pellerarius.	131.
Iacobus Sammarthanus.	170.
Iacobus Siluius.	39.
Iacobus Tufanus.	22.
Ianus Antonius Baifius.	18.
Ianus Morellus.	129.
Ioachimus Bellaius.	60.
Ioachimus Perionius.	42.
Ioannes Anratus.	167.
Ioannes Bellaius Cardinalis.	16.
Ioannes Bodinus.	211.
Ioannes Brodæus.	62.
Ioannes Corrafius.	97.
Ioannes Dampetrus.	28.
Ioannes Fernelius.	45.
Ioannes Gorræus.	118.
Ioannes Guellæus.	160.
Ioannes Mercerus.	101.
Ioannes Monlucius.	110.
Ioannes Moruillerius.	113.
Ioannes Passeratius.	246.
Ioannes Ruellius.	14.
Ioannes Stephanus Durantus.	164.
Ioannes Tilius maior.	90.
Ioannes Tilius minor.	ibid.

Iulius Cæſar Scaliger.	<u>46.</u>
L	
Laurentius Iobertus.	141.
Lazarus Baiſius.	<u>18.</u>
Ludouicus Alcaſmus.	215.
Ludouicus Caſtaneus Rupipoſæus.	<u>205.</u>
Ludouicus Duretus.	<u>147.</u>
Ludouicus Regius.	121.
M	
Marcus Antonius Muretus.	142.
Margareta Valeſia.	<u>29.</u>
Martinus Bellaius.	16.
Mellinus Sangelafius.	<u>37.</u>
Michael Hoſpitalius.	<u>104.</u>
Michael Huraltus.	<u>125.</u>
Michael Montanus.	<u>65.</u>
N	
Natalis Brulartus.	81.
Nicolaus Gruchius.	88.
Nicolaus Montholonius.	<u>235.</u>
Nicolaus Sudorius.	216.
Nicolaus Vignerius.	220.
O	
Orontius Finæus.	41.
P	
Paulus Foxius.	<u>140.</u>
Petrus Bulengerus.	<u>169.</u>
Petrus Bunellus.	<u>42.</u>
Petrus Caſtellanus.	44.
Petrus Dancſius.	<u>10.</u>
Petrus Faber Sanjoranus.	241.
Petrus Fuluius.	69.
Petrus Gillius.	23.
Petrus Lætus.	219.
Petrus Montaureus.	<u>80.</u>
Petrus Pithœus.	217.



Petrus Ramus.	<u>24.</u>
Petrus Ronfardus.	<u>144.</u>
Petrus Seguierius.	<u>124.</u>
Philippus Cominius.	<u>2.</u>
Philippus Huralrus Cheuernius.	<u>238.</u>
<b>Q</b>	
Q. Septimius Florens Christianus.	<u>213.</u>
<b>R</b>	
Reginaldus Clutinius.	<u>101.</u>
Remigius Bellaqua.	<u>120.</u>
Robertus Garnerius.	<u>175.</u>
Rupex Pictavienses.	<u>133.</u>
<b>S</b>	
Salmonius Macrinus.	<u>25.</u>
Sebastianus Castalio.	<u>64.</u>
Simco Bosius.	<u>128.</u>
Simo Mallius Brezæus.	<u>221.</u>
Stephanus Boëtianus.	<u>65.</u>
<b>V</b>	
Vidus Faber Pibracius.	<u>137.</u>

FINIS.

---

**I**LLUSTRES Heroum animas pia cura parentis  
Excitat, & caeli rursus ad astra vehit.  
Ac velut Aethiopis quae viuo e cesspite pubens  
Laetior Idaeis prouenit herba iugis,  
Vi tacita quaecunque latent arcana resoluit,  
Si modò praesenti gramine claustra linas.  
Sic pater obscuri tumuli caua busta resignat,  
Dum lita nectareo verba liquore fluunt.

ABELIVS SAMMARTHANVS  
SCÆVOLÆ F.

---

Σῆο ἐπεὶ τὰ χαφέντα βίον νεκροῖσιν ὁπάζει,  
Οὐκ ἐπικηδία ἐστ', ἀλλὰ γενεθλιακά.  
Ἀλλὰ γενεθλιακά γὰρ ὁμῆ ἐπικηδία ὅστιν,  
Ἐκ τῆ μῆνης φαρέτης διτλὸν οἶτον ἴης.

N. SAMMARTHANVS  
LVDOVICI F.

---

**Q**VOS, post fata, virum laudata per ora renasci  
Sammarthane iubes, prima incunabula nolint  
Nosse iterum, naesti aeternam te vindice vitam.

FRANC. CITESII Med. Doct.

---

**A**T LANTIS Libyci nepos disertus  
Et fidus superum Deum minister  
Pallenteis animas potente virga  
Ex Orco trahit ad Iovis tribunal.  
At tu Mercurio haud minor, sepulchris  
Illustreis animas disertiorum,  
Nostra Gallia quos tulit, virorum  
Extrahi, rapis adserisque Olympo:  
Sic ut iam volitent virum per ora,  
Aeternoque simul fruantur aevo,  
Sic ut Elogiis tuis disertis  
Cedat primula vita iam secundae.

IO. FALCO.

---

**A**VREA perpetuo voluuntur sidera gyro,  
Et rapiunt motus caetera versa pari.  
Cumque perenne nihil constet mortalibus, aequa  
Quis nolit te te vindice fata pati?  
Optarim seras ego iam praevectere Parcas,  
Si talis dabitur vita secunda mihi.  
Et modo dent ista Superi me sorte beari,  
Sic mihi vel durum est vivere, dulce mori.

P. NANCELIVS.

**F** OELICES *Animae artubus solutae*  
*Quos Mors carceribus suis recondit,*  
*Fœlices ter & amplius beatae,*  
*Non quòd Elisos vagae per agros*  
*Ludatis nitida simul sub umbra,*  
*Et vitam peragatis innocentem:*  
*Sed quòd S Ç AEVOLA gloriam propaget*  
*Vestram, & Elogio suo perenni*  
*Vos longinqua ferat virum per ora.*

*Et hoc, S Ç AEVOLA, maximè fatentur,*  
*Nec debere tuo negant labori,*  
*Sed coeco studio tui videndi*  
*Id moleste Animae ferunt, cupitus*  
*Quòd diu nimium morèrè terris.*

*At quorsum inuidia hæc & vnde vestro*  
*Assertori Animae inuidetis annos?*  
*Qui vitam ex auido dedit sepulchro*  
*Ex vita huic cupitis dari sepulchrum?*  
*Immo iam, rogo, sit satis superque,*  
*Vobis S Ç AEVOLA ruc quod parentet,*  
*Nec suum inbar inuidetè terris.*  
*Vt qui Nestoris aemulatur ora*  
*Seros Nestoris aemuletur annos.*

IO. DELINGENDIVS.



<i>Pag.</i>	<i>Lin.</i>	<i>Errata.</i>	<i>Emendationes.</i>
49.	9.	regios	regios
51.	16.	longiquitas	longinquitas
53.	9.	Fraciscus	Franciscus
54.	7.	vererum	veterum
59.	tit.	LIB. I.	LIB. II. & sic deinceps
68.	5.	ost	post
71.	3.	cōsuedtudine	consuetudine
ibid.	14.	insanissimò	insanissimo
75.	6.	impariens	impatiens
90.	1.	Flotentis	Florentis
91.	7.	diguius	dignius
95.	7.	ampleplexus	amplexus
96.	20.	recensut	recensuit
97.	2.	poetica	politica
99.	7.	facundissimus	facundissimus
104.	4.	Aruenia	Aruerniæ
109.	14.	tertius.	tertius
110.	1.	celebriūqum	celebriumque
114.	10.	tanqam	tanquam
119.	13.	quibns	quibus
ibid.	23.	exanimatus	sic exanimatus est, vt
120.	10.	uatem	autem
124.	23.	calebritate	celebritate
134.	11.	Hortatium	Horatium
137.	17.	sue	sue
147.	5.	Luduoicus	Ludouicus
149.	17.	virtutem	virtutum
156.	18.	exemptus	exemptus
165.	21.	suis	sui
ibid.	22.	ad	ac
170.	11.	præsertim	præsertim

<i>Pag.</i>	<i>Lin.</i>	<i>Errata.</i>	<i>Emendationes.</i>
ibid.	13.	dibium	dubium
171.	26.	facto	fato
173.	vlt.	precipi	percipi
176.	18.	iu	in
178.	16.	propinguo	propinquo
179.	5.	Ecclesiæq;	Ecclesiæq;
ibid.	18.	Serruino	Seruino
183.	11.	aque	arque
197.	12.	Christianissimi	Christianissimi
199.	15.	intetuallo	intervallo
200.	5.	redidit	edidit
ibid.	8.	infirma	infirma
216.	1.	talem	fatalem
218.	13.	leterariæ	literariæ
222.	18.	conulsa	conuulsa
228.	24.	octaginta	octoginta



VA1  
1528184









